


# Isuva Soqe Uva Kuama



Genesis and the Gospels in the Arau dialect of the North

Tairora language of Papua New Guinea

**Isuva Soqe Uva Kuama**  
**Genesis and the Gospels in the Arau dialect of the North Tairora**  
**language of Papua New Guinea**  
**Sampela hap Buk Baibel long tokples Arau long Niugini**

copyright © 1986 Wycliffe Bible Translators, Inc.

Language: Arau (North Tairora)

Dialect: Arau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

---

PDF generated using Haiola and XeLaTeX on 18 Apr 2025 from source files dated 31 Aug 2023  
90947037-585d-5612-873d-36e338f0ae1b

## Contents

OSARA . . . . .	1
MATIU . . . . .	22
MAAKI . . . . .	26
RUKU . . . . .	31
IOHANE . . . . .	36

## OSARA

### *Kotiva aiqava ahasa auku soa*

<sup>1</sup> Haau hoqareo Vaiqavano Kotiva naauavata vakavaka auku seo vakoa.

<sup>2</sup> Aukuseo vakovo haau vi entaa vakavano vaieva hampiqama vio vaihao gumina vakaqai vauvo sa vo ahasavanovaka vauvo sonkira aru ahasavaqai noa namai ventaqara man-taaqa sovo vaua. Vi entaa vakavano minkima vauvo Kotia Maraquavano noa namai ventaqara ruvauvau ihao vaua.

### *1 Enta*

<sup>3</sup> Kotiva minkima kio: Aakikaane, kuvo Kotiva kunte io aakika vua.

<sup>4</sup> Kotiva aakikoa kavovo soqe io vauvo raira sehao aakikoa voqaa vakeo sonkiraiqua voqaa vakoa.

<sup>5</sup> Kotiva aakikooa auku ntehao, Isarama ivo, kivaseo sonkiraiquaa auku ntehao, Enta-qive, kua. Entamaqio vivio aakika vuvo vi entava hoqarenaa enta kaiqa vua.

### *2 Enta*

<sup>6-7</sup> Vi entaa konavuvanovaka mamanavuvanovaka noa namaiqaa qapuqio vauvo Kotiva kihao, Ruqema via viini oiniao noa namaivano miani variaio avukana qaqi variaie, kio. Minki kuvo Kotiva kunte io konavuvanovaka mamanavuvanovaka noa namaiqahairo ruqema vio viini oini vauvo noa namaivano miani vauvo avukana qaqi vauvo

<sup>8</sup> Kotiva qaqi vaua auku ntehao, Naauave, kua. Entamaqio vivio aakika vuvo vi entava kaara enta kaiqa vua.

### *3 Enta*

<sup>9</sup> Via qararaa Kotiva kihao, Noa namai miani vaiava vohaanaini okiniao aahara vakavano qovaama vio vaiaie, kio. Minki kuvo Kotiva kunte io namaivano vohaanaini okinuvo aahara vakavano qovaama vio vaua.

<sup>10</sup> Kotiva aahara vaka auku ntehao, Vakave, kivaseo namaivano vohaanaini oku vaua auku ntehao, Noa namaive, kua. Kotiva kavovo nai auku seo vako ahasava soqe io vaura.

<sup>11</sup> Minkima soqe io vauvo viaqaankaio Kotiva kihao, Vakavano vaiao viaqinkaio vo ahasa vo ahasavano qampiqaaiaava qovaama variaie. Vo usau vo usauvono kava iraa-iaavavaka, vo sakai vo sakaivano kava iraaiaavavaka qovaa ianarove, kuvo Kotiva kunte io vi ahasava vi ahasava qovaama vio vaua.

<sup>12</sup> Vakaqinkaio qampiqe vau ahasava qampiqoa. Vo usau vo usauvono kava irehao sa hampi kava iraraio, nai kavaqai iraqio vi vauvo vo sakai vo sakaivanovaka kava irehao nai kavaqai iraqio vi vaua. Minkimaqio vi vauvo Kotiva kavovo soqe io vaua.

<sup>13</sup> Entamaqio vivio aakika vuvo vi entava kaaramo enta kaiqa vua.

### *4 Enta*

<sup>14</sup> Via qararaa Kotiva kihao, Naauaini ikaa ia ahasava vo ahasa vo ahasavano qovaama via hini ahasavano entaqaia ikaaia ahasava vaiao hini ahasavano aakikaainaqaqa ikaaia ahasava variaie. Vi ahasava vi ahasava vaihao ntara uki entaave, ntara qantu ne entaave, koa ikaqio vio vuu kaiqaaina entaave, ihi kaiqaaina entaave, numiqaqio vuanaove.

<sup>15</sup> Vi ahasava vi ahasava naauaini vii ntaka ikaqio vihao vakaini aakika nimikaanarove, kio. Minki kuvo Kotiva kunte io aakikehao vaua.

<sup>16</sup> Kotiva aakikaaina ahasaa noa kaaraqanta auku seo vakoa. suaivono aakikaainaqaqa ikaqio vuaie kio, auku seo vakeo koravano entaqaia ikaqio vuaie kio, auku seo vakoa. Kotiva vikanta auku seo vakeo masauve, ovuroave, vahoquave, auku seo vakoa.

<sup>17</sup> Kotiva vi ahasava vi ahasava vakaini aakika nimikaqi vuaie kio, naauaini auku seo vakoa.

<sup>18</sup> Vi ahasava vi ahasava aakikaainaqaavaka entaqvaka ikaqi vuaie kio, naauaini vi ahasaa auku seo vakoa. Sonkiraiqiava nariaraa vaiao aakikaaiava nariaraa variaie kio, Kotiva vi ahasaa vi ahasaa auku seo naauaini vakoa. Kotiva kavovo nai auku seo vako ahasava soqe io vaua.

<sup>19</sup> Entamaqio vivio aakika vuvo vi entava kaaraqanta kaaraqanta enta kaiqa vua.

### *5 Enta*

<sup>20</sup> Via qararaa Kotiva kihao, Vo ahasa vo ahasa qaqi vaiqio vuaia ahasava noa namaiqi vi aniha mpiqaake. Vo uvii vo uviiavano aka vare vi aniha naauainivaka mpiqaake, kio.

<sup>21</sup> Minki kivaseo Kotiva noa aantauvahi noa namaiqi ni ahasaa auku seo aiqava vi ahasava namaiqi qaqi vaiqio vuaina ahasaave, nana nana ahasa qasiaina ahasaave, vo

ahasa vo ahasa auku seo vakeo, viaqaankaio vo aantau vo aantau aarosa vakaa aantauaqaí auku seo vakeo. Auku seo vakeo Kotiva kavovo nai auku seo vako ahasava soqe io vaua.

<sup>22</sup> Kotiva vi ahasaa vi ahasaa soqema nimikeo kihao, Ne namaíqi vai aantausa suvuaramaí vivo airiqihao namaíqi mpiqaaie. Ne uviivanovaka suvuaramaí vivo airiqiaie, kio.

<sup>23</sup> Entamaqio vivio aakika vuvo vi entava sauqu hiniu enta kaiqa vua.

### 6 Enta

<sup>24</sup> Via qararaa Kotiva kihao, Vakaqaa vo aantau vo aantauvano qaí vaiqio vihao nuaie. Suvu vakeo aantauave, qaasau aantauve, koventive, memauve, aiqava aantauvahivano vo aantau vo aantauvano vakaqaa nuaie, kio. Minki kuvo Kotiva kunte io vi ahasava vi ahasava qovaama vio vaua.

<sup>25</sup> Kotiva qaasau aantau, vo aantau vo aantau auku seo, suvu vako aantaua, vo aantau vo aantauvaka auku seo, memauve koventive vo ahasa vo ahasavaka auku seo, vakoa. Kotiva kavovo nai auku seo vako ahasava soqe io vaua.

<sup>26</sup> Minkima vuvo Kotiva kihao, saiqe kenkanavu voqaama vaiinki auku saaiio vi vaiinkiva vaihao noa namaíqi vaina hampusaqaave, naauaini akaqi ni vaina uviiqaave, vakaini suvu vaina aantauqaave, qaasau aantauqaave, aiqava vi aantaua vi aantauaqaqaa raqisiaie, kio.

<sup>27</sup> Minki kivaseo Kotiva vaiinki via nai voqaama auku seo. Kotiva nai voqaama qorainkivaka nahentivaka auku seo vakoa.

<sup>28</sup> Kotiva vikantaa quahama nimikeo kihao, Nekanta vaihama vainki suvuaramaí vivo airiqihama nikanta vainkiqaima vakamaaka mpiqa saake. Ke nikanta noaiqama saai noa namaíqi vai hampusaqaave, naauaini aka vareo nina uviiqaave, aiqava vakaqaa vaina aantauqaave, nekanta visaqaa raqisiqi vuake, kio.

<sup>29</sup> Kotiva minki kivaseo qaiqaa kihao, Aiqava ahasavano iraaína kavaave, aiqava sakaivano iraaína kavaave, ke vi ahasaa nikanta nimiaio nikanta ntarraqaima varianarove.

<sup>30</sup> Aiqava aantauvahivano vakaqaa vaiavave, aiqava aantauvano naauaini vaiavave, aiqava memau koventivano vakaqaa vaiavave, visa ntara vaieva aiqava sakai mareve usaave vusanaa vainaa, vi ahasaa vi ahasaa visa ntarama varianarove, kio. Minki kuvo Kotiva kunte io vaua.

<sup>31</sup> Kotiva aiqava ahasa nai auku seo vako ahasaa kavovo voqama seo soqe io vaua. Entamaqio vivio aakika vuvo vi entava sauqu hiniu io hini sauquni vohaiqa enta kaiqa vua.

## 2

<sup>1</sup> Minkuma seo Kotiva naauavata vakavaka aiqava ahasavaka auku vuu kaiqa soa.

### 7 Enta

<sup>2</sup> Kotiva sauqu hiniu io hini sauquni vohaiqa enta saiqa vaaqio vihao aiqava ahasa auku vuu kaiqa seo. Vuu kaiqa seoa kio, via qararaa 7 entaqaa sa saiqa vararaio, noa horiaa vaua.

<sup>3</sup> Kotiva saiqa vaaqio vihao aiqava ahasa vuu kaiqa seo 7 entaqaa noa horiaa vauvaa kio, viva vi entaa 7 enta soqema amikeo, maa entava aahuva enta horiaa entama varianarove, kua.

<sup>4</sup> Naauavata vakavaka auku so osarava minkima vaua.

### Ideni vakaini

Noavano Kotiva naauavata vakavaka auku soa.

<sup>5</sup> Ho hoqareo vi entaa Noavano Kotiva sa aaqu akikovo kio, sa vusanaa vau ahasava vuvo sa suvu voqavaka qampiqovo sa vaka auvu ntuva saaiava vuvo

<sup>6</sup> vakaqinkainaa namaivanogaí qovaama vio aiqava vaka pukaiqama sehao vaua.

<sup>7</sup> Minkima vuvo Noavano Kotiva vaka vaaseo vaiinki auku seo nai qaí vaiqio vuaina aihoa via aiqiana vuaqa sovo vaiinkivano qaí vaiqio vi vaua.

<sup>8</sup> Vaiinkivano minkima seo qaí vaiqio vuvo Noavano Kotiva nai aukuko vaiinkia via vika vareo suaivano uinaini Ideni vakaini nai naaho ukukoaqi vuu soa.

<sup>9</sup> Vi naahoaqi Noavano Kotiva kuvo soqe sakai vo sakai vo sakaivano qampiqeo vuvo via kava vaieva soqe sakai kava, ne kavava vaua.

Naaho avukaqi sakai kaaraqanta vaua. Sakai vovano qaí vaie u sakaiva vuvo sakai vovano soqe saiqaave manta saiqaave kavare u sakaiva vaua.

<sup>10</sup> Ideni vakaqinkaio namai vo qovaama vio vi naaho pukaiqama saaiia namaiva vaihao oku vihao naahoqaankaio namaivano nkahivio kaaraqanta kaaraqantaqaa oku vua.

<sup>11</sup> Vi namaiva nkahivio hoqarenaa namai auku vaieva Pisoni Namai vaua. Pisoni Namaivano oku vihao Havila vakaqi virante airantemaqio vua.

<sup>12</sup> Havila vakaini soqe *kora* oi vauvo soqe nunka u ahasavavaka vauvo vaiinkivano vaakaiqi vau oiva soqe oivaka vaua.

<sup>13</sup> Hoqarenaa namai auku Pisoni Namai vauvo via naankiara namai vo via auku vaieva Gihoni Namai vaua. Gihoni Namai Kusi vakaqi virante airantemaqio oku vio oku vi vaua.

<sup>14</sup> Namai kaaraqanta minkima vi vauvo namai auku vo vaieva Taigarisi Namaivano vaua. Taigarisi Namai Asiria vakaqi suai ui vankaraini oku vi vaua. Namai kaaramonavu minkima vauvo vinavusa naankiara namai auku vo vaieva Iufarekisi Namai vaua.

<sup>15</sup> Noavano Kotiva vaiinki via vika vareo nai naahoqi Ideni vakaini vuu seo kihao, Maaqi vaihaama saiqa varehaama soqema sea ki naahoqaa raqisiane, kio.

<sup>16</sup> Minki kivaseo Noavano Kotiva mpeqaiqama seo vaiinki via kiva amio kihao, Aiqaava sakai kava irainaa homa hiqi sea nehaama ninaave.

<sup>17</sup> Sakai vo soqe saiqa vaka manta saiqa vaka kavare i sakaia, vi sakaia kavaqaima sa naane. Ke qioma vake uo. Ae via nea are qukuma vinaave, kua.

<sup>18</sup> Noavano Kotiva kihao, vaiinki viva nariaraa vaivo sama soqe ivo. saiqe ke via saihaqiainaa nai voqaama vo auku amikaae, kio.

<sup>19</sup> Noavano Kotiva minki kivaseo vaka vaa seo vakaqonkaio aiqava aantauvahi vakaqaa nusa auku seo, aiqava aantau naauaini nusavaka auku seo, visa visa ntika vareo vaiinki viva visa nuku vakaee kio, viva vaunaini vuu sovo vaiinki viva vi aantaua vi aantaua auku vakovo vaiinki viva kuntema seo visa nuku vaieva minkima vaua.

<sup>20</sup> Vaiinki viva visa nuku vakaqio vihao aiqava vakaini suvu vau aantauave, qaasau aantauve, aiqava naauaini vii ntaka akaqio nu aantauave, viva aiqava visa visa nuku vakao. Vaiinki viva minkimaqio vuvo sa visaqinkaio vaiinki nai voqaava via saihaqiava vaua.

<sup>21</sup> Nai voqaava via saihaqiava sa vauvoa kio, Noavano Kotiva vaiinki via vaika sovo vaika aavaka vuvo vaiinki via aantea vonku nkaqu seo maki qaiqaa kinka koa.

<sup>22</sup> Noavano Kotiva aantea vaiinki qinkaio nkaqu soa viaqo nahenki auku seo nahenki via vika vareo vaiinki viva vaunaini vuu sovo

<sup>23</sup> vaiinki viva via kaveo kihao,

Hove, viva ki voqaavama vaio ivo.

Via vuhaai ki vuhaai vohaqaamama vaio ivo.

Via makivaka ki makivaka vohaqaamama vaio ivo.

Viva ki vaiinkiqaankaio vaa saiaa ki,

ke viala nahenkive ki uo, kio.

Minki kivaseo kuama.

<sup>24</sup> Kotiva minkima auku amikooa kio, vake maa entaa vaiinkivano nai nosa qosa mini seo nai naakantio qampama vivo vikanta vaaka vaieva vohaa vaakaqaima vaio.

<sup>25</sup> Vaiinki vivavaka via naakavanovaka vauvo vikanta ukavaaqa sa vaumanka kosa vaihama sa sauiha vaua.

### 3

#### *Vaiinkivano Kotia uva raqa soa*

<sup>1</sup> Noavano Kotiva aiqava aantau auku seo vakaqinkaio memaavano voqama seo uqeraa uva ki vauva vaihao nahenkiaa kihao, Quqaae Kotiva nikanta qio kivakehao aiqava sakai kava maa naahoqi irainaa sa naake kiva kaiave? kio.

<sup>2</sup> Minki kuvo nahenki viva memauaa kihao, Kekanta aiqava sakai kava maa naahoqi irainaa homa naraave.

<sup>3</sup> Naaho avukaini vai sakaia vohaiqa via kavaqaima Kotiva kikantaa kihao, Sa naake, sa uku varaake. Nekanta vi kavaa uku vare namase quku vivaave, kiva kaiave, kio.

<sup>4</sup> Minki kuvo memaavano nahenkiaa kihao, Aqao, nekanta sama quku vivaave.

<sup>5</sup> Nekanta nama saivo nikanta avu aako kenko kiana nekanta soqe saiqa vaka manta saiqa vaka ho kavehama vaiqa voqaama vaivaave. Kotiva viala iihao nikantaa sa naake kiva kaiave, kio.

<sup>6</sup> Memaavano minki kuvo nahenkivano vi sakaia kavovo soqe sakai kava irakovo saiqa aiqava saiqa ho kavaae kivaseo sakai via kava hiqi seo neo. Nehaoma hini nai vaakivaka amio. Amuvoma vivavaka neo

<sup>7</sup> vikanta nama sovo vikanta aako kenko kumanka naikanta vaaka kavovo kosama vaumanka sauiha vikanta ou maua raqase irase rumpake vaua.

<sup>8</sup> Vikanta vaiha iuvo eroaqi Noavano Kotiva vi naahoqi kuvu ni vaumanka vikanta ou sakai avukaini quqekavi viaqi vauvoma

<sup>9</sup> Noavano Kotiva vaiinki via aareo kihao, Ae kaaqie variarao? kio.

<sup>10</sup> Minki kuvo vaiinki viva kihao, Ae naahoqi kuvu nihaama kunkusai kiana iima ke kosa vaihaa kima, qeke maini ani quqekavi vai uo, kio.

<sup>11</sup> Vaiinki viva minki kuvo Kotiva kihao, Kavave ai vaakaa kosama vaio ivo kivaae are qugeka vuarao? Ke qio kivakauna sakai kavaae are nama saarao? kio.

<sup>12</sup> Minki kuvo vaiinki viva kihao, Ae nahenki ki kimiavama, vivama sakai kava hiqi seo kivaka kimimanka ne uo, kio.

<sup>13</sup> Minki kuvo Noavano Kotiva nahenkiaa kihao, Ae nanaiqamae varaarao? kuvo nahenki viva kihao, Aqao, memaavano kiriaro una uva kimanka ke sakai kava hiqise ne uo, kio.

<sup>14</sup> Minki kuvo Noavano Kotiva memauaa kihao,  
Ae una uva kinaa saara are aiqava aantavahihiqinkaia mantaiqama vinaave.  
Via saara are konkoma ntaka vaihaama auhanaihaiaqaima ninaave.  
Minkimaqia nihaama konkoma namaqia vihaama guku vinaave.

<sup>15</sup> Ae suvuara iavavaka nahenkivano suvuara iavavaka vikanta navukaiqiha vaiqi vivaave.  
Naankiara nahenkivano suvuara iava vovano ai qiaka rakavu saiaa are via aiqo akaa nkaqa senaave, kio.

<sup>16</sup> Minki kivaseo Kotiva nahenkiaa kihao,  
Ai voqama seo aiha vi vaiaa vainki vakaqi vinaave.  
Are vainki vakaqi vio aiha vi vaiaama vakenaave.

Ai antuqavano ai vaakiaro vaio viva aiqaa raqisiqio vuaie, kio.

<sup>17</sup> Minki kivaseo Kotiva vaiinkiaa kihao, Are nena naaka uva ihaama ke qio kivakauna sakai kavaa nama saarao kio, via saara vakavano mantaiqama vuanarove.  
Are vakaini vaiqia vina entaama vusaai ukihaama ntara uku namaqia vinaave.

<sup>18</sup> Numii vankusavano uisuma vi vaiaa are ahasaqi ntaravano qampiqainaqaqi namaqia vinaave.

<sup>19</sup> Ai koqaavu nte vaiaa ntara uku namaqia vivia vuu guku via qaiqaa qoqaraanini vakaqi vinaave.

Ke vakaqonkai ai kaaqau kauaa variaavave.  
Are guku viama qaiqama vakaiqama vinaave, kio.  
Minki kua.

<sup>20</sup> Nahenkivano aiqava vo vakanaa vo vakanaasa visa nova variaiaa vauaa kio, vaiinki viva nai naaka auku ntehao Evaave, kua.

<sup>21</sup> Noavano Kotiva aantau paka vaaseo viaqonkaio ukavaaqa auku seo vaiinkivaka via naakavaka nimumanka vikanta via aankaumake vaua.

*Noavano Kotiva vaiinkivaka nahentivaka naahoqinkaio aaqaini nikikama soa*

<sup>22</sup> Noavano Kotiva kihao, Ho kavaane. Vaiinkivano kinavu voqaiqama vio vaihao soqe saiqaavaka manta saiqaavaka kave vaiva vaio ivo. Viva nai sauqu kukuseo vo sakai kava, qaqi vaiqio vuaina sakai kavaa hiqi seo nama seo aiqava enta qaqi vaiqio vuantu, kio.

<sup>23</sup> Minki kivaseo Noavano Kotiva vaiinkiaa kihao, Ke ai vakaqonkai kaaqau kauava are aaqaini vaihaa vakaqai auvu ntuvaqia vinaave, kivaseo Ideni naahoqinkaio akikama sovo aaqaini vuama.

<sup>24</sup> Noavano Kotiva vaiinkivaka nahentivaka vikanta nikikama somanka aaqaini vuvo Ideni naaho hini vankaraini suai avu uunaini vinavusa maintaraa raqisiake kio, enseli mpeqanavu mini somanka vaua. Qaqi vaiqio vuaina sakai kavaa vaiinkivano hiqi seo naanto kumanka vinavusa mini maintaraa raqisiha vuvo iha iko saavuvavaka aea aea ihao mini vaua.

## 4

*Keniva Abelía aru soa*

<sup>1</sup> Adaamuva nai naaka Evaasantio ni vauvoma Evaava vainki kaiqama vio vuu qorainki vainki vakaseo via auku ntehao, Keniave, kio. Viva kihao, Noavano Kotiva ki saihaqimanka ke qorainki vainki vakaseo uo, kio.

<sup>2</sup> Minki kuvo via vainkivano nouqama vuvo qaiqaa vainki kaiqama vio vuu via qaka Abelía vakaseo. Abelía via vakasovo nouqama vio Abeliva viva sipisipiqaqaa raqisi vuvo via vasaava Keniva naaho saiqa vaehao vaua.

<sup>3</sup> Minkimaqi vikanta viha Keniva nai naahoqinkaio ntara qantu vareo vuu Noa Kotia amikeo.

<sup>4</sup> Amikovo Abeliva nai sipisipi vovano hoqare vakako naakia vonku aru seo via keqa seo maki soqera vareo vuu Kotia amikoa. Vikanta minkimaseo Noa Kotia amikovo Noavano Kotiva Abelía quahama amikeo, Abeliva sipisipi aru amikoa viavaka quahama amikeo,

<sup>5</sup> Keniavaka, Keniva ntara amikoavaka, sa Noavano Kotiva quahama amikeo. Sa quahama amikovo via saara Kenia araro ikovo ua vii arakeo komaseo vaura.

<sup>6</sup> Keniva ua vii arakeo komaseo vauvo Noavano Kotiva Keniaa kihao, Nana saarae ai arara ikaivaa variarao? Nana saarae are ua vii arakea variarao?

<sup>7</sup> Are soqe saiqe varaiea, ke homa ai quaha amikaraave. Are sa soqe saiqa varaiea, manta saiqavano qentiana vaara aukuke vaihao ai ravaaqau saanaove. Manta saiqavano ai ravaaqavu saantoa, are mpeqaiqama sea manta saiqa aakara saane, kio.

<sup>8</sup> Noavano Kotiva minki kuvo Keniva sa via uva iiaio vaio nai qakaa kihao, Varaiqekanta qaqi aaraini ou nuae, kivaseo nai qaka vika vareo vio vuu Keniva nai qaka Abelia ahasaqa aru seo.

<sup>9</sup> Aru sovoma Noavano Kotiva Kenia ireo kihao, Ai qakavano Abeliva kankoe vaio ivo? kio. Minki kuvoma Keniva kihao, Ke sama via kave uo. Sa ke kenka qakaqaa raqisi vauausavauve, kio.

<sup>10</sup> Minki kuvo Noavano Kotiva kihao, Are nana ahasae varaarao? Ke kavauo ai qaka naarevano vakaqaa hiqintivea ke are nena qaka aru saanaa saara

<sup>11</sup> ai mantaiqama amikareave. Are nena qaka aru saarao via naarevano ntehao vakaqi okiqekaaia saara vakavano sama ho ai saihaqianaove.

<sup>12</sup> Are ntara uku keava sama soqema seo qampiqaanaove. Are sa vohaa vakaqaa ho vainaave. Are saku vareo hampiqama sea vo vaka vo vakaqaa vaiqia vinaave, kio.

<sup>13</sup> Noavano Kotiva minki kuvo Keniva kihao, Oho, are noaiqama sea ki kikiavea ke via saara sa ho qaqi vaiave.

<sup>14</sup> Are maa vakaqaankaia ki kikikavea ke sa ai avuqaa ho vaiave. Ke saku vareo vo vaka vo vakaqaa hampiqamavi ni variaiao vo vaiinkivano ki ranta saaiava ki haru saanarove, kio.

<sup>15</sup> Keniva minki kuvo Noavano Kotiva aqao kio. Save, vovano ai aru saiea, ke vaiinki 7 navu aruse aiqaa vuntu saraave, kio. Minki kivaseo vovano Kenia ranta seo via aru saanto kio, Noavano Kotiva vira vaakaqaa vusa voqaama qara ntuva koa.

<sup>16</sup> Minkia sovo Keniva Kotia avuqaankaio saku vareo Ideni vakaihaio suai avu uunton-aini, Noti vakaini vaieva vuama...

## 37

### *Iosepeva kaira kavoa*

<sup>1</sup> Kanaha vakaini nai qova vaiqi vu vakaraqaa Iakovovavaka vi vakaaqaa vaiqi vua.

<sup>2</sup> Iakovoa vaiktinavu uva maankimama vaio: Iosepeva qaraasa vaiinkivano 17 ihi vaaseo vaihao nai vasausavaanavu hampaka vaihao sipisipiqaavaka, mimiqaavaka, raqisi vaua. Via qoa naakakanta Bilihaasa Siripaasa vaiktinavu hampaka vi quararaqaa raqisio viaqaankaio Iosepeva vuu nai qoa kiva amio kihao, Ki vasausavaanavu manta saiqaqaima vareo variavo, kio.

<sup>3</sup> Via qova Iakovova via vo aukua Isiraiva, viva sontaiqama vuvu Iosepea vaka kovaa kio, viva aiqava nai vainkinavuqinkaio Iosepeaa voqama seo antuqa auvo vaihao viaa quahetao suaharavano via aruanto kio, vaaqa soqera aukua seo via amio.

<sup>4</sup> Via qova vaaqa soqera Iosepea aukua amumanka via vasausavaanavu vaaqa via kave kiha, Oho, kinavu qova Iosepeaaqai antuqa aivaro vaio ivo, kivaseo visa via saara Iosepeaa nirara ikomanka vaiha sa vaa soqe uva kiai, via koma amikoa.

<sup>5</sup> Vika minki vauvo vo enta Iosepeva kaira kavoa viaqaankaio kaira kavoa viva nai vasausavaanavu kiva nimumanka via saara via vasausavaanavu Iosepeaa voqama seo nirara ikomanka vaua.

<sup>6</sup> Iosepeva visaa kihao, Saiqe ke kenka kaira kavaaina osaraa ni kiva nimiaa.

<sup>7</sup> Kenavu naahoqi uiti rumpaseo vauo viaqaankaio ke uiti rumpa kauava himpi vaaviarama vio vaimanka nenavu uiti rumpa kaasa visa ke rumpa kaunaa ukukumavi vaiha ke uiti rumpa kaunaa quaha amikeha ravenkavi variaave, kio.

<sup>8</sup> Iosepeva minki kumanka via vasausavaanavu kiha, Oho, are manta kairahaama kavaarao. Are vi kairaa kavaanaa ihaama are kihaa, Ke visaaqaa raqisieave, kioave, ki. Minki kivaseo visa Iosepeva kaira kavoa saaravaka, Iosepeva visaa ku vuvaa saaravaka, visa Iosepeaa voqama seo nirara ikomanka vaua.

<sup>9</sup> Minkima vauvo Iosepeva qaiqaa kaira vo kavoeo nai vasausavaanavuaa kihao, Ke qaiqaa kaira vo kave uo. Ke vaiha kavauamanka suaivanovaka, koravanovaka, masau ovuroa 11 navuvanovaka, vinavusa ravenkavi vaiha ki quahama kimike vaiavo, kio.

<sup>10</sup> Iosepeva vinavusa kiva nimio viaqaankaio nai kaira kavooa nai qoavaka kiva amuvo via qova Iosepea akihao kihao, Oho, are manta kairahaama kavaarao. Are kaira kavaanaa ihaa kihaa ki novavaka ki vasausavaanavuvaka ki qovavaka ravenkavi vaiha ki quahama kimikevaave kioave, kio.



<sup>11</sup> Minki kumanka Iosepea vasausavaanavu via saara nirara ikomanka Iosepea koma amike vauvo via qova vi uvaa iiqio vihao aako ukihao vaua.

*Iosepea vasausavaanavu Iosepea vo vakanaasa nimiha soqaa varoa*

<sup>12</sup> Vo enta Iosepea vasausavaanavu visa nái goa sipisipi vika vare Sekemini ou vaiha sipisipiqaa raqisi vauvo

<sup>13</sup> Iakovova Iosepeaa kihao, Are nena vasausavaanavu sipisipiqaa raqisinaini Sekemini vuane, kio.

Minki kuvo Iosepeva kihao, Ke mini viea henuqamase vai uo, kio.

<sup>14</sup> Minki kuvo via qova kihao, Ai vasausavaanavu hoe variavo, sae ho variavo? Are visa ou kavea vii ki kiva kimiane, kio. Minki kivaseo via qova Iosepea akikovo viva Hebaroni kaaqi ntaka vua.

<sup>15</sup> Iosepeva ou vio Sekemini ou nteo nai vasausavaanavuaa qumina rantehao vi ani vauvo vo vaiinkivano via kaveo kihao, Nana ahasaae rante variarao? kio.

<sup>16</sup> Minki kuvo Iosepeva kihao, Ke kenka vasausavaanavu sipisipiqaa raqisiasaama rante vai uo. Are visa vuanainiaa iianaave? kio.

<sup>17</sup> Iosepeva minki kuvo vaiinki viva kihao, Visa vaasama maihai vuavo. Ke iua visa kiha, Dotaani kaaqi ntaka vieave, kiaave, kio. Minki kuvo Iosepeva nai vasausavaanavu ntakaqio vio Dokaanini ou nteo kavomanka visa mini vaua.

<sup>18</sup> Iosepeva aumanko ou ntomanka via vasausavaanavu vukuni vuku via kave visa via arusea nai kiva ami nai kiva amiha vaua.

<sup>19</sup> Visa kiha, Oho, kaira kave vai vaiinkiva ani vaio ivo.

<sup>20</sup> Saiqe kenavu via aruse namaiaa vaka quvukaavo aaharaiqama viaqi via vaaka vaavi aqo saae. Kenavu via vaaka viaqi aquse viaa qasau vairivano aru seo ivo kiae. Kenavu minkiaio viva kaira kavaiava quqaae varianaroe, sae quqaa vi vaua varianarove? kinka.

<sup>21</sup> Visa hini usa minki kuvo Rubeniva visa uva iio visa Iosepea arusevoave kivaseo visaa aqao kio, Saiqe kenavu sa via arusaae.

<sup>22</sup> Kenavu sa via arusarai namaiaa vaka quvukaavo aaharaiqama viaqi via qaqi aqusaae, kio. Viva visaa minki kivaseo viva nai iiseo kihao, Ke naankiara via ruaruamase vi-aqaankai nai qova vainaini vika vare vuu saraave, kio.

<sup>23</sup> Rubeniva minki kumanka visa vauvo Iosepeva ani ntomanka visa via ravaaqause via vaaqa soqera via vaakaqaankai ravaqaase qaqini se

<sup>24</sup> Iosepea vikavaare munku haau namaiaa quvukovo aaharaiqama vuaqi via aqusoa.

<sup>25</sup> Visa Iosepea viaqi aquse viaqaankai visa ntara naesa oquvi vaiha vukuni vuku kavomanka Isamaia vakanaasa Gileaati vakusaihai ani vaua. Vi vakanaasa airi aiaia soqe untavu ahasaave, ntaraga hiasaa u ahasaa aakakoave, vi ahasaa vi ahasaa visa nái kameriqaa rumpa vare Isipini vuu nimiha soqaa varaesa ani vaua.

<sup>26</sup> Ani vauvo Iutiva nai qaka vasausaa kihao, Kenavu kenkanavu qaka aruse via arusaainaa uva quqeka saainaaqaankaio sa kinavu saihaqiaina ahasava qovaama ianaove.

<sup>27</sup> Saiqe sa kenkanavu sauquqonkai Iosepea airai vaiai, Isamaia vakanaasa aniqe via visa nimiai visa soqaa kinavu kimiake. Kenavuvaka vivavaka vohaa vaiinkima vai uo. Kenavu via aru saaoave, kio. Iutiva minki kumanka via qaka vasausa hove kumanka

<sup>28</sup> Isamaia vakanaasave Midiani vakanaasave, visa anumanka Iosepea vasausavaanavu namaiaa quvukoqi via aqu soaqinkai via qaqini vaa vaaise, Isamaia vakanaasa Iosepea nimihama 20 *silva* munima varomanta vi vakanaasa Iosepea vika vare vuu Isipini soa.

<sup>29</sup> Vi vakanaasa Iosepea vika vare vuvu Rubeniva ounteo namaiaa quvukoqi ani kavovo Iosepea viaqi sa vauvo via saara via munkusa mantaiquvo oho kivaseo nai ukakaai nahaqu seo

<sup>30</sup> ou nai qakanavuaa kihao, Ke kavauo Iosepeva sa viaqi vaio ivo. Oho ke nankie iaave? kio.

<sup>31</sup> Minki kumanka vinavusa Iosepea vaaqa qaqini rahunku soa vare mimi vo aruse Iosepea vaaqa mimi naare viaqi quntamase vare

<sup>32</sup> anirante visa vuu nái goa umiqeha kiha, Kenavu maa ahasaa ranta saunaa are aikukiha kavaane. Iosepea vaaqae vo vaiinki vaaqae vaio ivo? kinka.

<sup>33</sup> Vinavusa minki kuvo visa qova Iosepea vaaqa uquuama seo kaveo kihao, Oho, maa ki maaqu Iosepea vaaqave. Qaasau vairi vovano via aruseo nama seo ivo. Quqama qaasau vairivano via aruseo via vaaka keqaqama seo ivo, kio.

<sup>34</sup> Iakovova minki kivaseo nai ukakaai nahaqu naahaquma seo manta ukakaaiqi ankaumasero airi enta vaiqio vihao nai maaquaa iqi rakaqio vi vaua.

<sup>35</sup> Via maaqu hini usavaka via raavuanavuvaka via munkusa susuqama amikaae kuvo Iakovova sa visa ku uvaa iio. Viva aqao kio, Ke kenka maaquaa iihama qaqi iqi rakaqi vivi vuu quku viaave, kivaseo nai maaquaa iqi rakaqio vi vaua.

<sup>36</sup> Mintuvo Midiani vakanaasave Isamaia vakanaasave, visa Iosepea vika vare Isipini ou vaiha Iosepea Potipaa amihama munima varoa. Potipaava noa vaiinkivano vaihao viva iqosa vaiinkinavuqaa raqisi vaumanka visa Pero vaiinki naavu noa naavuqaa raqisi vaua...

## 39

### *Iosepeva Potipaa saiqa varoa*

<sup>1</sup> Isamaia vakanaasa Iosepea vika vare Isipini ou vuvu mihainaa vaiinki vovano Potipaava visa munima nimihaio Iosepea varoa. Potipaava noa auku vakaa vaiinkiva iqosa vaiinkinavuqaa raqisi vaumanka visa Pero vaiinki naavu noa naavuqaa maintaraa raqisi vaua.

<sup>2</sup> Isipi vakanaa vaiinkivano munima aquseo Iosepea varovo Iosepeva Potipaa saiqa vaehao via naavuqi vauvo Noavano Kotiva Iosepea sahaiquvo Iosepea saiqavano soqe saiqa vaua.

<sup>3</sup> Iosepeva soqe saiqa vare vauvo Potipaava kavovo Noavano Kotiva Iosepea sahaiquvoa kio, Iosepea saiqavano uikareo vauvo

<sup>4</sup> Potipaava Iosepeaa quahaseo via noaiqama seo kihao, Are ki naavuqi saiqa varehaama aiqava ki saiqa ahasaqaa raqisiane, kio.

<sup>5</sup> Potipaava minki kivaseo Iosepea noaiqama sovo Iosepeva aiqava via saiqaqaa raqisi vauvo vi entaaqaankaio Noavano Kotiva Iosepeaa iihao Potipaa soqema amikovo Potipaava ntara ukukovave, soqaa saiqa varoave, soqe io vaua.

<sup>6</sup> Minkima vauvo Potipaava Iosepeaa kihao, Are aiqava ki saiqaqaa raqisiqia vuane, kuvo Iosepeva aiqava via saiqaqaa raqisiqio vi vauvo Potipaava sa nai saiqaqaa airi aako iiaio, homa Iosepeva vi saiqaqaa varaanaove kihao viva qaqi vaihao ntaaraqai nehao vaua.

Minkimaqio vuvu Iosepeva soqe vii vaaka vakaa vaiinkivano vaihao Potipaa saiqaqaa raqisi vauvo

<sup>7</sup> viaqaankaio Potipaa naakavano Iosepea kavovo munkusa ntuvo viaa avu akihao Iosepeaa kihao, ania kintia vaikaane, kio.

<sup>8</sup> Minki kuvo Iosepeva aqao kio, Ke maa naavuqi vaiha via saiqaqaa raqisi vauoa kio, ki noa vaiinkivano Potipaava sa maa saiqaraa airi aako iivo. Viva ki noaiqama saimanka ke aiqava via saiqa ahasaqaa raqisi vai uo.

<sup>9</sup> Ke via aana ntavavi sema maaqi vaiha via saiqaqaa raqisi vai uo. Potipaava sa vo ahasa ki qioma kiva keo ivo. Are via naakavano variaaroa kio, viva ariaraqai iihaoma ki qioma kiva keo ivo. Via saara ke manta saiqa vaeha Kotia uva raqa saaoave, kio.

<sup>10</sup> Iosepeva minki kuvo vi nahenkiva vo enta vo enta Iosepea aare vauvo Iosepeva sa via uva iiaio, sa viva vaunaini ou vaua.

<sup>11</sup> Vo enta sa vi naavuqi saiqa vaiinkie saiqa nahenkie vonavu vauvo Iosepeva naavuqi saiqa vaaeva oiqekovo

<sup>12</sup> Potipaa naakavano Iosepeva vaaqa ruvukoa ukukeo kihao, Are kintia vaikaane, kuvo Iosepeva nai vaaqa viqueo vi nahenkia sauquqi via mini seo vahaqaqini veva nteo santama vua.

<sup>13</sup> Iosepeva santama vuvu vi nahenkiva kavovo Iosepeva nai vaaqa via sauquqi seo naavuginkaio santama vuvu

<sup>14</sup> vi nahenkia voqama seo arara ikovo naavuqi saiqa varosa naarama seo visaa kihao, Ho kavaake. Ki vaakivano Hiparu vakanaa vaiinki maa vika vareo kinavu naavuqi vii saivama, viva ki mantaigama kimikaeva auki vaio ivo. Viva maaqi oiqekeo kintio nuae kimanka ke oi aai kuaoma

<sup>15</sup> viva ke oi aai kunaa iio qekeo nai vaaqa maini seoma aiqau aukuseo vahaqaqini veva nteo santama vivo, kio.

<sup>16</sup> Minki kivaseo Iosepea vaaqa qaqi vakeo nai vaaki vesa vauvo Potipaava via vaakivano anuvo

<sup>17</sup> viva vaaqa via nai vaaki umiqehao kihao, Hiparu vakanaa saiqa vaiinki vika vii saarava, vivama ki mantaigama kimikaeva auki vaio ivo.

<sup>18</sup> Viva ani ki uku varaimanta ke oi aai kuaoma viva qekeo nai vaaquka maini seo naavuginkaio veva nteo santama vivo, kio.

<sup>19</sup> Via naakavano una uva minki kuvo Iosepea noa vaiinkivano Potipaava nai naaka uvaa quqaa uvave kio via arara ikovo

<sup>20</sup> ou Iosepea ravaaqau vareo karavusaqi vuu soa. Vi naavuqi Pero vaiinki uva raqaso vaiinkisa vaaqi Iosepea karavusa amikovo Iosepevavaka viaqi vaua.

<sup>21</sup> Viaqi vauvo Noavano Kotiva via saihaqi vauvoma kio, karavusa naavuqaa raqisu vaiinkiva Iosepea soqema amikoa.

<sup>22</sup> Karavusa naavuqaa raqisu vaiinkiva Iosepea quahehao via noaiqama seo aiqava karavusa vaiinikiqaa raqisiane kio.

<sup>23</sup> Minki kuvo Iosepeva vi saiqaa vare vauvo Noavano Kotiva via sahaiquvo Iosepea saiqavano uikarovo karavusa naavuqaa raqisu vaiinkiva sa Iosepea saiqaa airi aako iiaio, viva Iosepea kihao, Viva nai homa vaihao vi saiqaa varaanarove, kivasehao vaua.

## 40

### *Iosepeva vo vaiintikanta kaira kavoa via osara naikanta kiva nimua*

<sup>1-3</sup> Iosepeva karavusa naavuqi vaiqio vuvo vo enta Isipi vakanaasa kave vakaava Pero vaiinkivano nai saiqa vaa amiko vaiinki vokanta vo uva saara vikanta karavusa nimikoa. Via saiqa vaiinki vovano Pero vaiinki namai amu vaiinkiva vauvo via saiqa vaiinki vovano Pero vaiinki mpereti nunke vau vaiinkiva vaua. Pero vaiinkivano vikanta karavusa nimikovo Iosepeva karavusa naavuqi vaumanka vikantavaka viaqi ou vaua.

<sup>4</sup> Pero vaiinki naavuqaa maintaraa raqisu vaiinkisaqaa raqisuva vi naavuaqaavaka raqisihao Iosepea kihao, Are qaraasa vaiinkikantaqaavaka raqisiane, kuvo Iosepeva vi vaiinkikantaqaavaka raqisi vaua.

Minkima seo raqisi vaumanka vikanta karavusa naavuqi vaiqi vuvoma airi enta aikaromanka

<sup>5</sup> Pero vaiinki namai amu vaiinkivavaka, Pero vaiinki mpereti nunke vau vaiinkivavaka, vikanta vohaa enta entaqi vaikeha kaira kavoa. Vovano vo kaira kavovo vovano vo kaira kavoa.

<sup>6</sup> Vikanta kaira kavovo via qararaa koqaqi Iosepeva vikanta vaua ou nteo kavovo vikanta munkusavano mantaiqumanka viaqi vaua.

<sup>7</sup> Vikanta munkusavano mantaiqumanka vauvo Iosepeva vikanta ireo kihao, Nekanta nana saarae ua vii arake variavo? kio.

<sup>8</sup> Minki kumanka vikanta kiha, Kekanta entaqi kaira kavaunaa sa via osara ii uo. Kaira osara kikanta kiva kimiaiaava sa maini vaio ivo, kinka. Vikanta minki kuvo Iosepeva kihao, Kotiva vaiinki saihaqvoma viva kaira osara ho iiave. Nekanta kaira kavea ki kiva kimiqe iriae, kio.

<sup>9</sup> Iosepeva minki kuvo Pero vaiinki namai amu vaiinkiva viva naane nai kaira kavoa Iosepea kiva amio kihao, Ke vaikeha kaira kavauo ki kivuqaa uaini santavano vaiave.

<sup>10</sup> Vi santava qampiqehao vaimanka via saqi kaaraqanta vohaiqa vaiavo saqiqaankaio kava irakaivo aquika vimanka

<sup>11</sup> Ke kave via hiqise vi kavaa kakise vi namaira kapaqi vare vuu Pero vaiinki sauquqi ami uo, kio.

<sup>12</sup> Minki kuvo Iosepeva via nai kiva amio kihao, Are kaira kavaanaa via osara minkimama vaio ivo: Saqi kaaraqanta vohaiqa vaia kavaanaa via osara vaieva kaaramo entama vaio ivo.

<sup>13</sup> Enta kaaramonavu aikaraiaoma Pero vaiinkivano qaiqaa ai aarama saiaa are via saiqa varehaama haau vara vuu amianantema sea, qaiqaama are via kapa nai sauquqi vuu aminaave.

<sup>14</sup> Are qaiqaa soqemavi vaihaa Pero vaiinki saiqa varehaama kiriara kauru seoave. Are kiriara iisehaama kiriara Pero vaiinki kiva amiao viva ki karavusa naavuqinkai rahunku saai.

<sup>15</sup> Haau ke Hiparu vakanaa vaiinkivano kenka maaqaini variavau ki muara rarau vare maini anuave. Ke maini vaiha sa manta saiqa vararai variavauo qumina una uva saara ki karavusa naavuqi saimanka vai uo, kio.

<sup>16</sup> Iosepeva minki kuvo Pero vaiinki mpereti nunko vaiinkiva kavovo Iosepeva vo vaiinki kaira osara soqema seo kiva amuvo vivavaka Iosepea kiva amio kihao, Kevaka kaira vo kave uo. Ke kaaramo kanunavuqi mpereti ntuvase kenka qiakaqaa vaa aquvare ani uo.

<sup>17</sup> Ventaaqaaara vai kanuqi Pero vaiinkiaa nunka kauna mpereti, vo mpereti vo mpereti vaimanka uviinavu ani vi kanuqinkai mpereti varase ne variaave, kio.

<sup>18</sup> Minki kuvo Iosepeva vi vaiinkia nai kiva amio kihao, Are kaira kavaana osarava minkimama vaio ivo: Kanu kaaramonavu vaia via osara vaieva kaaramo entama vaio ivo.

<sup>19</sup> Kaaramo enta aikaraiao Pero vaiinkivano karavusa naavuqinkaio ai vikao ai aunta kegaseo ai vaaka sakaiqaa arukaiao uviivano ani ai vaaka maki nama saanarove, kio.

<sup>20</sup> Iosepeva minki kuvo enta kaaramonavu aikarovo Pero vaiinkivano kihao, Ki vakai entava qovaama vivo, kivaseo vi entaa quahehao nai sena noa vaiinki naarama seo ntara nimio karavusa naavuqinkaio viva nai saiqa vaiinkikanta via namai amu vaiinkivavaka,

via mpereti nunke vau vaiinkiaavaka, vikanta ntika vareo noa vaiinkinavu ntara nonaini vuu seo.

<sup>21</sup> Vuu mini seo via namai amu vaiinkiaa kihao, Are qaiqaa qaqi ki saiqa varenaave, kuvo vi vaiinkiva qaiqaa namai kapa Pero vaiinki sauquqi vakovo

<sup>22</sup> Pero vaiinkivano nai mpereti nunke vau vaiinkia aruseo Iosepeva kuntema seo, via vaaka sakaiqaa arukoa.

<sup>23</sup> Minki uvo Pero vaiinki namai amu vaiinkiva qaiqaa Pero vaiinki saiqa vaehao sa Iosepeaa iiaio, via kauru soa.

## 41

### *Pero vaiinkivano kaira kavoa*

<sup>1</sup> Iosepeva karavusa naavuqi qaqi vaiqio vuvo ihi kaaraqanta aikarovo Pero vaiinkivano entaqi vaikehao kaira kavoa. Viva kaira kavova maankimama vaio: Pero vaiinki maraquavano Nairi Namai hini vantaraini auhianta himpikao vaihao kavomanka

<sup>2</sup> vi namaiqinkai vurimakaua soqesa 7 navu qovaamavi namaiqinkai vaainte ou namai auhianta vaiha usau ne vaua. Vi vurimakauanavu soqe vaaka vakausa noa hauntivano vaiha usau ne vaua.

<sup>3</sup> Ne vaumanka via naankiara namaiqinkai vo vurimakaua 7 navu qovaama vua. Vinavusa sa vaakavaka vaua, vuhaiqai vaua namaiqinkai vaainte ou vurimakaua soqesa hampaka vaiha

<sup>4</sup> visa aruse nama soa. Minkuvo Pero vaiinkivano kaira via kaveo vaikonaihaio himpio.

<sup>5</sup> Pero vaiinkivano himpio viki vii kaveo qaiqaa vaika vio kaira vo kaveo. Viva kaira vo kavova maankimama vaio: Via maraquavano kavovo *sankuma* voqaama vauvo via vaha vohaiqaqaankaio noa 7 navu soqera irakeo mpeqaiqama vio vaua.

<sup>6</sup> Noa soqe 7 navu minkima vauvo via naankiara vo *sankuma* voqaama irakeo noa 7 navu irakovo suaivano noaiqamaseo ike vauvo uvaivano iha voqaama ukihao via kakoqa aqu sovo sa soqe kava irakoa.

<sup>7</sup> Sa soqe kava 7 navu irakova ou soqe kava 7 navu irakoa nampiqama soa. Minki uvo Pero vaiinkivano vaikonaihaio himpio kihao, Oho, ke kairama kave uo, kio.

<sup>8</sup> Minki kivaseo via qararaa koqaqi Pero vaiinkivano nai kaira kavoa saara aako ukihao vaihao Isipi vakanaa vaiinki vo osara vo osara kavosavaka, vaana saiqa vare vau vaiinkinavusavaka, visa naarama seo viva kaira kavoa visa kiva nimumanka visaqinkai sa vovano via kaira osara sankunka seo ho kiva amiaiava vaua.

<sup>9</sup> Visa sa Pero vaiinkivano kaira kavoa osara ho kiva amiai vauvo Pero vaiinki namai amu vaiinkiva oho kio, Ke vakeqai vo uva iike uo. Haau ke vi uvaa ai kiva amiaakara vaimanka sa ai kiva amunaave.

<sup>10</sup> Haau ai arara ikovaa are kivaka, vo vaiinkivano ai mpereti nunke vau vaiinkiaavaka, kikanta karavusa kimikomanka kekanta karavusa naavuqi variavaunaave. Ai naavuqaa maintaraa raqisi vaia vaiinkinavusaqaa raqisi vai vaiinkia naavuqi are kikanta karavusa kimikomanka

<sup>11</sup> kekanta viaqi vaiha vohaa enta entaqi vaikeha kaira kavaavaunaave. Ke vo kaira kavaavauo vo vaiinkivano vo kaira kavoa.

<sup>12</sup> Kekanta kaira kave sa via osara iiai variavauo Hiparu vakanaa vaiinkivanovaka karavusa naavuqi vauave. Vi vaiinkiva haau ai naavuqaa maintaraa raqisi vaia vaiinkisaqaa raqisi vai vaiinkia saiqa varoave. Vi vaiinkiva Hiparu vakanaa vaiinkivano kikanta hampaka karavusa naavuqi vaumanka kekanta kenkakanta kaira kavaavauna vi vaiinkia kiva amiaavauo viva ki kaira osara kinka sankunka kiva kimio vo vaiinki kaira osara viavaka nai sankunka seo kiva amuave.

<sup>13</sup> Ho viva kikanta kiva kimuntema sea are kiriara qaiqaa ki saiqa varaane kivasea, vo vaiinki via arusea sakaiqaa arukonaave, kio.

<sup>14</sup> Pero vaiinki namai amu vaiinkiva minki kuvo Pero vaiinkivano Iosepea aarama sovo vovano santeo karavusa naavuqinkaio via vika varovo Iosepeva osau nuquseo vo ukavaaqaa ankaumaseo ou Pero vaiinki aaqanko vaua.

<sup>15</sup> Iosepeva ou Pero vaiinki aaqanko vauvo Pero vaiinkivano viaa kihao, Ke kaira kave via osara vo vaiinki vo vaiinki iraua visa sa ki kaira osara ho kiva kimiavo. Vovano ariara kaira osara ho nai kiva nimi vaivave kimanka iunaave. Vi uvava quqaa vaio ivo, sae quqaa vaio ivo? kio.

<sup>16</sup> Pero vaiinkivano minki kuvo Iosepeva aqao kio, Ke qaqi vaiinkivano vaiha sa ho ai kiva amiaave. Kotiva ki saihaiqae ke homa via osara ai Pero vaiinki kiva amiaave, kio.

<sup>17</sup> Minki kuvo Pero vaiinkivano Iosepeaa kihao, Ke kaira kavauo ki maraquavano Nairi Namai hini vantaraini himpikao vaihao kavaimanka

<sup>18</sup> namaiqinkai vurimakaua soqe 7 navu visa vaaka soqema seo nouqosa qovaama vi, vaiinte ou namai auhianta vaiha usau ne variaave.

<sup>19</sup> Visa mini usau ne variamanka visa naankiara vo vurimakaua 7 navu namaiqinkai qovaamavi, visa sa soqe vaaka vakausa vaiha vuhaaiqi variasa variaave. Ke haau Isipini vaihavaka via voqaama vehi vurimakaua sa kavaavaunaave.

<sup>20</sup> Vuhaaiqi varia vurimakauasa 7 navu namaiqinkai vaiinte ou haau hoqare namaiqinkai vaiinte usau ne vaia vurimakauasa aruse nama kaiqa saarave.

<sup>21</sup> Visa vo vurimakauanavu aru nama kaiqa saavo visa vaakavano haau vauntema seogai, vuhaaiqi vaiave. Sa visa vaakavano vaaka vaumanka mantaqumavio vaimanka variaave. Ke mintimase kaira kave vaikaunaihai qaqi himpi uo.

<sup>22</sup> Ke qaqi himpi viaqaankai qaiqaa vaikavi kaira vo kave uo. Ke kaira vo kavauo *sankuma* voqaama vaivo via vetai vohaiqaqaankaio noa soqe 7 navu irakiaiave.

<sup>23</sup> Minkima irakeo via naankiara noa 7 navu vonavuvaka irakiaiave. Irakaivo uvaivano iha voqaama ukihao via kakoqa aqu saivo via naankiara noa 7 navu irakaiva sa soqema vaiave.

<sup>24</sup> Viaqaankaio noa 7 navu sa soqeva ou noa 7 navu soqea nampiqama saiave. Ke kaira minkimase kave viaqaankai vi uvaa vaana saiqa vare varia vaiinkisa kiva nimuamankavaka, visa sa vi uvaa osara ho kinka kiva kimiavo, kio.

<sup>25</sup> Minki kuvo Iosepeva Pero vaiinkiaa kihao, Are kaira kaaraqanta kavaanaa, vikanta osara vaiava vohaa osaraqaima vaio ivo. Kotiva nai naankiara varae i osaraa kairasaama ai umiqeo ivo.

<sup>26</sup> Kotiva vi uvaqaa ntuva seo minkima kivo: Are vurimakaua soqe 7 navu kavaanaa, via osara vaiava ihi soqe 7 navuma naankiara varianarove. *Sankuma* voqaama noa soqea 7 navu irakaia, via osaravaka vaiava ihi soqe 7 navuma naankiara varianarove.

<sup>27</sup> Vo vurimakaua 7 navu naankiara qovaama vuasa vuhaaiqi variasa, visa osara vaiava, ihi sa soqe 7 navuma naankiara varianarove.

*Sankuma* voqaama sa soqe irakaia 7 navu vaivo uvaivano iha voqaama ukihao kakoqa saia, via osaravaka vaiava ihi sa soqe 7 navuma naankiara varianarove.

<sup>28</sup> Kotiva naankiara nai saiqa varae i osaraa kairasaama ai umiqeo ivo kunaave.

<sup>29</sup> Vi kairaaqaa Kotiva ntuva seo minkima kivo: Maa entaaqaankaio maini Isipini ntaravano 7 ihi vaaqio vihao soqema seo qampiqaqio vuanarove.

<sup>30</sup> Ntaravano soqema seo qampiqaqio viao 7 ihi soqea kaiqaiavo viaqaankaio 7 ihi vaaqio vihao ntaravano sa ho qampiqaanarove.

<sup>31</sup> Vi entaa sa soqe enta vaimankaa ki, vaiinki nahenki airi ntara variaina entaa kauru sevaave. Are kaira kavaana osarava minkimama vaio ivo:

<sup>32</sup> Kotiva uva kiva keo vaasama vi entaa vi uvaa qovaama saeva auki vaivaa kia, are kaira kaaraqanta vohaa vasa kavaarao, kio.

<sup>33</sup> Iosepeva minki kivaseo qaiqaa Pero vaiinkiaa kihao, Vaa ihaama vaiinki vo, avu aako vakaa vaiinki ranta sea via noaiqama saiao viva Isipini vaihao aiqava saiqaqaa raqisiae.

<sup>34</sup> Vi vaiinkia noaiqama sea vaiinki vonavuvaka noaiqama saiaa vinavusa vaiha aiqava ntara qantu vare aniraqaankai hini ntara takisi varentemase vaevaave.

<sup>35</sup> Vinavusa ntara vaehama qaqi vaiinki nahenkaa nenka 4 navu ukuke vohaiqa kinavu kimiake kivaqi vivaave. Vinavusa ai Pero vaiinki auku ntehama takisi varentemase, ntara vareha 7 ihi ntara soqema seo qampiqaina vi ntaraa vaaqi viha vuu vo vakusa vo vakusaqi noa naavuqi vuu qaqi vakaivo

<sup>36</sup> naankiara 7 ihi sa ntara qampiqaina ihiva ani ntaiao ntara ho variaie. Vinavusa minkima saivo naankiara sa ntara variaina entava ani ntaimanka maa vakanaasa antuqa aruaia entava anintaimanka sa ntaraa qukuaiaki, qaqi vaivaave, kio.

<sup>37</sup> Iosepeva minki kuvo Pero vaiinkivanovaka, via noa vaiinki vonavuvaka, Iosepea uvaa soqe uvave kivase, vaiinki vo noaiqama sea iha

<sup>38</sup> Pero vaiinkivano kihao, Nankima vaina vaiinkiae noaiqama saraave? Kotiva Iosepea avu aakoqaa soqema seo raqisi vaivoa kio, viva vi uvaa osara kinavu kiva kimivo. Sa vovano Iosepea aakara saaiava vaio ivo, kio.

<sup>39</sup> Minki kivaseo Pero vaiinkivano Iosepea kihao, Kotiva vi uvaa osara ai kiva amivo ai avu aakovano ho vaivaa varianaraa kio, vovano ai aakara saaiava sama vaio ivo.

<sup>40</sup> Vaa iihama ke ai noaiqama saaiava arema ki noa naavuqaa raqisi vaiama aiqava ki vaiinki nahenki ai uva iqi vuake. Keqaima Pero vaiinkivano vaiha ai noa vaiinkima vaiaave, kio.

*Iosepeva noaiqama via aiqava Isipiqaa raqisua*

<sup>41</sup> Pero vaiinkivano minki kivaseo qaiqaa Iosepeaa kihao, Vake ke ai noaiqama saaiiaa are aiqava Isipiqaa raqisiqia vuane, kio.

<sup>42</sup> Minki kivaseo qaqi vaiinki nahenki Iosepeva noaiqama vuainaa iriake kio, Pero vaiinkivano nai vuqaqi nonkuko ringia rahunku seo Iosepea vuqaqi nonku amikeo, soqe ukavaaqa nonku amikeo, kora oi *hankaroro* via auntaqi ruvu amikeo,

<sup>43</sup> qosavaka qosaqaa santarumako kaariavaka Iosepea amuvo Iosepeva Pero vaiinki naankiaraini noa vaiinkivano vaihao iqosa kaariqi vauvo qosavano via rarauqi vi vau-manka vaiinki vonavu Iosepea avuni santamaqi ou viha kiha, Iosepeva ani vaio ivo. Ne vinivo viva aniaie, ki vaua. Minkima seo Pero vaiinkivano Iosepea noaiqama sovo Iosepeva aiqava Isipiqaa raqisi vaua.

<sup>44</sup> Pero vaiinkivano Iosepeaa kihao, Ke Pero vaiinkivano ai noaiqama se uo. Are sa hove kiea, maa vakanaasa sa ho nai iise saiqava varevaave, kio.

<sup>45</sup> Minki kivaseo Pero vaiinkivano Iosepea qaraasa auku ntava amikeo viaa *Sapenaati-Paneaave* kivaseo nahenki vo via auku Asenaatia via amua. Vi nahenkiva Potipea raavuavano vauvo Potipeva Isipi vaiinki nahenkiaa iihao suaiaa kinavu vaiqave kihao via aarehao vau vaiinkiva vakusa vo Oniqi vaua. Iosepeva Potipea raavua Asenaatia vaakeo vaihao aiqava Isipini vi anihao saiqaqaa raqisihao vaua.

<sup>46</sup> Iosepeva noaiqama vio viva 30 ihi vaasova vaihao Pero vaiinki saiqava hoqarama keo vaaqio vua. Iosepeva Pero vaiinkivano vaua mini seo Isipini vi anihao saiqaqaa raqisi vauvo

<sup>47</sup> ihi 7 navu vaaqio vihao ntaravano soqema seo qampiqaqio vuvo

<sup>48</sup> Iosepeva vi entaa vi ntaraa vareo vo vakusa vo vakusaqi vuu vakoa. Vo vakusa vo vakusavano vauvo Iosepeva vakusa kakaaga qampiqaqio ntaraa vi ntaraa qantuseo nai vi vakusaaqi vuu vakeo, vo vakusaqi qampiqaqio ntaraa qantuseo nai vi vakusaaqi vakeo, minkimaqio vihao vo vakusa vo vakusaqi ntaraa qantu sehao vuu vakoa.

<sup>49</sup> Iosepeva nuqavano airi vaintema seo, viva airi ntaraa qantu vareo vo naavu vo naavuqi mpiqaseo vakovo airi ntaraa vauvoa kio, Iosepeva hini ntaraaqi mpukaqi qara ntuva keo hini ntaraa sa mpukaqi qara ntuva karaio, qaqi naavuqi vuu vakoa.

<sup>50</sup> Sa ntaraa qampiqaqio entava sa ani ntovo soqe ntaraa qampiqaqio entava qaqi vau entaa Asenaatia Potipea raavuavano vainki kaaraqanta Iosepea vaka amikovo

<sup>51</sup> Iosepeva nai vainki hoqare vakakoa auku ntehao *Manaseave* – *Kaurusauaave*, kio. Iosepeva kihao, Kotiva ki saihaiqimanka kinka vasausavaanavu ki mantaiqama kimikoa kauruse, kenka karavusa naavuqi vusai enta variavaunaavaka kauru se uo, kio.

<sup>52</sup> Minki kivaseo Iosepeva nai vainki via naankiara vakakoa auku ntehao *Efaraimuave* – *Vainki Kimiave*, kio. Iosepeva kihao, Ke maa vakaini variavao ki vaaka maara ntomanka variavao Kotiva ki sahaiqivo kinka vaakaiqimanka vauo Kotiva vainki ki kimivo, kua.

<sup>53</sup> Ho Isipini soqe ntaravano qampiqaqio vuvo 7 ihi kaiqovo

<sup>54</sup> Iosepeva kuntea seo, sa ntaraa qampiqaqio ihiva 7 navu anieva hoqarama koa. Vi entava ani ntovo vo vakaini vo vakaini sa ntaraa vauvo Isipiniqaima ntaraa qantu vuu naavuqi vakova ho vaua.

<sup>55</sup> Sa ntaraa qampiqaqio entava anintomanka Isipi vakanaasa ntaraa antuqa ntaihomanka vaiha Pero vaiinkiaa ntaraa kinavu kimiane kuvo Pero vaiinkivano visaa kihao, Ne Iosepeva vainaini ou vima, viva kiaina uvaa iriake, kua.

<sup>56</sup> Isipini voqi voqi ntaraa sa vauvo Iosepeva vo naavuqi vo naavuqi ntaraa qantu vuu vakoa ou genti qankuaseo munima vaehao ntaraa vi vakanaasa nimua. Aiqaava Isipini ntaraa sa qampiqaqio kio, Iosepeva minkua.

<sup>57</sup> Vo vakaini vo vakainivaka sa ntaraa vaumanka vo vakanaasa vo vakanaasa Isipini Iosepeva vaunaini ntaraa varaesa vuama.

## 42

### *Iosepea vasausavaanavu ntaraa varaesa Isipini vuama*

<sup>1</sup> Kanaha vakainivaka ntaraa sa vauvo Iakovova vaihao iuvo Isipini ntaraa vauvo viva nai maaqunavuaa kihao, Ne gumina maini vaiha nai kave nai kave iha vaivoave.

<sup>2</sup> Isipini ntaraa vaio ivo kiamanka iunaave. Nenavu mini oku ntema munima aqusehama ntaraa vara vii kinavu kimiqa kenavu ntaraa via nehama sa quku viai, qaqi vaiqi vuave, kio.

<sup>3</sup> Iakovova minki kivaseo Iosepea vasausavaa 10 navu nikikomanka visa munima aquseha ntaraa varaesa Isipini vua.

<sup>4</sup> Visa vie uvo Iakovova sa Benaminia Iosepea qaka akisaraio kihao, Viavaka akikaaiiao vo ahasavano via mantaiqama amikaanto, kua.

<sup>5</sup> Kanaha vakaini noaiqamaseo ntaraa antuqa aru entava ani ntomankaa ki, vo vaiinti-navuvaka Iakovoa Isaraiave via maaqunavuvaka ntaraa varaesa Isipini vua.

<sup>6</sup> Vuvo Iosepeva aiqava Isipiqaa raqisi vauva vaihao vo vakaihainaasa vo vakaihainaasa visa munima vaehao ntara nimi vaumanka Iosepea vasausavaanavuvaka Iosepeva vau-naini ou nte via avuqaa vaiha hiqintivi kankakaavuvi visa nái vii vakaini se vauvo

<sup>7</sup> Iosepeva nai vasausavaanavu vii uqauama seo kaveo, viva sa visa vii uqauamaseo kavovaa voqaama vaihao Iosepeva visa anoqama seo ireo kihao, Ne kaihai aniasae iavo? kio.

Minki kumanka visa kiha, Kenavu Kanaha vakaihai ntara varaea anuausave, kinka.

<sup>8</sup> Visa minki kiha visa sa Iosepea vii uqauqamase kavovo Iosepevaqai nai vasausavaanavu vii uqauama seo kavoa.

<sup>9</sup> Visa sa Iosepea vii uqauqamase kavaraí, kankakaavuvi vauvo Iosepeva nai haau kaira kavoa viaa qaqi iikeo visaa kihao, Aqao, nenavu vo ahasaa ampeqiesea aniavo. Nenavu maini ani kinavu ampeqamase kaveha kenavu sa soqemase raquainaa kavaesa aniasave, kio.

<sup>10</sup> Iosepeva minki kumanka visa kiha, Noa vaiinkio, kenavu sa minkiea anuausave. Kenavu ai saiqa vaiinkinavu vaiha munima aquseha ai ntara varaea anuausave.

<sup>11</sup> Kenavu vaiea qaka vasausa vauo kinavu qova vaiinki vohaiqavano vaio ivo. Sa kenavu maa vakanaasa ampeqiea anuausaaave. Kenavu quqaa uvaqai kua vaiinkisama aninte uo, kinka.

<sup>12</sup> Visa minki kuvo Iosepeva kihao, Nenavu unahaama kiavo. Nenavu maini ani kinavu ampeqamase kaveha kenavu sa soqemase raquainaa kavaesa aniasave, kio.

<sup>13</sup> Iosepeva minki kumanka visa kiha, Kenavu haau vaiea qaka vasausa 12 navu vauo kinavu qova vohaa vaiinkivano Kanaha vakainima vaio ivo. Kinavu qaka vovano quku vuvu kinavu qaka naankiaraihainaava kinavu qoavakamaseo vaio ivo, kinka.

<sup>14</sup> Visa minki kuvo Iosepeva aqao kio, Ke vaasa kunaa, ne maa vakanaasa ampeqiesama aniavo.

<sup>15</sup> Maankimase ke ni uva avakeha kavaeave. Ke kenka sauqu aiqiqaa aquseha Pero vaiinki auku ntehamá minkima ki: Ninavu qakavanovaka sa maini aniea, nenavu sa maihai ho vivaave.

<sup>16</sup> Ninavuqinkaio vohaiqavano ou ni qaka vika vareo maini aniaie. Viva via vikareva viaqe ke ni hini usa karavusaqima kaaia nenavu maini vaiqe ke ni uvaa quqaave unave kiae. Ke kavaaio ni uva una uva vaiea, ke niara maa vakanaasa ampeqiesea aniasave kiaave, kio.

<sup>17</sup> Iosepeva minki kivaseo kaaramo enta visa karavusa naavuqi somanka vaua.

<sup>18</sup> Visa karavusa naavuqi mini vauvo kaaramo enta aikarovo Iosepeva anintero visa kiva nimio kihao, Ho ke Kotia uva ii vaua vaiinkisama vai uo. Ke vo uva kiaí ne vi uvaa ho iivea, ke ni vehasuma nimikararave.

<sup>19</sup> Ne quqaa uva ki vai vaiinkisa vaivea, niqinkaio vovano maaqi karavusa naavuqi vaia ma ne hini usa anirante ntara vare vuu nenka navunaasa sa ntara vakesa nimi,

<sup>20</sup> viaqaankai nenka qaka vika vare ke iainanaini munku saiqe kavaae. Ke via kave, niara quqaa uva ki vaiaase kihama ni vehasuma nimikararave, kio. Iosepeva minki kumanka visa eo kenavu minkieave kinka.

<sup>21-23</sup> Iosepeva Isipi vakanaa uvaqinkaio ki vauvo vovano via uva uantaseo via vasausavaanavu kiva nimumankaa ki, visa Iosepeaa vo vakanaava vaihao sa kinavu uva ho iivo kivase, visa nái uvaqinkai nai kiva ami nai kiva ami iha kiha, Oho, haau kenavu kenkanavu qaka vo mantaiqama amikaavaunaa via saara Kotiva vake kinavu noa maara kimivo. Haau kinavu qakavano iqi rakehao kinavuaa sa minkiake kumanka kenavu sa via uva iiai, sa via aaquhikama amikaavaunaave. Via saara vake noa maaravano kinavuqi qovaama vio ivo, kinka.

Visa hini usa minki kuvo Rubeniva kihao, Oho, vi entaa ke niara kiha, Sa via mantaiqama amikaake, kiavau ne ki uva iiakaa vaumanka sa ki uva iuave. Ne minkimase via arusoa saarama vake kinavuqaa noa uva vaio ivo, kio. Minki kumanka visa Iosepeva sa kinavu uva ho iianarove kivaseha nai kiva ami nai kiva ami i vauvo Iosepeva vaihao visa aiqava uva kua ho iua.

<sup>24</sup> Iosepeva visa uva iuvo via munkusavano mantaiquvo viva visa vauqaankaio uan-tavio nái vii qaqini vakeo evaara iqi rakaseo qaiqaa via auntavano ho uva kiaiava vauvo viva uanta vio sauqu aave vakehao nai saiqa vaiinkinavuaa kihao, Vi vaiinkiaqi karavusaqi saake, kumanka visa Simioniva nai qaka vasausavaa hampaka vau vaiinkia, visa via rumpa vare vuu karavusa naavuqi soa.

<sup>25</sup> Via rumpa vare karavusa naavuqi vuu sovo Iosepeva nai saiqa vaiinki evaara kiva nimio kihao, Ne ntara vare visa uka mpiqa sehamá visa *silvaa* munima nái nimihama visa ukaqi ntuva nimikaake. Aaraini viha vika ntara neavaka ntuva nimikaake, kio. Minki kumanka via saiqa vaiinkinavu Iosepeva kunte mase, ntara ntuva nimikoa.

*Iosepea vasausavaanavu nái maaqaini anirante vua*

<sup>26</sup> Iosepea vasausavaanavu ntara ntuvako ukaa vaa vaai nái donki auvaqaaqaa rumpase vakusa mini se nái maaqaini viesa vuama.

<sup>27</sup> Visa aaraini vuvo entama vumanka saiqe mini qaqi ntaka vaikaae kivase mini vuvo vovano nai ukaqinkaio ntara equseo saiqe kenka donki amiae kivaseo kavovo nai ntaraa aquso munimava ukaqi qaqi vaua.

<sup>28</sup> Viaqi vuvo viva nai qaka vasausa naarama seo kihao, Maa kavaake. Ke *silvaa* munima mini ntaraa aqu sauava ukaqi qaqi vaio ivo, kio. Minki kumanka visa voqamase naaku ikomanka qekeha aiqú sauqu nti nti iha kiha, Oho, Kotiva kinavuaa nankihaoe minkivo? kinka.

<sup>29</sup> Visa minki kivase ou vi Kanaha vakaini nái qova vaunaini ou nte visa nái nu vasaasaa Iakovoa kiva ami kiha,

<sup>30</sup> Isipiqaa raqisi vaiinkiva kinavuaa kamoqara kihao, Ne Isipi vakanaasa ampeqiesia aniasave, kivo.

<sup>31</sup> Viva minki kimanka kenavu kiha, Aqao, sa kenavu Isipi vakanaasa ampeqiea aniasavaave. Kenavu quqaa uvaqai kua vaiinkisama ani ou.

<sup>32</sup> Kenavu qaka vasausa 12 navu vuvo kinavu qova vohaa vaiinkivanoqai vaio ivo. Kinavu qaka vovano quku vuave. Kinavu qaka vo naankiaraihainaava qaqi vaihao kinavu qosantio Kanaha vakainima vaio ivo, kuo

<sup>33</sup> Vi vaiinkiva kihao, Ne quqaa uva ki vai vaiinkisa vaivea, niqinkaio vovano karavusa naavuqi vaiama ne hini usa anirante ntara vare vuu nenka navunaasa sa ntara vakesa nimi,

<sup>34</sup> viaqaankai nenka qaka vika vare ke iainanaini via vii saiqe ke via kavaae. Ke via kave niara quqaa uva kia vaiinkisave kihama niara sa maa vakanaasa ampeqiesia aniasave kiaave. Minki kivasema ke ni qaka vasaara vo karavusa naavuqi saainaa ninka nimiaima ne ho maini vaiha munima aquseha ntara varevaave, kiave. Mini Isipiqaa raqisi vai vaiinkiva kinavuaa minkima kiave, kinka.

<sup>35</sup> Minki kivase visa nái ntara ntuvako ukaa ontontiaqama seha kavovo visa ntaraa aquso *silvaa* munimava vo uka vo ukaqi qaqi vaumanka visavaka visa qovavaka voqamase qekeha vuvo

<sup>36</sup> visa qova Iakovova kihao, Oho, ne aiqava ki vainkivaanavu kaiqa saesa auki variavo. Umpto, Iosepeva quku vuave. Simioniva sama vaio ivo. Ne Benaminia vaka mini vika vuu saesa auki variavo. Oho, vo ahasa vo ahasa maara ntai ahasava kiqima vaio ivo, kio.

<sup>37</sup> Minki kuvo Rubeniva nai qoaa kihao, Benaminia ki kimiaqe kire viaqaa raqisiqi vima qaiqaa nina vika vii amiae. Ke sa ourante nina vika vii amiaea, are homa ki maaqakanta aru senaave, kio.

<sup>38</sup> Minki kuvo Iakovova aqao kio, Sa ke kenka maaqu naankiaraama ai amiaiaa vike vinaave. Via vasaava quku vuvo vivaqaima qaqi vaio ivo. Ne via vika vare vivo vo ahasavano via mantaiqama amikiaiqa ke erera sauhi vakausa munkusa mantaiqiaqe quku viaave. Sa ne ho via vike vivaave, kio.

## 43

*Visa Isipini qaiqaa anirante vuama*

<sup>1</sup> Iakovova sa ho via vike vivaave kuvo sa ntara vau entava qaqi vaiqio vumanka

<sup>2</sup> visa Isipi vakaihai vare anu ntaraa nama kaiqa sovo visa qova visaa kihao, Ne anirante ou qaiqaa munima aquseha ampara ntara voqavaka vare aniake, kio.

<sup>3</sup> Minki kuvo Lutiva aqao kio, Kenavu ai kiva amunaave. Isipiqaa raqisi vaiinkiva kinavu kikihao minkima kivo, Ne sa nenka qaka vo vike aniqe ke via kavaae, ne sa ho ke iainanaini qaiqaa ani ntara vaevaave, kiave.

<sup>4</sup> Are Benaminia vaka kinavu hampaka akikiaiqa kenavu via vakamase Isipini ntara varea vuave.

<sup>5</sup> Noa vaiinkivano minkima kivo: Ni qaka vovano sa ni hampaka kuviea, ne sa ke iainanaini ho anivaave kia, via saara are sa viavaka akikaiea, kenavuvaka sa ho mini vivaave, kio.

<sup>6</sup> Minki kuvo Iakovova via vo aku Isiraiva kihao, Ne vi vaiinkia nenka qakaa sa kiva amiaaara vaimanka ne nenka qakaa via kiva amiaave. Ne viaa via kiva amiaaraa kio, via saara kiqima noa maara ntai ahasava vaio ivo, kio.

<sup>7</sup> Minki kumanka visa kiha, Aqao, vi vaiinkiva vo uva vo uvaa kinavuvaka ki navunaasavaka iraiave. Viva kihao, Ni qova qaqi vaio ivo? Ni qaka vovano vaiove? kiave. Minki kivea, kenavu vi uvaa vi uvaa nai kiva amunaave. Kenavu nai kiva amiha sa kenavu



viva nenka qaka maini vike kuvuake kireva i uvaa iiai, qaqi uva ki vauo viva nai vi uvaa kiave, kinka.

<sup>8</sup>Visa minki kuvo visaqinkaio Iutiva nai qoa Isaraiaa kihao, Are vi vainkia ki vakamasea akikaiage kenavu vaasa vuae. Kenavu sa vaasa vuae, kinavu vainkivaavaka aevaka quku vivo.

<sup>9</sup>Kevano vi vainkiaqaa raqisiqi vieave. Vi vainkiva mantaiqama viea, are kiqaqai vi uvaa vakenaave. Ke via vika vare ou ni ourante sa vii nina qaiqaa amiaea, via saara kiqaa uva vaiage ke aigava enta qaqi vaiqi viha vi uvaa vararaave.

<sup>10</sup>Kenavu ntaraa vaasa vuakaarave. Kenavu vaasa vuae ki, homa kaara naini ou vi ourante anuntauaikio, kio.

<sup>11</sup>Iutiva minki kuvo via uvavano mpeqaiquvo visa qova Isiraiva kihao, Ne mini quqaa viesia ivera, ne maihai soqe aiaia vare vi vaiinkia vuu qaqi amivo viva niara quahehaoma variaie. Vaakaqaa aqua vahaveaave, saaqa voqaa namaive, ntaraqaa aakaave, saivu voqamave, vi ahasaa vi ahasaa vuu qaqi amiake.

<sup>12</sup>Nenta ukaqi kavaavo munima vaia, vi *silvaa* munimaavaka nai amiha qaiqaa voqavaka amiake. Vovano qumimaqa ihae ni ukaqi vi munimaa qaqi ntuva kaiave? Ne viaavaka ireha kavaake.

<sup>13</sup>Nenta qakavaka vika vare vaasa vuake.

<sup>14</sup>Ne vi vaiinkia avuqaa ou vaivo Kotiva ni naaquhikama nimikaiao vi vaiinkiva ni qaka vasaara vovaka Benaminiaavaka qaqi saiaa ne vikanta ho ntika vare ourante aniake. Oho, ki vainki kaiqavi sa vaivea, kentaraama vaiaave, kio.

<sup>15</sup>Minki kumanka visa aiaia vare, *silvaa* munima kaara naini vare, Benaminiaavaka vika vare vua. Visa sante Isipini orunte Iosepeva vaunaini vuvo

<sup>16</sup>Iosepeva Benaminia kaveo nai naavuqaa raqisu saiqa vaiinkiaa kihao, Are maa vaiinkinavusa ntika varea ki naavuqi vuu sea vurimakaua arusea nunka kaimanka vi vaiinkinavusa isaraqaa kivaka ntara naake, kio.

<sup>17</sup>Minki kuvo via saiqa vaiinkivano Iosepeva kuntema seo, via vasausavaanavu Iosepea naavuqi ntika vuu soa.

<sup>18</sup>Minkima seo ntika vuu somanka visa Iosepea naavuqi vuu soa saara naaku ikomanka kiha, Haau kinavu ukaqi ntuvako munimaa saarae viva kinavu maaqi vuu seo ivo? Viva kinavu ravaaqau seo rumpaseo, kinavu donkivaka vareo, kinavuaa ne karavusa vaiha ki saiqaqai qumina varaake kianarove, kinka.

<sup>19</sup>Visa minki kivase ou naavu qentiana vaiha Iosepea saiqa vaiinkiaa kiha,

<sup>20</sup>Noa vaiinkio, haau hogare kenavu ntara vaea anuusa maihai ani vare kenkanavu maaqaini anirante

<sup>21</sup>aaraini vuavauo entama vumanka aarana vaikaea iha kavaavauo kenavu ntaraa aqu saavauna munimaa kinavu ukaqi qaqi ntuva kova vauave. Vovano kinavuaa muara varaavo kianto ki, kenavu qaiqaa qaqi vi munimaa vare anuro

<sup>22</sup>Kenavu vo *silvaa* munimavaka ntara vaea vare ani uo. Nai kavave munima kinavu ukaqi ntuva koave? kinka.

<sup>23</sup>Visa minki kuvo Iosepea saiqa vaiinkivano kihao, Hove, sa qekaake. Ninavu vaiqavanovaka ninavu qoa vaiqavanovaka Kotiva, vivama vi munimaa ninavu ukaqi ntuva koave. Kema haau vi entaa ni munima varaavaunaave, kio. Minki kivaseo viva ou Simionia karavusa naavuqinkaio suvantu seo vika vareo visa vaunaini vii soa.

<sup>24</sup>Simionia visa vaunaini vii seo Iosepea saiqa vaiinkivano visa ntika vuu Iosepea naavuqi seo visa nai aiq mintuqaake kio, namai saqa nimio, visa donkivaka ntara nea nimio,

<sup>25</sup>visaa kihao, Ne isaraqaa Iosepea vakamase ntara nevaave, kumankaa ki, visa Iosepea amiesa vare anu ahasaa henuqamase vakoa.

<sup>26</sup>Henuqama vake vahaqaaini vauvo Iosepeva mihaio anio nai naavuqi oiqekeo vumanka via qaka vasausavaanavu visa nai vare anu ahasaa vare, naavuqi oiqeke Iosepea amiha vakaini hiqintivi kankankaavi vaiha visa nai vii vakaini seha vaua.

<sup>27</sup>Mintimase Iosepea avuqaa vauvo Iosepeva visa ireo, Nenavu vo? Nenavu hoe vaiavo? kivaseo viva qaiqaa visa ireo kihao, Ho ni qova sontaiqama viave kiava vo? Viva qaqie vaio ivo? kio.

<sup>28</sup>Minki kumanka visa kiha, Ai saiqa vaiinkivano kinavu qova, viva qaqi vaihao homa vaio ivo, kivaseo visa qaiqaa kankankaavi nai vii vakaini seha vaua.

<sup>29</sup>Visa minkima Iosepea avuqaa vauvo Iosepeva visa aikukumaqio vihao nai noa via vainki, Benaminia kaveo visa ireo kihao, Ne nenka qaka naankiaraaave kiava, maa vivae vaio ivo? kivaseo Iosepeva Benaminiaa kihao, Ki maaquo, Kotiva ai soqema amikaie ki uo, kivaseo

<sup>30</sup> nai qaka vii qaiqaa kavooa kio, Iosepeva iqi rakaaiava aumanko vauvo viva viaqinkaio santeo ou vo rumuqi nariaraa vaihao nai qakaa iqi rakeo.

<sup>31</sup> Nai qakaa iqi raka seo Iosepeva nai viiqinkaio auquru nunka seo vuaqaiia ukuseo, nai iqi rakoo kaiqa seo, qaiqaa aniranteo nai qaka vasausa vauaqi ou vaihao nai saiqa vaiinkinavuaa kihao, Ho ntara raaquake, kio.

<sup>32</sup> Minki kivaseo Iosepeva vo kaintaqa nariaraa oquvi vaumanka Iosepea saiqa vaiinkinavu ntara raaquse Iosepea amumanka Iosepea qaka vasausavaanavu vo kaintaqa oquvi vaumanka ntara raaquse nimumanka Isipi vaiinki vonavu visa nariaraa vo kaintaqa oquvi vaumanka ntara raaquse nimua. Isipi vakanaasa kiha, Kenavu Hiparu vakanaa vaiinkinavu hampaka ntara naaoave, ki, visa nariaraa vo kaintaqa ntara ne vaua.

<sup>33</sup> Iosepeva qaka vasausavaanavu ntara naesa uvo Iosepeva visa rairaseo vi kaintaqa vi kaintaqa oquvi vaiha ntara naake kumanka visa oquvi vaiha kavovo avuniaragaankai visa vasaava nai qakantioqai nai qakantioqai oquvio vaua. Iosepeva minkima avuqavugama seo visa raira somanka visa vaa voqamase aako kaa iha kiha, Nankimaseoe viva kinavu nova kinavu vakakai osaraa ho iivo? kinka.

<sup>34</sup> Visa minki kivase oquvi vaumanka Iosepea saiqa vaiinkinavu Iosepea kaintaqaankai ntara vare, visa nimiqi viha Benaminia amihama airi naini via ntara amua. Benaminia minkima amumanka visa aiqava ntaravaka namaivaka ho noa.

## 44

### *Iosepeva qaiqaa visa avakehao kavooa*

<sup>1</sup> Visa ntara novo viaqaankaio Iosepeva nai naavuqaa raqisu saiqa vaiinkia kiva amio kihao, Ntara varea visa ukaqi mpiqasea visa ntaraa aqusaa munimaavaka visa ukaqi nai qaqima ntuva nimikaane.

<sup>2</sup> Minkima sea ou ki *silvaa kapa* soqea varea visa qaka naankiaraama ukaqi via munima vakamasea ntuva amikaane, kio. Minki kuvo viva Iosepeva kuntea seo, minkima nimikoa.

<sup>3</sup> Minkima nimikovo via qararaa visa nikikomanka Iosepea qaka vasausavaanavu visa nai donki hampaka nai maaqa viesia vuama.

<sup>4</sup> Visa nai maaqa viesia ou vi amparaiqai aaraini vuvo Iosepeva nai naavuqaa raqisu saiqa vaiinkiaa kihao, Santea vi vaiinkinavusa vakaqia vuane. Visa vinaini ou ntea visaa minkima kiane, Ki noa vaiinkivano ni soqema nimikaimanka ne nankihae nai mantaiqama amikaavo?

<sup>5</sup> Ne nankihae ki noa vaiinki kapa soqea muara varaavo? Viva vi kaparaqinkaio namai naiave. Viva vi kaparaqonkaio naankiara vo saiqa vo saiqavano qovaa iaina kavaaina kapava vaio ivo. Ne vi kaapaa muara vareha manta saiqa varaavo, kiane. Are minkima visaa kiane, kio.

<sup>6</sup> Iosepeva minki kivaseo via akikovo via saiqa vaiinkivano santeo visa ou ntikaseo vi uvaa kiva nimumanka

<sup>7</sup> visa aqao ki, Nankihae are kinavuaa minki kiarao? Kenavu sama via kapa muara vare ani uo.

<sup>8</sup> Haau Kanaha vakaini kenavu *silvaa* munima kinavu ukaqinkai ranta saavaunaa, vi munimaa qaqi naima amunaave. Kenavu vi munimaa nai amuausaa ki, sama ai noa vaiinki naavuqinkai vo ahasavaka muara vararaave.

<sup>9</sup> Are rantaqia vihaa kavaiao kinavuqinkaio vo vainki ukaqi vi kapava vaiea, homa vi vaiinkia aru sea kinavuvaka rumpa kaiaqe kenavu ai noa vaiinki via saiqa vaiinkima vaiaave. Sa kenavu via kapa muara vare ani uo, kinka.

<sup>10</sup> Visa minki kuvo Iosepea saiqa vaiinkivano kihao, Hove. Kaapa muara vareo aniaina vaiinkia, viaqaima ke rumpa saraave. Ne hini isa homa nenka maaqa qaqi vivaave, kio.

<sup>11</sup> Minki kumanka visa vaasa nai uka nai uka vakaini vaavi se, no rumpa koa vantuse vakovo

<sup>12</sup> Iosepea saiqa vaiinkivano visa vasaara ukaqinkaio naane ranta seo kavovo sa vauvo rantaqio vihao visa qaka Benaminia esaanaihainaara ukaqi ranta seo kavovo kapavano via ukaqi vaua.

<sup>13</sup> Visa qaka ukaqi kapavano vaumanka visa kave, visa nai ukavaaqa nahaqu naahaqi-mase, voqamase qekehaha visa nai ntara ntuvako ukanavua vara vaai nai donkiqaa rumpase anirante Iosepea vakusaini qaiqaa vuama.

<sup>14</sup> Visa Iosepea vakusaini anirante vuvo Iosepeva sa nai naavuqinkaio vevanteo viaio, qaqi viaqi vauvo Iutiva nai qaka vasausavaanavu hampaka Iosepea naavuqi oiqeke vaka ntaka hiqintivi vauvo

<sup>15</sup> Iosepeva visaa kihao, Ne nana ahasae varaavo? Ne sae iriavo? Ke naankiara qovaa iaina ahasaa kave vauausama vai uo, kio.

<sup>16</sup> Iosepeva minki kuvo Iutiva kihao, Oho, kenavu nana uvae ho kiaave? Nana uvae kenavu kiaiaa are vi uvaa quqaave kihaa sa muara varaavo kiane? Sa kenavu minki kiaina uvava vaio ivo. Kenavu vaaqu saiga varaunaraa kio, Kotiva kinavu qoa saiga qoqaama seo ivo. Ho kenavu maa entaqaankai rumpakesa voqaama vaiha ai saiga vaiinkiqaima vaiaave. Via ukaqi kapa ranta sai vaiinkivavaka, kenavu via vasausavaanavuvaka, ai saiga vaiinkiqaima vaiaave, kio.

<sup>17</sup> Iutiva minki kuvo Iosepeva aqao kio, Sa ke ni aiqava rumpa karaave. Via ukaqi ki kapa ranta saina vaiinkiva, vivaqai maini vaihao ki saiga vaiinkima varianarove. Ne hini asa homa nenka qova vainanaini qaqi vivaave, kio.

<sup>18</sup> Iosepeva minki kuvo Iutiva Iosepea aumanko ou nteo viaa kihao, Umpo, noa vaiinkio, saiqae ke uva vo ai kiva amiaa. Ke minki kiaiaa are noa vaiinki Pero vaiinki voqaama vaihaama sa ki kikiane.

<sup>19</sup> Are haau kinavuaa kihaa, Ninavu qova qaqie vaio ivo ninavu qaka vovano vaio ivo kiau

<sup>20</sup> kenavu kiha, Kinavu qova sontavano qaqima vaio ivo. Kinavu qova sontaiqama viva vaihao vainki vo vakakaivo qaqima nai qosantio vaio ivo. Vi vainkiva qaqi vaio via vasaava quku vuvo vivaqai nai noa Raikea via maaquvano qaqi vaivoa kio, via qova voqama seo viaa antuqa aivo vaio ivo, kunaave.

<sup>21</sup> Kenavu vi uvaa ai kiva amuaa are kihaa, Vi vainkia vika vare aniqe kevaka via kavaae, kiaama

<sup>22</sup> kenavu ariara kiha, Noa vaiinkio, vi vainkiva sa ho nai qoa mini seo anianarove. Viva nai qoa mini seo aniea, via saara via qova quku vuanarove, kunaave.

<sup>23</sup> Kenavu minki kuaa are kinavuaa kihaa, Ne sa nenka qaka vika vare aniea, ne sa ho ke iainanaini kuvu ntara varevaave, kianaave.

<sup>24</sup> Are minki kiaama kenavu qaiqaa kinavu qova vainaini vi ou nte are kiana uvaa via kiva amunaave.

<sup>25</sup> Via kiva amuo kinavu qova kihao, Anirante qaiqaa ou ntara varaake kimanka

<sup>26</sup> kenavu viaa aqao ki, Sa kenavu kenkanavu qaka vika vare vuaea, kenavu sa ho vi vaiinkiva vainanaini ho viaave. Kinavu qakavanovaka sa viea, kenavuvaka sa vieave, kunaave.

<sup>27</sup> Kenavu minki kuo kinavu qova kinavuaa kihao, Ne iiaave. Ki naaka vovano qorainki vainki kaaraqanta vaka kimikeo ivo.

<sup>28</sup> Vovano qiqaankaio vio sa qaiqaa ouranteo anumanka ke viaa oho, qaasau vairivano via aruseo ruqeqaama seo ivo kivaseha sa via vii qaiqaavaka kavaunaave.

<sup>29</sup> Ne maa vainkiavaka vika vare vivo vo ahasavano via mantaiqama amikaiea, via saara ke erera sauhi vakausa ki munkusa mantaiqiae ke quku viaave, kiave.

<sup>30-31</sup> Kinavu qova minki kiau ki, kenavu sa via maaqu naankiaraama vika vare qaiqaa anirante vuaea, kinavu qova kavaiao via maaqu naankiaraava sa kinavu hampaka vaiao viva vaasama quku vuanarove. Via maaqu naankiaraava qaqi vaivoa kio, kinavu qova qaqi vaio ivo. Via maaquvano quku viao via qovavaka sa qaqi varianarove, qukuma vuanarove. Kenavu sa vi vainkia vika vare vuaea, via saara kinavu qoa munkusavano mantaiqiao quku vuanarove.

<sup>32</sup> Ke kenka qoaa minkima kunaave, Kema viaqaa raqisiqi vuaiiao viva homa varianarove. Ke ourante sa viavaka vika vare aniea, qiqaama aiqava enta vi uvava varianarove, kunaave. Ke kenka qoaa minkima kunaave.

<sup>33</sup> Noa vaiinkio, viaa iiaama qiqaama rumpa kaiiae ke kenka qaka vakusa vare, maini vaiha ai saiga vaiinki variaiao ki qaka viva nai vasausavaanavu hampaka qaqi vuai.

<sup>34</sup> Ke sa via vika vare vuaea, nankimase ke kenka qova vainanaini ho viaave? Sa ho viaave. Umpo, sa ki kikikaiae kenka qova vainanaini ou vaiha via munkusavano nai maaqu saara mantaiqinaa kavaae, kio. Iutiva minki kua.

## 45

*Iosepeva nai qaka vasausa nai osara qoqaa kiva nimua*

<sup>1</sup> Iutiva minki kuvo Iosepea munkusavano voqama seo mantaiquvo vaihao iuvo nai saiga vaiinkinavu nivuqaa iqi rakaaivava aumanko vauvo viva aiqava nai saiga vaiinkinavuaa kihao, Ne aiqava maaqinkai ki maini se vuake, kumanka visa vuvo sa vovanovaka vauvo Iosepeva nai qaka vasausa hampaka vaihao nai osaraa visa kiva nimua.

<sup>2</sup> Iosepeva kiva nimio voqama seo rakehao vaumantaa ki, Isipi vakanaasa voqi vausa viva iqi rake vaua iumanka aiqava Pero vaiinki naavuqi saiqa vare vausavaka Iosepeva iqi rakoa iua.

<sup>3</sup> Iosepeva nai qaka vasausaa kihao, Ke Iosepesave. Ki qova qaqie vaio ivo? kio. Minki kumanka via vasausavaanavu vi uvaa ii voqamase naaku ikomankaa ki, visa uva kiva sa ho vaumanka vaua.

<sup>4</sup> Visa minkima vauvo Iosepeva vainko aniake kumanka visa vainko anuvo Iosepeva kihao, Ke ni qakavano Iosepesama vai uo. Ne vo vakanaasa ki nimiha munima varomanta visa ki kivika vare maini Isipini vuu soave.

<sup>5</sup> Ho vake ne sa ki aaku qeaka. Sa vi uvava kinavuqaa vaio ivo kiake. Kotiva vo vaiinki vo vaiinki sa quku viai qaqi variake kio, ki kikikomanka ke naane maini ni nivuni aniavaunaave.

<sup>6</sup> Ntara sa variaina ihiva kaaraqantaqaima qovaama vio kaiqa vivo sauqu hiniu ihima qaqima vaio ivo. Sauqu hiniu ihi vaiinki nahenki sama ho ntara ukuse qantu nevaave.

<sup>7</sup> Ho Kotiva maa entaa ihaoma niara visavaka visa vainkintivaka sa quku viai qaqi vaiqi vuake kio, ki naane maini kikikeo kigonkaio viva ni saihaqama nimikaiaie.

<sup>8</sup> Ke viaa iihama sa niaa ne ki kikikaamanka anunaave kiaave. Kotiva ki vi aaraa aukimanka maini anunaave kivaave. Kotiva ki kikikaamanka maini ani vauo vivaqaima ki noaiqama saimanka ke Pero vaiinki via saiqa vaiinki avuniaasama vai uo. Ke aiqava Pero vaiinki via vakaqaa raqisi vauausave. Ke aiqava Isipi vakanaasaaqaa raqisi vauausave.

<sup>9</sup> Ne sante vuu ki qoa kiva amiha minkima kiake: Ai maaquvano Iosepeva ariara minkima kivo, Kotiva ki noaiqama saimanka ke aiqava Isipi vakaqaa raqisiha vai uo. Are sa mini vaisea aniane. Vaasama ke iainanaini aniane.

<sup>10</sup> Are homa maini Isipini vaihaa vaka vo Gosenini vainaave. Vi vakava ki aumankoma vaio ivo. Arevaka, nena vankivaanavuvaka, nena nainkinavuvaka, nena sipisipivaka, mimivaka, vurimakavuvaka, nena aiiaia vakenaavaka, aiqava vi ahasaa vi ahasaa saku varea maini ani vaiqae

<sup>11</sup> Ke aiqaa raqisiae. Ntara sa variaina ihiva sauqu hiniunavu qaqima vaio ivo. Are sa maini aniea, aevaka are vakena ahasavavaka vehiqama vivo. Minkimama ki qoa kiva amiake, kio.

<sup>12</sup> Iosepeva minki kivaseo qaiqaa nai vasausavaanavuaa kihao, Nevaka ki qakavano Benaminivavaka ne ki kavaamanka ke quqaama Iosepesama vai uo.

<sup>13</sup> Pero vaiinkivano ki noaiqama sainaa ne anirante ki qoa vuu kiva amiake. Ne aiqava ahasa maini Isipini vaiha kaveavaka vuu ki qoa kiva amiake. Vi uvaa kiva amima, via vaasa vika varema maini aniake, kio.

<sup>14</sup> Iosepeva minki kivaseo ou nai qaka Benaminia ukukeo iqi rake vauvo Benaminivavaka nai vasaara Iosepeaa iqi rakeo naikanta nai susuqe nai susuqe i vaua.

<sup>15</sup> Iosepeva nai qaka suseqehao iqi rakehao ou nai vasausavaa vohaiqa vohaiqa susuqama nimikeo. Viva visa susuqama nimikomanka visa Iosepea vakamase uva ki vaua.

<sup>16</sup> Iosepevavaka via qaka vasausavaanavuvaka uva ki vauvo Iosepea qaka vasausavaanavu aninto vasaasava Pero vaiinkivano vau naavuaqi vumanka Pero vaiinkivanovaka, via sana saiqa vaiinkivanovaka, vi uvaa iiha quaheha vaua.

<sup>17</sup> Pero vaiinkivano Iosepea kiva amio kihao, Nena qaka vasausavaanavuaa minkima kiane, Ne nenka donkiqaa ntara vaa vaai rumpa vare anirante Kanaha vakaini ou vi ou ntema

<sup>18</sup> nenka qoavaka, nenka vainki nahentivaka, ntika vare ourantema ke iainanaini kuvu vaiqe ke soqe vaka ni nimiai ne viaqaa vaiha soqemavi variake, kiane.

<sup>19</sup> Nena qaka vasausavaanavuaa minki kivasea maa uvaavaka visa kiva nimiane: Ne maihai qosavaka qosa kaarivaka vare vuu saimanka ni vainki nahentivaka ni qovavaka viaqi vaihama ho aniake.

<sup>20</sup> Nenta hini aiiaia mini seraa sama noaiqamase iriake. Maini Isipini soqe aiiaia vaia ni aiiaiqaima varianarove kiane, kio.

<sup>21</sup> Pero vaiinkivano minki kuvo Iosepeva nai qaka vasausavaanavu qosanavuvaka qosa kaarinavuvaka nimumanka Pero vaiinkivano kuntebase, visa anirante vuama. Visa vie uvo Iosepeva visa aaraini viha ne ntaraavaka nimio,

<sup>22</sup> visa vohaiqa vohaiqa qaraasa ukavaaqa nimio, Benaminia 300 *silvaa* munimavaka ukavaaqa sauqu hiniunavu vakama seo amio.

<sup>23</sup> Iosepeva nai qoavaka aiiaia amikeo. Maa ahasanavua nai qoa amikeo: donki sauqu hiniukanta amio donkiqaa vo aiiaia vo aiiaia soqe aiiaia Isipi vakaihainaa vaa vaai donkiqaa rumpa keo donki vo sauqu hiniukanta nahe donki visavaka nai qoa amikeo, vo ntara vo ntara mparetive, vo ntarave, via qova aaraini anihao naaina ntaraa vi donkiqaa rumpa amikeo.

<sup>24</sup> Minkima seo rumpa amikeo Iosepeva nai qaka vasausavaanavu niki komanka visa vie uvo Iosepeva visaa kihao, Ne aaraini viha sa nai aki nai aki iake, kivaseo visa niki komanka vuama.

<sup>25</sup> Niki komanka Iosepea qaka vasausavaanavu Isipi mini se ou vi Kanaha vakaini nai qova vaunaini ou ntoa.

<sup>26</sup> Mini ou nte visa nai qoa kiva ami kiha, Iosepeva qaqima vaio ivo. Viva Isipini vaihao aiqava vi vakaaqaa raqisihaoma vaio ivo, kinka. Visa minki kuvo Iakovova sa visa uvaa quaheo ne unahaama kiavo kumanka visa

<sup>27</sup> viaqaankai Iosepeva visa kiva nimu uvaa nai qoa kiva ami, Iosepeva qosa kaarinavu nimua nai qoa umiqovo visa qova Iakovova vi uvaa iio qosa kaarinavu kaveo, viaqaankaio via munkusavano soqe uvo viva quahaseo

<sup>28</sup> kihao, Ne quqaama kiavo. Ki maaquvano Iosepeva qaqima vaio ivo. Saiqe ke qaqi variainanko ou via kave, ho viaqaankai ke guku viaave, kio.

## 46

### *Iakovova Isipini saku vareo vua*

<sup>1</sup> Iakovova minki kivaseo viva aiqava nai u ahasaa saku vareo Isipini vieva vua. Viva aaraini vihao Besebaini ou nteo Kotiva nai qoa Aisaakiaqaa raqisuva vauvoa kio, *ofaa* vaaseo Kotia iha quara amikoa.

<sup>2</sup> Kotia iha quara amikeo entaqi Iakovova vaikehao kaira kave vauvo Kotiva via aarehao kihao, Iakovoo, Iakovoo, kuvo Iakovova kihao, Vo, ke mainima vai uo, kuvo

<sup>3</sup> Kotiva viaa kihao, Ke Kotisave. Ke ai qoa Vaiqavano vaihama viaqaa raqisi vauusave. Are sa qekehao Isipini vuane. Qaqi vuane. Are Isipini ou vaiaqe ke ai vainkinki airiqama saaima visa noaiqamavi noa vakanaasama variake.

<sup>4</sup> Are Isipini ou viaqe ke ainti vaiha aiqaa raqisiqi vi naankiara Isipi vakaihai are suvuaama kerausa vika vare maini qaiqaa vuu saae. Naankiara are qukie ina entaa ai maaquvano Iosepeva ai vakamaseo vaiaama are guku vinaave, kio.

<sup>5</sup> Kotiva minki kuvo Iakovova Beseba mini seo vua. Viva vieva umanka via maaqunavu Pero vaiinkivano qosa kaarinavu nimua varase, nai naakanavuvaka, nai vainkinavuvaka, nai qoa Iakovoavaka, viaqi visa ntuva vare Isipini vuama.

<sup>6</sup> Visa Isipini vie iha visa Kanaha vakaini vaiha visa nai sipisipive vurimakauave mimive vakoa vare, aiavaa vakoa vare, Isipini vua.

<sup>7</sup> Iakovova nai maaqunavuvaka nai nainkinavuvaka aiqava nai vainki nahenki ntika vareo Isipini vua.

<sup>8</sup> Iakovo vakamase vaiinki nahenki Isipini vusa, visa nuku vaieva minkimama vaio: Rubeniva (Iakovo maaqu ntara hunkavano)

<sup>9</sup> Rubenia maaqunavu: Hanokiva, Paruva, Hesaroniva, Kaamiva.

<sup>10</sup> Simioniva

Simionia maaqunavu: Jemueliva, Jaminiva, Ohaativa, Jakiniva, Sohaava, Sauriva. (Kanaha vakanaa nahenki vovano Sauria vaka koa.)

<sup>11</sup> Rivaiva

Rivaia maaqunavu: Gesoniva, Kohaativa, Meraariva.

<sup>12</sup> Iutiva

Iutia maaqunavu: Eruva, Onaaniva, Seraava, Peresiva, Siraava. (Eruva Onaanisa Kanaha vakaini vaiha guku vua.)

Peresia maaqunkanta: Hesaroniva, Hamuriva.

<sup>13</sup> Isakaava

Isaka maaqunavu: Toraava, Puvava, Iopuva, Simironiva.

<sup>14</sup> Sebuluniva

Sebulunia maaqunavu: Seretiva, Eloniva, Iareriva.

<sup>15</sup> (Rubenivavata, Simionivavaka, Rivaivavaka, Iutivavaka, Isakaavavata, Sebulunivavata, vinavusa Riaa maaqunavu vauvo Riaava Mesopotemiaini vaihao vi vainkinavusa Iakovo vaka amikoa. Riaava nahenki vainki vo Dainaa vaka koa. Riaa vainkivaka naintivata vaiesa 33 vaiinki nahenki vaua.)

<sup>16</sup> Gaativa

Gaatira maaqunavu: Sifioniva, Hagiva, Suniva, Esiboniva, Eriva, Arodiva, Areliva.

<sup>17</sup> Aseva

Asea maaqunavu: Imunaava, Isavaava, Isaviva, Beriaava.

Asea raavuavano: Seraava.

Beriaa maaqunkanta: Hebeva, Marakieriva.

<sup>18</sup> (Vi vainkisa 16 navu Siripaa vainkive naintive vaua. Labaaniva Siripaa Riaa amuvo Siripaava Riaa saiqa nahenkivano vaua.)

<sup>19</sup> Iosepeva, Benaminiva. (Vikanta Iakovoa naaka Raikea maaqukanta vaua.)

<sup>20</sup> Iosepea maaqukanta: Manaseva, Efaraimuva.

(Iosepea naakavano Asenaativa vi vainkikanta vaka koa. Asenaativa Potipea raavuavano vauvo Potipeva Isipi vakanaa vaiinki nahenkiaa iihao suaiaa via vaiqavanove kivaseo via aare vau vaiinkiva vaihao vakusa vo Onini vaua.)

<sup>21</sup> Benaminia maaqunavu: Belaava, Bekeva, Asabeliva, Geraava, Nemaaniva, Ehiva, Rosiva, Mupimuva, Hupumuva, Ativa.

<sup>22</sup> (Vi vainkinavusa 14 navu Iakovosa Raikesa vainkivaka naintivata vaua.)

<sup>23</sup> Daaniva.

Daania maaqu Husimuva.

<sup>24</sup> Napataariva

Napataaria maaqunavu: Jaseliva, Guniva, Jeseva, Siremiva.

<sup>25</sup> (Vi vainkisa 7 navu Bilihaa vainkivaka naintivata vaua. Labaaniva Bilihaa Raikea amuvo Bilihaava Raikea saiqa nahenkivano vaua.)

<sup>26</sup> Iakovoa vainkivaka via naintivata Isipini vusa saara ntiea 66 navuma mini vua.

<sup>27</sup> Sa via maaqunavu naakanavu saara ntiai, qaqi via vainkivaka via naintivata saara ntuvase 66 ve ki uo. Iakovoa vainkive naintive Isipini vusavaka, Iakovoavaka, Iosepeavaka, Iosepea vainkikanta Isipini vakakosavaka, visa visa saara ntiea visa 70 navuma vaua.

*Iakovova nai vainki nahenki hampaka Isipini ou ntoa*

<sup>28</sup> Iakovova Isipini ou vihao nai maaqu Iutia naane akikeo kihao, Are ou Iosepea kiao Gosenini ani kinavu kivikaaie, kivaseo via Iosepeva vaunaini akikovo vuvu

<sup>29</sup> Iosepeva nai qosa kaari henuqama vakoa viaqi vaai nteo nai qoa vika saeva Gosenini vio ou via vika seo nai qoa ravaaqavu ukukeo via susuqama seo vusaiqama seo nai qoaa iqi raka amikeo.

<sup>30</sup> Iqi raka amikovo via qova Iakovova Iosepeaa kihao, Ho vake ke kenka kivuqo ai vii kave uo. Are quqaa qaqi variaama ki, ke quahehama quku viaave, kio.

<sup>31</sup> Iakovova minki kuvo Iosepeva nai qaka vasausavaanavuvaka, nai qoa vainki nahenkinavuvaka, kiva nimio kihao, Ke ou Pero vaiinkivano vainanaini vaiha viaa minkima kieave: Ki qaka vasausavaanavuvaka, ki qoa vainki nahentivaka, visa Kanaha vakaini variasa visa ke unanaini anintaavo.

<sup>32</sup> Vinavusa sipisipiqaave, mimiqaave, vurimakauqaave, raqisi vaiasave. Visa nai quaravaka aiaviava saku vare maini aniavo, kieave.

<sup>33</sup> Ke minki kivase Pero vaiinki kiva amiaiao viaqaankaio viva ni irehao, Ne nana saiqa varaasave? kiam

<sup>34</sup> ne minkima kiake, kenkanavu goa aanante, kenavu vainki naakiusa vaiha sipisipiqaave mimiqaave raqisiqi vi vauausave, kiake. Ne minki kivo Pero vaiinkivano niara, Ne homa Gosenini nenkaraa vaiha nenka quara vakamase vaiqi vivaave, kianarove, kio. Isipi vakanaasa sa quaraqaa raqisi vaiinkisa hampaka vohaaraqai vaieave kuaa kio, Iosepeva minki kua.

## 47

*Iosepea navunaasa hini usa Pero vaiinki ou kavoa*

<sup>1</sup> Iosepeva minki kivaseo viva Pero vaiinkivano vaunaini vio ounteo via kiva amio kihao, Ki qovavaka ki qaka vasausavaanavuvaka Kanaha mini se, nai quaravaka nai aiaviava aiqava varema maini Gosenini anintaavo, kivaseo

<sup>2</sup> viaqaankaio nai qaka vasausavaanavuginkaio sauqu hiniunavu ntikeo Pero vaiinkivano vinavusa kavaaie kio, vinavusa vuu umiqa.

<sup>3</sup> Umiqovo Pero vaiinkivano vinavusa ireo kihao, Ne nenka maaqaini vaiha nana nana saiqa varaasave? kio.

Minki kumanka vinavusa kiha, Kenavu kenkanavu goa aanante quaraqaa raqisiqi vi vauausave, kinka.

<sup>4</sup> Minki kivase vinavusa kiha, Kanaha vakainivaka sa ntara vaivo kinavu quaravano ntara naaiava sa vaimankaa ki, kenavu Gosenini vaieave, kinka.

<sup>5</sup> Vinavusa minki kuvo Pero vaiinkivano Iosepeaa kihao, Ai qovavaka ai qaka vasausavaanavuvaka are iananaini aniavo.

<sup>6</sup> Isipi vaka visa vakavakama varianarove. Are vaka soqea visa nimia visa nai quara vakamase mini variake. Visa qaqi saima Gosenini variake. Are kavaia visaqinkai

vonavu vurimakauaqaqaa raqisi saiqaa anomase kavaivea, vi vaiinkinavusa homa ki vuri-makauaqaavaka raqisivaave, kio.

<sup>7</sup> Pero vaiinkivano minki kuvo Iosepeva nai qoa Iakovoa vikeo vuu Pero vaiinkivano vaunaini sovo Iakovova via uva mantovo

<sup>8</sup> Pero vaiinkivano Iakovoa ireo kihao, Are nanki nankima ihie vaase iao? kio.

<sup>9</sup> Minki kuvo Iakovova Pero vaiinkiaa kihao, Ke maa vakaqaqaa vona vona vaiqi niha 130 ihi varase uo. Ki qovavaka ki saivaqavavaka airi ihi vakaini vaiqi vusa vaumanka ke sa visa aanante airi ihi vaiqi viai, ke vaiqi viha vusaai qukuqi viha mantaiqamavi vaiha vaiqi vunaave, kio.

<sup>10</sup> Minki kivaseo Iakovova nai sauqu kure ra seo Pero vaiinkiaa Kotiva ai soqema amikaaiie kivaseo Pero vaiinki mini seo vuama.

<sup>11</sup> Iosepeva nai qovavaka nai qaka vasausavaanavuvaka ntika vareo Pero vaiinkivano kuntema seo, soqe vaka vaunaini visa vuu somanka mini vaua. Vi vakava aiqava Isipi vaka, vo vaka vo vaka aakara seo soqe vaka vauvo vakusa vo, Ramesesi kakaqaqaa vaua.

<sup>12</sup> Iosepeva visa mini vuu seo nai qovavaka, nai qaka vasausavaanavuvaka, aiqava visa vaiinki nahentivaka, viva visa ntara nea nimumanka visa ho neha vaua.

*Iosepeva ntara raira sehao vo vakanaa vo vakanaasa nimua*

<sup>13</sup> Vi entaa ntara sa qampiçovo Isipinivaka Kanaha vakainivaka sa ntara vaumanka vi vakanaasa vi vakanaasa ntaraa antuqa auvo sa visa mpeqa vaumanka vaiha

<sup>14</sup> visa vo Iosepeva vaunaihai munima aquseha ntara varovo Iosepeva vi munimaa vareo Pero vaiinki amua.

<sup>15</sup> Isipi vakanaasavaka Kanaha vakanaasavaka ntara varaesa munima aquqi vivi vuu nai munima kaiqa soa. Isipi vakanaasa Iosepeva vaunaini ou nte kiha, Umpo, ntara qaqi kinavu kimiane. Are ntara sa kinavu kimiaqe kenavu quku vuaoave. Kinavu munima kaiqama vivo. Umpo, qaqi kinavu saihagiane, kinka.

<sup>16</sup> Visa minki kuvo Iosepeva kihao, Ni munima sa vaiea, nenka quara ki kimihama ntara varaake, kumanka

<sup>17</sup> visa nai qosave, sipisipive, mimive, vurimakauave, donkive, Iosepea amihama ntara varoa.

<sup>18</sup> Vi ihia ntara sa vaumanka vi vakanaasa minkimaqi vuvo vo ihi anintomanka Isipi vakanaasa Iosepeva vaunaini qaiqaa ou nte kiha, Noa vaiinkio, kenavu maa uvaa quqeqa saaoave. Kinavu munima kaiqama vivo kinavu quara vairi ainiqama vivo. Umpo, nana ahasae ai amiha ntara vararaave? Kintanavu vaakavanovaka kinavu vakavanovakaqaima qaçima vaio ivo.

<sup>19</sup> Are sa kinavu ntara kimiaqe kenavu quku vuaoave. Umpo, are kinavu saihagiane. Kenavu kenkanavu vaka vakamase kaiqa vuaoave. Are ntara kinavu kimihaama kinavu-vaka, kinavu vakavaka, varaane. Kenavu Pero vaiinki karavusa vaiinki voqaama vaiha via saiqaa vaa amikaaiio kinavu vakavano viainiqama vuanarove. Ntaravaka suvuvaka kinavu kimiaqe kenkanavu ukuseha namaqi viha qaqi variaie, kinka.

<sup>20</sup> Sa ntara vau entava manta entaqai vaumankaa ki, Isipi vakanaasa minki kuvo Iosepeva visa ntara nimihao Pero vaiinkiaa iihao visa vaka varovo visa vakavano Pero vaiinkiniqama vio.

<sup>21</sup> Visa vakavano Pero vaiinki viainiqama vumanka aiqava Isipi vakanaasa Pero vaiinki via saiqaa varosaqai vaua.

<sup>22</sup> Iosepeva ntara nimihao Isipi vakanaasa vaka vareo vo vaiinkinavu vakaqaima sa varoa. Vi vaiinkinavusa Isipi vakanaasa vaiqa nuku kure re vau vaiinkisa vauvo Pero vaiinkivano visa ho variake kio munima visa nimi vauvoa kio, Iosepeva sa visa vaka varomanta visa nai vaka qaqi ukukoa.

<sup>23</sup> Iosepeva qaqi vaiinki nahenkiaa kihao, Ho ke ntara ni nimihama nivaka ni vakavaka varauo nevaka ni vakavanovaka Pero vaiinkiniqama vivo. Ho maa ntara suvua vare vakaqi vuu ukuake.

<sup>24</sup> Ntaravano qampiçeo mpeqaiçia ne ntara qantu vare rairase, kaaraqanta kaaraqanta nenka ukuke, vohaiqa Pero vaiinki amiake. Ne hini ntara ukukeha homa namaqi viha qaiqaa qukuqi vivaave, kio.

<sup>25</sup> Iosepeva minki kumanka vi vakanaasa kiha, Noa vaiinkio, are ntara kinavu kimiaavea kenavu sa quku viai, qaqi vai uo. Umpo, are kinavu soqema kimikaaroo. Kenavu homa Pero vaiinki via saiqaa vaaqi viaave, kinka.

<sup>26</sup> Visa minki kuvo Iosepeva vi uvaa mpeqaiçama seo vakehao Isipi vakanaasaa kihao, Ne ntara ukukea nenka hini nehama hini Pero vaiinki amiake, kua. Maa entavaka Iosepeva kivako uvava qaçima vaio. Isipi vakanaasa vaiqa nuku kure re vau vaiinkisaqaima nai vaka qaqi ukukeha vauvo visa vakavano sa Pero vaiinkiniqama vua.

<sup>27</sup> Iakovovavaka via vainki nahentivaka Gosenini vaiqi viha airi aiaia vakomanka visa vainkintivaka airiqama vumanka visaa Isiraia vakanaasave kua.

<sup>28</sup> Iakovova Isipini 17 ihi vaiqio vio 147 ihi vaasova quku vua.

<sup>29</sup> Viva quku vuaia entava aumanko vauvo Iakovovave Isiraivave nai maaqu Iosepea aarama seo kiva amio kihao, Are nena sauqu aiqiqaa aqusehaama nena hini sauqu ki avuntaaqa vakehaama kiriara kihaama, Sa ai Isipi vakaqi quntama kareave, kiane.

<sup>30</sup> Ke quku vuaiaa are ki vaaka varea Isipi maini sea ki qoavaka ki saivaqaavaka quntama keaqi ki vaakavaka vuu mini quntama kaane, kio.

Via qova minki kuvo Iosepeva kihao, Are kinantemase ke minkieave, kio.

<sup>31</sup> Minki kuvo via qova kihao, Nena sauqu aiqiqaa aqusehaama ke quqaa minkieave kiane, kuvo Iosepeva ke quqaama minkieave kuvo viaqaankaio Isiraiva nai kaintaqa vaikehao Kotia auku kure rehao vaua.



## MATIU 13

*Iсуva numiiaа uantaseo kiva nimu uvaa*

<sup>24</sup> Iсуva vaihao vaiinki nahenki uva vo uantaseo kiva nimio, Kotiva vaiinki nahenkiqaa raqisiainaa maa uvaa via voqaama vaio ivo. Vaiinki vovano soqe suvu *uiti* suvu nai avukaqi ukukeo

<sup>25</sup> ou entaqi nai navunaasa hampaka vaike vauvo via navukaava vovano aniteo uiti ukukoaqi numii uku amikoave. (Vi numiiva via saqive mareve *uiti* saqi mare vohaa vaivo via kavaqai sa vohaa vaiave.) Via navukaava numii uku amikeo vuvo

<sup>26</sup> *Uitivano* numii vakamaseo vohaaraqі qampiqakeo amparaiqasa kava irakaeva auki vaumanka via saiqа vainkinavu kavovo vi numiiva *uiti* vakamaseo qampiqа keo vau-manka

<sup>27</sup> via saiqа vainkinavu vuu naaho qoa kiva amiha kiha, Noa vaiinkio, ae sae soqe suvu ukukaarao? Kaihaioe vi numiiva anio ivo? kinka.

<sup>28</sup> Minki kuvo viva oho kio, Ki navukaava vovano numii uku kimikeo ivo, kumanka via saiqа vainkinavu via irehama, Hoe kenavu ou vi numiia nuqu saraave? kuvo

<sup>29</sup> viva aqao kio, Sa numii via nuqu saake. Ne numii nuqu sehama uiti vakamase rauvusevoave.

<sup>30</sup> Qaqi saivo uitivanovaka numiivanovaka vohaaraqі qampiqaaie. *Uitivano* mpe-qaiqama viaqe ke ki ntara qantu vare anisaraama minkima kieave. Vi numiia naane keqase rumpa sema vuu iha quara kimikema viaqaankaima *uiti* keqasema vuu ki ntara naavuqima vuu kimikaake kiaave, kio. Iсуva vi uvaa uantaseo kiva nimua...

<sup>36</sup> Iсуva vaiinki nahenki uva uantaseo kiva nimiqi vio viaqaankaio viva vaiinki nahenki mini seo naavuqi vumanka via vainkinavu viva vauaqi uu ntema kihama, Vaasa kianaа via navukaava numii via avukaqi uku amiko uvaa vi uvaa osara kiva kimiaqe iriaе, kinka.

<sup>37</sup> Via vainkinavu minki kuvo Iсуva vinavusa kiva nimio kihao, Vaiinki vovano soqe suvu ukuko vaiinkiva vaieva ke visave. Ke vakaini vakakai vainkisa ke vi vaiinkisave.

<sup>38</sup> Vi vaiinkia avukaqi vau vakava vaieva via vaka aiqava maa vakaa aiqava naako vakama vaio ivo. Soqe suvuvano vaieva suvuvano Kotia uva iia vaiinki nahenkisama vaiavo. Numiivano vaieva sa Kotia uva iia vaiinki nahenkisama Satanaа vainkima vaiavo.

<sup>39</sup> Via navukaava uku amiko vaiinkiva vaieva viva Satanavave. Ntara qantu vare anu entava vaieva aiqavaа entave maa vakaa kaiqaaina entava vaio ivo. Ntara qantu vare anu vainkisa vairesa visa naauaihainaasave.

<sup>40</sup> Via saiqа vainkinavu numii keqa sema rumpa sema vuu iha quara amikontemase naankiara aiqavaа entaqaa minkima qovarai qianaove.

<sup>41</sup> Ke vakaini vakakai vainkisa vaiqi vi aiqavaа entaqaa ke naauaihainaasa nikikaiaia visa oku ke raqisiaina vakaаqaankai ki vainki mantaiqama nimike vai vaiinki nahenkisa rumpa vare vaaqu saiqа vare vaisa rumpa vare

<sup>42</sup> ntika vuu noa iha ikainaаqi aqu saimanka visa ihaqi vaiha iqi rakaqi viha aarai kenki kiha vaivaave.

<sup>43</sup> Visa mini vuu aqusaimanka avuqavumase ni vaiinki nahenkisa suaivano ikainan-temase ikaqi vivo Kotiva visa qova visaqaa raqisiqio via vaiqi vivaave. Ni aako vaiea vi uvaa osara iriake, kua. Iсуva kuama.

## 14

*Iсуva varuva namaiqaa qaqi nua*

<sup>22</sup> Iсуva ntara nimio viaqaankaio nai vainkinavu nikikeo kihao, Ne kaanuqi vaai nte varuva namai hini vankaraini ne naane ou vi vaiqe ke vaiinki nahenki nikikaiaia nai maaqa nai maaqa vuake kio.

<sup>23</sup> Minki kivaseo viva vaiinki nahenki nai maaqa nai maaqa mini nikikama seo viaqaankaio Kotia aaraeva veraa aiqinaqaa vuvo entama vuvo viva mini nariaraа vauvo

<sup>24</sup> kaanuvano vakaihaio niaа ntaka vauvo uvaivano visa viea unaihaio anuvoa kio namaiivano kaanu veqa veqamaqi vi vaua.

<sup>25</sup> Uvai uki vauvo namaivano kaanu veqa veqamaqi vi vauvo amparaiqasa aakikaeva uvo Iсуva namai avu vau nuvaqi vio visa vunaini vumanka

<sup>26</sup> via vainkinavu kavovo viva namai avu vau ni vaumanka visa voqamase aaku ikomanka noaiqaase qeke vaiha oi oi kiha vaanave kiha vauvo

<sup>27</sup> Iсуva vaasa visaa kihao, Mpeqaiqamavi qaqi variake. Ke visave. Sa qekaake, kio.

<sup>28</sup> Iсуva minki kuvo Pitaava kihao, Noavauvo, ae quqaa vaiea kiva kimiaqe kevaka namai auha vau ae vainanaini vuae, kio. Pitaava minki kuvo Iсуva ho kuvuane kio.

<sup>29</sup> Kuvo Pitaava kaanuqinkaio vaavi nteo kaanu mini seo namai avu vau Iсуva vaunaini vio.

<sup>30</sup> Viva mini vihaoma ho viae kivaseo kavovo uvaivano voqamaseo uki vauvo viaa iihao viva qekehao viaqaankaio namaiqi kukuvieva auki vaihao Isua aaramaseo, Noavauvo, ki ukuvaraane, kuvo

<sup>31</sup> Iсуva vaasama nai sauqu kukuseo via ukuvaeo kihao, Ae sa uvaivano ukiaa iiakaa kiriaraqai iikaave. Sa kiriara kaara aako iriane, kio.

<sup>32</sup> Iсуva minki kivaseo visanti kaanuqi vaai ntovo uvaivano vaasa kaiqa vumanka

<sup>33</sup> via vainkinavu kaanuqi vaua Isua quahama amikeha kiha, Ae quqaama Kotia maaquvano variarao, kio kuama.

## 26

### *Iuntaasiva Isua vuu kuka saainaama munima vaoa*

<sup>14</sup> Iсуva minki kuvo Isua 12 vainkinavuqinkaio vo vaiinkivano via auku Iuntaasi Ikeriotiva veva nteo Kotia saiqva vara amike vau vaiinkisa visa noa vaiinkinavu vaunaini vio

<sup>15</sup> ou visa ireo, Ke Isua ni sauquqi vuu kuka saaea ne nana soqaae ki kimivaave? kumanka visa oi munima 30 navu saara ntuvasa amuvo Iuntaasiva vi munimaa vaeo

<sup>16</sup> vi entaaqaankaio nai visa sauquqi Isua kuka saaina aaraa aikukiha vaua.

### *Iсуva nai vainki hampaka vehasumako ntaraa noa*

<sup>17</sup> Sa noqavi mpareti saraa ovaka naaina entanavuva ani ntovo hoqarenaa entaqaa via vainkinavu Iсуva vaunaini aninte kiha, Karaqie kenavu ou henuqama amikaaiiaa ae vehasumako entaa iihaama vi ntaraa nenaave? kinka.

<sup>18</sup> Vinavusa minki kuvo Iсуva kihao, Nenavu Ierusalem vakusaini ou vi vaiinkiaa minkima kiake. Kinavu maara ki vai vaiinkiva kihao ki entama aninteo ivo. Ke kenka vainki hampaka ai naavuqi vehasumako ntaraa naeave kio ivo kiake, kio.

<sup>19</sup> Iсуva minki kumanka via vainkinavu vi ntaraa kunte mase henuqama vakoa.

<sup>20</sup> Henuqama vakovo entuvo Iсуva nai vainkinavu hampaka ou ntaraa kaintaqaa oquvi vaihao

<sup>21</sup> ntara nehao kihao, Ke kiaima iriake. Niqinkaio vovano navukaasa nivuqaa ki qovarama saanaove, kio.

<sup>22</sup> Minki kuvo via vainkinavu munkusa mantaiqumanka vinavusa vohaiqa vohaiqa Isua irema, Noavauvo, ae kiriarae ki variarao? Sa ke visavauve, sa ke visavauve, kivaqi vi.

<sup>23</sup> Minki kivaqi vuvo Iсуva kihao, Nai mpareti varaseo ki vakamaseo kanuqi vaaki quntaaseo ne vaina vaiinkiva vi vaiinkiva ki qovarama saanaove.

<sup>24</sup> Ki vakaini vakakai vainkisa kiriara vekanko entaqaa minkima ki haruseaa qara ntuva koave. Vi uvava vivauma vaianaove. Ki vakaini vakakai vainkisa qovarama saaina vaiinkiaa oho kiva amike uo. Via nova sa via vakakaiaqe hove kiakaave, kio.

<sup>25</sup> Iсуva minki kuvo Iuntaasiva via qovarama saaiava Isua ireo, Maara ki variarao vainkio, kiriarae ki variarao? kuvo Iсуva kihao, Eo, ae kianaave, kio.

### *Mpareti ntaraa uaini namaiaa kiva koa*

<sup>26</sup> Isua vainkinavu ntara ne vauvo Iсуva mpareti ntara varaseo Kotiaa soqema iarao kivaseo nkuseo nai vainkinavu nimio kihao, Maa ntaraa vara naake. Maa mparetiva ki vaakama vaio ivo, kio.

<sup>27</sup> Minki kivaseo viva uaini namai viaqi vau kaapaa vaaseo Kotiaa soqema iarao kivaseo vinavusa viki nimihao kihao, Ne aiqava maa namaia naake.

<sup>28</sup> Maa namaiva ki naarema vaio ivo. Kotiva vaiinki nahenki hampaka vohaaraqai ruvaantumavi vaieva qaraasa uva vakaevave. Vi uvava mpegaigama vuae kio ki naarevano vi uvaa mpegaigama saanaove. Ki haru saivo ki naarevano ntehao airi vaiinki nahenki saiaqihao visa manta uva nunka nimikaanaove.

<sup>29</sup> Ke kiaima iriake. Maa entaaqaankai ke sa uaini namai qaiqaa naeave. Ke sa narai minkiaqi vuaia ne ki qova raqisiainaqi ki vakamaseo ou vaiqe vi entaaqaa ni hampaka vaiha qaraasa uaini namai naeama ivo, kio.

<sup>30</sup> Iсуva minki kivaseo nai vainki hampaka Kotiaa ihi kivaseo veva nteo Orivi aiqinaqaa vuama.

### *Iсуva Pitaava nai kie iaina uvaa kiva amua*

<sup>31</sup> Vinavusa mini vuvo Iсуva vinavusa kiva nimio, Nenavu vake entaqi ki maini sema aiqiu aukuke santama vivarae. Kotia vukaqi qara ntuva ko uvava vake vivauma vaianaove. Minkima kio:

Sipisipiqaqaa raqisina vaiinkia  
Kotiva via ruquku saia sipisipi visa qekase  
nariara nariara vona vona vivaave, kuave.

<sup>32</sup> Ho naankiara ki vaa qaqi himpima saiaqe vaiha ni nivuni ke naane Kariri vakaini vieave, kio.

<sup>33</sup> Isuva minki kuvo Pitaava aqao kio, Aiqava vinavusa ai maini se aiqau aukuke santama vivea keqai ainti maini vaieave, kio.

<sup>34</sup> Pitaava minki kuvo Isuva kihao, Ke kiaiama iriane. Vake entaqi kokoraavano sa uva kiaa ae kaaramo naini kiriara kihaa sa via kavaunaave kinaave, kio.

<sup>35</sup> Isuva minki kuvo Pitaava aqao kio, Ke sa ariara sa kavaunaave kiaave. Ai vakamase kivaka haru saivea sa ke minki kiaave, kio. Pitaava minki kumanka Isua vainki hini usavaka vi uvaaqai kua.

*Kesemanini saqava ukukoaqi Isuva vua*

<sup>36</sup> Viaqaankaio Isuva nai vainki hampaka ou vio saqava ukukoaqi via aukue Kesemani viaqi ou nteo nai vainkinavuaa kihao, Nenavu maini oquvi vaiqe ke vuuni ou Kotia aaraae, kivaseo,

<sup>37</sup> Pitaaravaka Sepakia maaqukantavaka vinavusaqai ntika vaeo mini vihao noa aako iuvao via munkusavano mantaiquvo

<sup>38</sup> viva kaaramonavuaa kihao, Ki munkusavano noaiqaaseo mantaiqama ihavihao ki haru saeva voqaama vaimanka vai uo. Nenavu maaqaa vaiha ki vakamase vaiha avu rampai sehama aikukiha variake, kio.

<sup>39</sup> Minki kivaseo viva amparaiqasa ou vio viihao ou vakaini hiqinti vio Kotia aarehao kihao, Umpo, ki qo, ae hove kiesa ke ihavina namaia naainaa voqaama ae vi namaia qaqini vaa kimikaane. Ho sa ke kenka varaakaa iraqe vaaeave. Ke ae varaakaainaa vaaeave, kio.

<sup>40</sup> Isuva minki kivaseo ouranteo nai vainki kaaramonavu sonaini kuvu kavomanka vinavusa avu kauntomanka vaike vauvo viva Pitaaraa kihao, Nankihae ne kaaramonavu ki vakamase amparaiqa vaiha sa avu rampai seha aikukiha vaiavo?

<sup>41</sup> Ninavuaa vinavusa manta saiqaa varaake kio Satanava ninavu avakaantooa viaa iiaha aikuki vaiha Kotia aareha variake. Ninavu maraquavano minkiakaa ivo ni vaakavanoqai sa ho mpeqaiqimanka vaiavo, kio.

<sup>42</sup> Isuva minki kivaseo qaiqaa kaaramonavu mini seo ou qaiqaa Kotia aarehao kihao, Umpo ki qo, maa kaapaqia vaina namaia sa ae qaqini vaa saraia qaqi naane kiesa ke ae varaakaainaa vaaeave, kio.

<sup>43</sup> Minki kivaseo qaiqaa ouranteo kuvu kavovo via vainki kaaramonavu avu kauntomanka vaikake vinka.

<sup>44</sup> Vinavusa vaikake vauvo Isuva qaiqaa vinavusa mini seo qaiqaa ou vio Kotia kaaramo naini aarehao vaasa kuntema seo qaiqaa kio.

<sup>45</sup> Kotia aarama kaiqaseo Isuva ouranteo kaaramonavuaa kihao, Ise, nenavu ho ihae vaike vaiavo? Ho kavaake. Ki entama aninteo ivo. Ki vakaini vakakai vainkisa ki ravaaqau vare vuu goa saiqaa vare vaisa sauquqi kuka sevaave.

<sup>46</sup> Himpiqenavu vuae. Ki qovarama saaiia vaiinkiva anima vaio ivo, kio...

*Iuntaa noa vaiinkinavu nivuqaa Isua vuu soa*

<sup>56</sup> ...Isva minki kumanka visa via ravaaqau somanka via vainkinavu via mini se aiqau aukuke vuama.

<sup>57</sup> Via vainkinavu aiqau aukuke vumanka Isua ravaaqau kosa via vika vare Kotia naavuqi saiqaa vare vausa visa avuniasa vaiinkivano vauaqi Kaiapaasia naavuqi vuu somanka vi naavuaqi maara osara ki vau vaiinkinavusavaka Iuntaa vaiinki noanavuvaka usi vaua.

<sup>58</sup> Isua vika vuu se vauvo Pitaava niaraihao visa avakaqi vio Kaiapaasia naavu vakusaini ou nteo uvisaqinkaio vaakinteo avukaqi vio vi ahasava qovarai qiainaa kavaeva ou vi naavua maintaraa raqisi vau vaiinkinavusa hampaka oquvi vaua.

<sup>59</sup> Pitaava mini vahaqaqini vaumanka naavuqi Kotia naavuqaa raqisu vaiinkisavaka aiqava viaqi usi vau vaiinkisavaka visa Isua arusaesa Isuaqaa una uva vakaee kuvo

<sup>60</sup> sa vi uvava vaumanka qumina vi uvaa rantehama vo vaiinki vo vaiinki himpi Isuaa una uva kua. Minkimaqai kumanka viaqaankai vaiinki kaaraqanta himpi

<sup>61</sup> Isuaa kiha, Maa vaiinkiva minki kimanka kekanta iunaave. Viva kihao, Ke homa Kotia naavu rampai aquse viaqaankai kaaramo entaqai vaiha vi naavua qaiqaa saqa kaiqa saraave kiave, kinka.

<sup>62</sup> Vikanta minki kuvo Kotia saiqaa vaa amike vausa visa avuniasa vaiinkivano himpi Isuaa kihao, Vikanta minkima aiqaa uva vakeha ki vaiavo. Ae vo? Naikantaa nana uvae kinaave? kuvo

<sup>63</sup> Isuva sa uva kiaio evaara vauvo qaiqaa avuniasa vaiinkivano Isuaa kihao, Ke Kotia avuqaa vaiha via auku ntehama ariarama quqaa uva kiane ki uo. Quqaae Kotiva ai akikaivaee ae kinavu saihaqiaiva mesaia vaiinkivano variarao? Quqaae ae Kotia maaquvano variarao? Kinavu kiva kimiaqe iriae, kio.

<sup>64</sup> Viva minki kuvo Isuva kihao, Ae kianaa ke maa visave. Ke kiaima ne iriake. Ne naankiara kavaiqe ke vakaini vakakai vainkisa noaiqamavi Kotiva mpeqavano vaiinanaini via sauqu kanaraini oquvi vaiha konavuqaa kuvieave, kio.

<sup>65</sup> Isuva minki kuvo Kotia saiqaa vaa amike vauva visa avuniasa vaiinkivano nai ukavaaqa nahaqu aquseo kihao, Oho, viva Kotia avuqaa vaihao vaaqu uva kio ivo. Vo vaiinki viaqaa uva vakaaina vaiinkia qumina aarevoave. Kavaake. Ne ii vaiavo viva Kotia avuqaa vaihao vaaqu uva kio ivo.

<sup>66</sup> Via saara ne Isuaa nana uvae kivaave? Kiqe iriae, kio.

Minki kumanka visa kiha, Via vaaqu saiqaa urimakareo ivo. Via saara via arusaaiavaqaima vaio ivo, kinka.

<sup>67</sup> Visa minki kivase ou Isua viiqi kaara vihise visa nai sauquqo via ruqukuse via avu aako ruqema aquseha

<sup>68</sup> visa ruheha viaa kiha, Mesaia vaiinkio, ae quqaa uva qoqaiqama sea vaiinkiva vaiea sa kavaraia ai arina vaiinkia auku ntaiaqe iriae, kinka.

#### *Pitaava Isuaa sa kavaunaave kua*

<sup>69</sup> Naavuqi minkiaqi vi vauvo Pitaava vahaqaaini vakusaqaa oquvi vauvo saiqaa nahenki vovano Pitaara aumanko vio viaa kihao, Aevaka Isua Kariri vakaihainaa visanti variaraave, kio.

<sup>70</sup> Viva minki kuvo Pitaava visa nivuqaa vaiha aqao kio, Ae kiana uvaa sa ke ii uo, kio.

<sup>71</sup> Viva minki kivaseo ou uvisa qentiana vauvo saiqaa nahenki vovano via kaveo mini himpi vausaraa kihao, Maa vaiinkiva Isua Naasaretihainaa visanti vaivave, kio.

<sup>72</sup> Minki kuvo Pitaava sauqu aiqiqaa aquseo kihao, Sa ke vi vaiinkia kavaunaave, kio.

<sup>73</sup> Minki kivaseo amparaiqa vaumanka mini himpika vauva Pitaava vaunaini ou nte viaa kiha, Isua vainkinavu vi vakanaasa vaiavaa quqaama aevaka vohaa vi vakanaavaqaima variarao. Visa uantase maa uvaa ki vaiantema sea aevaka ki variarao, kinka.

<sup>74</sup> Visa minki kuvo Pitaava sauqu aiqiqaa aquseo kihao, Ke sa quqaa uva kiaio Kotiva ki homa haruanaave. Ke quqaama ki uo. Ne ki vaia vaiinkia sa ke via kavaunaave, kio.

Pitaava minki kuvo vakeni kokoraavano uva kuvo

<sup>75</sup> Pitaava viaqaankaio Isuva kiva amu uvaa iikeo. Isuva minkima kuave. Kokoraavano sa uva kiaa ae kaaramo naini kiriara sa via kavaunaave kinaave ku uvaa iikeo viva aqaaini vuvu via munkusavano mantaiquvo iqi rakoa...

## 27

#### *Isua quntama koa*

<sup>57</sup> Entuvo Arimatihainaava airi aiaia vake vau vaiinkiva ou nteo. Via auku Iosepeva viva Isua vainki vaua.

<sup>58</sup> Vi vaiinkiva ou nteo Pairaativa vauaqi ou Isua vaaka kimiaqe quntama saae kuvo Pairaativa nai sontia vaiinki nikikeo Isua vaaka via amiake kuvo

<sup>59</sup> Iosepeva ou via vaaka sakaiqaankaio viqu munkuvi seo qaraasa kavuna eqara kavuna varaseo via apuqama seo

<sup>60</sup> munku nai qukuainaa iihao vaka ntukoqai qaraasa oi ntukoqai vea vakeo noa oi vo via veqa vaeo oi ntukoa via nona vii kinkaseo mini vumanka

<sup>61</sup> Mariava Makataahainaavavaka via varanova vo Mariavavaka vikanta oquvi vauvo vukua hini vantaraini Isua quntamako oiva vaua.

# MAAKI

## 4

### *Vaiinkivano suvu qintako vasaasaa kua*

<sup>1</sup> Qaiqaa Iсуva varuva namai avaini ou vaihao vaiinki nahenki uva vasaasa kiva nimiae kumanka vaiinki nahenki airinti ruvaantumavi via ukukuma sovoa kio viva qaqia seo kaanuqi vaointeo viaqi oquvio namaiqaa vaumanka vaiinki nahenki vuku vantaraini namai ausini vaua.

<sup>2</sup> Visa vakaini namai ausini vauvo Iсуva vo uva vo uva uantaseo kiva nimio.

<sup>3</sup> Viva kihao, Ke kiaima iriake. Vaiinki vovano suvu qintaeva vuave.

<sup>4</sup> Viva suvu qintaqi vuvo hini suvuvano aara ausini hiqintuvo uviivano ani nama aqu soave.

<sup>5</sup> Minkuvo suvu hininavuvano oi vakaqaa hiqintuvo vakavano sa vevakoma vau vakava vauvoma kio hiqivio vaasa qampiqa kovo

<sup>6</sup> suaivano uunteo ikehao aahara usu sovo via kuqa sa veva nto oku vuua kio aahara usu vuave.

<sup>7</sup> Minkuvo suvu hininavuvano numii qampiqaqi hiqivio numii hampaka qampiqa kovo numiivano ravaaqau sovo sa kavavaka irovo.

<sup>8</sup> Minkuvo suvu hininavuvano soqe vakaqaa hiqivio soqema seo qampiqaehao vuu soqe kava irakovo hini suva via aakara seo qampiqaehao vuu soqe kava airi kava irakovo hini suvavaka via aakara seo soqe kava airi kava irakoave, kio.

<sup>9</sup> Iсуva vi uvaa uantaseo kiva kaiqa seo kihao, Ni aako vaiea vi uvaa osara sankunkase iriake, kio.

<sup>10</sup> Iсуva uva kiva nimi kaiqa somanka vaiinki nahenki nai maaqa nai maaqa vuvo Iсуva nariaraa vaumanka via vaiinki 12 navuvaka vo susavaka viva vaunaini ani nte Iсуva uva uantaseo ku osaraa sa iirai viraa irovo

<sup>11</sup> Iсуva kiva nimio, Kotiva vaiinki nahenkiaqaa raqisiaina uvaa quqekakai uvaa vi uvaraa Kotiva niara visa qaqi saia vi uvaa osara iriake kivaseo qaqi vaiinki nahenki aaqaini vaisaa vi uvaa osara sa vukusea kiva nimiane kivea ke vi uvaa uantase visa kiva nimi vai uo.

<sup>12</sup> Ke uva uantase kiaima vaiinki nahenki kavehama sa sankunkase kavevaave.

Visa ki uvaa aako kara i vaiha sa anoma iivaave.

Visa ki uva iihama visa nai manta saiq qaqia saivovauve Kotiva visa nai manta saiq vare uvaa nunkama nimikaanaove, kio.

<sup>13</sup> Iсуva minki kivaseo vinavusaa kihao, Ne vo? Ke uva uantase kuna osaraa sae iriavo? Ne sa vi uvaa osara iirai ke naankiara uantase kiaina uvaa ne nankimase ho iivaave?

<sup>14</sup> Ke vaasa uva uantase kuna osaraa kieave. Vaiinkivano suvu qintakoa vi uvaa osara vaieva Kotia uvama vaio ivo.

<sup>15</sup> Suvu aaraqaa hiqintu uvaa via osara vaieva vaiinki nahenki hininavu via suvu voqaama vaiaave. Vi vaiinki nahenkisa Kotia uva iavo Satanava ani nteo visa munkusa aakoqinkaio raqia saiaave.

<sup>16</sup> Hini vaiinki nahenki oi vakaqaa hiqintu suvua voqaama vaiaave. Vinavusa Kotia vasaasa ii vi uvaraa quahamase vaivo

<sup>17</sup> uvavano sa visa munkusaqi oku vimanka vi vaiinki nahenkisa sa vaivaqaima vaiqi vi sa vi uvaa iirai vaiamanka vi uvaa saara vo sisa visa mantaiqama nimikaesa auki vaiamanka visa ki haruanto kiha Kotia uva vaasama qaqiase vaia vaiinki nahenkisa vaiaave.

<sup>18</sup> Hini vaiinki nahenki numii qampiqaqi qintako suvua voqaama vaiaave. Vi vaiinki nahenkisa Kotia uva ii

<sup>19</sup> viaqaankai visa vakaihinaa ahasaa noaiqamase iiqi viha munima aiaiaa quahaseha vo ahasa vo ahasa varaesa iiqi viha Kotia uva qaqia saavo Kotia uvavano sa vi vaiinki nahenkisaqi vaivaqama vaiqi vi vaiamanka vaiaave.

<sup>20</sup> Visa minki vaiamanka hini vaiinki nahenki soqe vakaqaa qintako suvua voqaama vaiaave. Vi vaiinki nahenkisa Kotia uva ii vi uvaraa quqaave kivase vi uvaa iiqi viha soqe saiq Kotia vara amikaqi vi vaiaave. Hini vaiinki nahenki vi uvaa iiha soqe saiq Kotia vara amikaqi vi vaiamanka hini vaiinki nahenki visa naakarase Kotia saiq soqemase vara amikaqi vi vaiamanka hini vaiinki nahenki visa saiq naakarase uikare Kotia saiq soqemase vara amikaqi vi vaiaave, kio. Iсуva kuama...

## 5

*Sairaasiva Isua ou vika varoa*

<sup>21</sup> Vi vakanaasa Isuaa sa maasa maaqaini variane kuvo Isuva kaanuqi ani ranteo namai kaqa vareo varuva namai hini vantaraini vumanka mini vaiinki nahenki airima ruvaantumavi viva vaunaini ukukumavi vauvo

<sup>22</sup> Vaiinki vovano vi vakusaqi maara naavuqaa raqisi vauva Sairaasiva ani nteo Isua kaveo via aiqukaaini hiqinti vio Isuaa

<sup>23</sup> umpo ise kihao, Ki raavuauvano guku vuaiava aumaiqio ivo. Ae ania nena sauqu viaqaa vakaiao via auriaavano kaqa viao ho qaqi vaiaie, kio.

<sup>24</sup> Vi vaiinkiva minki kuvo Isuva visanti vua...

<sup>35</sup> ...Isuva visanti aaraini vi vaumanta vaiinkinavu Sairaasia vikase viaa kihama, Ai raavuavano gukumama vio ivo. Maara ki vaina vaiinkia sa qaiqaa ravaaqavu saane, kuvo

<sup>36</sup> I SUVAVAKA VINAVUSA UVA IIO MAARA NAAVUQAA RAQISI VAVU VAIINKIAA KIHAA, SA QEKAANE. Kiriara mpegaqihaa variane, kio.

<sup>37</sup> Isuva minki kivaseo viva Pitaaravaka Semisiavaka Semisia qaka Iohaneavaka vinavusaqai ntika vareo

<sup>38</sup> Sairaasia naavuqi ou nteo kavomanka vaiinki nahenki noaiqamase oi oi kiha umpo ise kiha iqi rake vauvo

<sup>39</sup> Isuva naavuqi oiqekeo kihao, Nana ahasaae iqi rake vaiavo? Vi nahenki vainkiva sa guku vio ivo. Viva qaqi vaikema vaio ivo, kio.

<sup>40</sup> Isuva minki kumanka visa Isua uvaa naahaama amike vauvo Isuva aiqava vaiinki nahenki vara veva vahaaqaini seo nahenki vainkiu via nosa qosavaka kaaramonavu nai vakamase anusavaka vinavusaqai ntika vareo nahenki vainkiu guku vunaini ou nteo

<sup>41</sup> via sauqu ukuvareo nai uvaqinkaio kihao, Tarita kumi, maa nahenkivauvo, ke ariara himpuanema ki uo, kio.

<sup>42</sup> Isuva minki kuvoma vi nahenki vainkiuva vaasa himpio nio. Viva 12 quara varaseo himpio ni vaumanka vinavusa via kave rankumavi voqamase sauqu runkinkii i vauvo

<sup>43</sup> Isuva vinavusa nikihao kihao, Ho maara kavaaraa sama voa kiva amiake. Maa nahenkiaua ntaaraqai amiake, kuama.

## 6

*Isuva ampara ntara airiqamaseo 5,000 vaiinki nimua*

<sup>31</sup> ... Vi entaa vaiinki nahenki airinti Isua kavaesa vi ani vaumankaa ki I SUVAVAKA VIA VAINKINAVUVAKA SA HO NTARA NARAI VAUA. Minkuvo Isuva kihao, Varaiqenavu ou qumina ntaka kenkanavu vaiaia nenavu via voka variake, kio.

<sup>32</sup> Isuva minki kivaseo vinavusa ntika vaeo kaanuqi vaai nteo qumina ntaka vieva vua.

<sup>33</sup> VINAVUSA MINI SE VUMANKA AIRI VAIINKI NAHENKI VINAVUSA KAVE VINAVUSA VIE UNAINIAA IIAKAIQA VO VAKUSAQINKAI VO VAKUSAQINKAI VISA SANTE VARUVA AUHIANTA VAKANTUNA OU ISUVA VIEVA UNAINI VISA NAANE OU NTE VINKA.

<sup>34</sup> Viva naane ou ntovo Isuva ou nteo kaanuqinkaio vakaini vaavi nteo vaiinki nahenki airinti ruvaantuma vusa kaveo visaa naaquhikama nimikeo kihao, Ise, vaiinkivano sa raqisi vaimanka sipisipi nai niniha ni vaia sipisipia voqaama maa vaiinki nahenkisa vaiavo, kio. Minki kivaseo viaqaankaio Isuva uva vasaasa visa kiva nimi vaua.

<sup>35</sup> Isuva kivaqi vuvu suai vikini kuvi vumanka Isua vainkinavu viva vaunaini ou nte kiha, Suaivano vikini kuvi vivoma maini qumina ntakave.

<sup>36</sup> Ae vaiinki nahenki nikikaia ou vo vakusa vo vakusa niha munima nimiha ntara varaaake. Visa sa ntara ntuvavae aniasave, kinka.

<sup>37</sup> Via vainkinavu minki kuvo Isuva aqao kio, Nenavu visa ntara nimiake, kio. Kumanka vinavusa Isua irehama, Kenavu noa munimae 200 kinaae aquseha ntara varase nimiaave? kinka.

<sup>38</sup> Minki kuvo Isuva vinavusa irehao, Nanki nankimae mpareti ntara ntuvavae aniavo? Ou kavaake, kumanka vinavusa ou kavamase vii kiva ami, Mpareti ntara vohaa sauqu hiniuqaima vaio ivo. Hampusa kaaraqantaqaima vaio ivo, kinka.

<sup>39</sup> Via vainkinavu minki kuvo Isuva vaiinki nahenki kiva nimio, Ne aiqava vo ntaka vo ntaka usauntaka oquvi variake, kio.

<sup>40</sup> Minki kumanka visa vo ntaka 100 navu oquvi vaumanka vo ntaka 50 navu oquvi vaumanka minkiaqi vi aiqava vaiinki nahenki oquvi vauvo

<sup>41</sup> Isuva mpareti sauqu hiniunavu vaaseo hampusa kaaraqanta vaaseo naauaini aikukihao Kotiaa soqema iarao kivaseo mpareti nkuseo vi ntaraa nai vainkinavu nimio kihao, Ho vae vuu nimia aiqava naake, kivaseo hampusa kaaraqantavaka raira seo aiqava vaiinki nahenki nimio

<sup>42</sup> vi ntaraa raira nimumanka vaiinki nahenki aiqava homa nanka.

<sup>43</sup> Ho nomanka Isua vainkinavu viaqaankai rukantuko ukaa noa uka vare vaiinki nahenki neha rausuko mparetiavaka hampusaavaka nunku vare ukaqi ntuva keha 12 uka mpiqa soa.

<sup>44</sup> Vi entaa vaiinki airinti 5,000 vaiinki vi ntaraa ho noa...

## 10

### *Isuva Vaatimiasia avu rampaisoa*

<sup>46</sup> Isuva nai vainki hampaka ou vio Ieriko vakusaini ou nteo vi vakusaa vara mini saeva auki vaumanka vaiinki nahenki airinti via vakaqi vi vauvo avu qimpavu vaiinkiva Vaatimiasiva, Timiasia maaquvano vaihao aiaia nauihao kimiake ki vau vaiinkiva aara ausini oquvi vaua.

<sup>47</sup> Viva mini vaihao Isuva Naasaretihaanaava aikaraainaa iio viaqaankaio viva noaiqamaseo Isua aarehao kihao, Isuo, Ntevitia maaquo, kiriara umpo ise kiva kimikaane, kio.

<sup>48</sup> Avu qimpavu vaiinkiva minki ki vaumanka airi vaiinki nahenki via akihama kinka, Ae nena no kinkaane, kinka. Kuvo viva sa visa uva irai qaiqaa voqama seoma aararo, Ntevitia maaquo, kiriara umpo ise kiva kimikaane, kio.

<sup>49</sup> Minki kivaqi vuvu Isuva ani viaqaa himpio kihao, Aaraivo aniaie, kumanka visa avu qimpavua aaramase kinka, Ho quahehaa variane. Ae himpuane. Viva aima aareo ivo, kinka.

<sup>50</sup> Minki kumanka vaiinki viva nai vaaqauka aqukoa ravaqaaseo qaqini seo himpio ou Isuva himpi vaunaini vauvo

<sup>51</sup> Isuva via ireo, Ke ai nankiea uaae ania iarao? kio. Minki kuvo avu qimpavu vaiinkiva kihao, Maara ki vaiara vaiinkio, ki kivu rampai saane kima ani uo, kio.

<sup>52</sup> Minki kuvo Isuva kiva amio, Homa ae vinaave. Kiriara ae ki saihaqi iravave kiaraoma ai avu soqema vio ivo, kio. Minki kuvoma via avuvano vaasa rampai vuvu viva ho kaveo. Viva ho kavehao Isua vakaqi aaraini vuama.

## 12

### *Uaini santa ukukoaqi sa soqemase raqisu vaiinkisaa kua*

<sup>1</sup> Isuva minki kivaseo uva uantaseo visa kiva nimio kihao, Vaiinki vovano uaini santa ukukeo auhianta uvisa araseo vaka quseo uaini kava kakiainaa aukukeo kainta aukuseo maintaraa hieko vakeo niara vakaini vieva ihao vo susa kiva nimio, Ne ki naahoqaa raqisi kimikeha hini kava nenka hiqise vaeha hini kava vara kimikaake, kio. Minki kivaseo viva niaraini vo vakaini vio.

<sup>2</sup> Mini ou vauvo kava hiqiaina entava ani ntovo viva nai saiqa vainki vo akieko kihao, Ou ki naahoqaa raqisi kimike vaisa vuu kiva nimiamanka uaini kava kintavaka hiqi kimikaake, kuvo mini vumanka

<sup>3</sup> via naahoqaa raqisi amike vau vaiinkisa via saiqa vainki via ravaaqau sekaiqanaara saavu via umiqase vake sa uaini kava hiqi amirai qaqi akikovo aniranteo vio.

<sup>4</sup> Qaqi aniranteo vuvu naaho via qova nai saiqa vainki vo akikovo vumanka via naahoqaa raqisi amike vau via qiaka rukavuse saua ahasa aminka.

<sup>5</sup> Minkuvo naaho qova nai saiqa vainki vo akikovo vumanka via aruse. Ho minkiaqi vi hini nai saiqa vainki nikikoa saavu visa numiqaase vake hini arusoama ki.

<sup>6</sup> Ho vaiinki kaiqa sovo vaiinki vohaiqaqai vaua. Vi vaiinkia via qova nai maaquaa voqamase antuqa ari vau vaiinkiva vauvo via qova viavaka naankiara esaanaini akikehao kihao, Visa ki maaqu kavamase kiriara maaquve kihama via soqema amikevaave, kio.

<sup>7</sup> Minki kivaseo akikovo mini vumanka via naahoqaa raqisi amike vau vaiinkisa via kave nai kiva ami nai kiva amiha, Maa vaiinkiva nai qova quku viao nai qoa vakavaka aiaviavaka varaaiavama vaio ivo. Aniqa via arusaio viva vaaeva ia ahasava kinavuniqama aniaie, kinka.

<sup>8</sup> Visa minki kivase via ravaaqause aruse via naahoqinkai aaqaini vaaki aqusoave, kio.

<sup>9</sup> Isuva minki kivaseo visa irama nimikeo, Minkuaa kio naaho qova nai maaqu arusea saara nankie ianaove? Naaho qova aniteo nai naahoqaa raqisi vaiinkisa vehi aukuseo vonavuaa ki naahoqaa raqisi kimikaake, kianaove.

<sup>10</sup> Ne sae Kotia vukaqi maa uvaa saara ntuvaseha iiaave? Minkima kio: Oi naavu saqehao vo oi, sa soqe oive, kivaseo qaqirasai oiva vi oiva naaquiraiqama vio ivo.

<sup>11</sup> Kotiva vi oia noaiqama saiaqe ki kenavu via saiqa kave voqaraa saiqave ki uo, kuave.

Kotia vukaqi minkima qara ntuva koave. Ne sae vi uvaa saara ntuvase iiaave? kio.

<sup>12</sup> Isuma minki kumanka Iuntaa noa vaiinkinavu aako kenko kumanka iivuvo Isuva uaini naahogaa raqisi amiko vaiinkisaa kihaoma uva uantaseo visaa kumanka via ravaaqau vare kota amiaie kivase vaiinki nahenki viaqi ruvaantumava vusa kikivo kiha qekeha Isua sa ravaaqau sarai qaqiase vuama.

## 15

### *Isua Pairaativa vaunaini vuu soa*

<sup>1</sup> Via qararaa kooqai Kotia saiga vaa amike vaua visa noa vaiinkinavuvaka, Iuntaa noa vaiinkinavuvaka, maara osara ki vau vaiinkisavaka, aiqava kansoru vaiinkinavuvaka, visa ruvaantumavi vaiha visa auki osaraa kiva avuqavumase Isua seni santaqo via rumpa vare Pairaativa kamaania noa vaiinkivano vauaqi vuu se.

<sup>2</sup> Vuu sovo Pairaativa Isua ireo, Quqaae ae Iuntaa vakanaasa avuniasa vaiinkivano variarao? kuvo Isuva kihao, Ae kianaa ke maa visave, kio.

<sup>3</sup> Minki kumanka Kotia saiga vaa amike vau vaiinkisa visa noa vaiinkinavu vo uva vo uva saara Isua aki vauvo

<sup>4</sup> Pairaativa visa uva iihao qaiqaa Isua ireo, Ae sae visa nai kiva niminaave? Visa airi uva saara ai aki vaiavo, kio.

<sup>5</sup> Minki kuvo Isuva qaiqaa mpeqaiqihao sa uva kiaio vauvo Pairaativa airi aako ii vaua.

### *Isua sakaiqaa arusaake kua*

<sup>6</sup> Vo ihi vo ihi vehasumako ntaraa no entaaqaa kamaania avuniasa vaiinkivano vaiinki nahenki quahama nimikaeva karapusa vaiinki vo suvantu seo akikovo maagaini vua. Vaiinki nahenki vi vaiinkia suvantu kimikaane kuvo vi vaiinkia suvantu nimike vaua.

<sup>7</sup> Vi entaa vaiinkinavu kamaania hampaka raqua saara karapusa naavuqi vauvo vi vaiinkinavusaqinkaio vovano via auku Varapaasiva viva vaiinki arusoa saara karapusa naavuqi vaua.

<sup>8</sup> Ho vi entaaqaa vaiinki nahenki usi vaiha karapusa vaiinki vantu saainaa viaa iiha usi vauvo

<sup>9</sup> Pairaativa visa ireo, Ke ka karapusa vaiinkiae vantu nimikaraave? Ke Iuntaa vakanaasa avuniasa vaiinkie vantu nimikaraave? Ne kiva kimige iriaie, kio.

<sup>10</sup> Pairaativa iumanka noa vaiinkinavu Isuva noaiqama vuantu kiha via koma amikehaa ki visa via vuu via sauquqi kukasoa.

<sup>11</sup> Pairaativa ka karapusa vaiinkiae vantu nimikaraave kivaseo vaiinki nahenki ire vaumanka Kotia saiga vaa amike vau vaiinkisa visa noa vaiinkinavu ou vaiinki nahenki nivukana vaiha mpeqa uva kiva nimikeha kiha, Sa Isua vantu kimikaane kiai Varapaasia vantu kimikaane kiake, kinka.

<sup>12</sup> Visa vaiinki nahenki kiva nimiha minki kiake kiha viha kumanka visa Varapaasia vantu kimikaane kuvo Pairaativa qaiqaa vaiinki nahenki ireo, Ne Isuaa kihama Iuntaa vakanaasa avuniasa vaiinkivanove kiavo. Ke vi vaiinkiaa nankie iaave? kio.

<sup>13</sup> Minki kumanka visa navea kiha, Via sakaiqaa arusaake, kinka.

<sup>14</sup> Minki kuvo Pairaativa ireo, Nana saarae via sakaiqaa arusaraave? Viva nana manta saiqae varaseo ivo? kumanka visa qaiqai noaiqaase navea kiha, Via sakaiqaa arusaake, kinka.

<sup>15</sup> Visa minki kuvo Pairaativa vaiinki nahenki quahama nimikaeva Varapaasia vantu nimikeo viaqaankaio nai sontia vaiinkiaa Isua saavu umiqasaake kumanka via saavu umiqaa sovo viaqaankaio via sakaiqaa arusaake kio Pairaativa via nai sontia vaiinkinavu sauquqi kukasoa.

### *Sontia vaiinkinavu ruhehama Isua arua*

<sup>16</sup> Pairaativa nai sontia vaiinkinavu sauquqi Isua kuka somanka visa via vika vare vuu kamaania naavuqi se visa nai sana sontia vaiinki aiqava naarama ruvaantumase

<sup>17</sup> via avaakiha avuniasa vaiinki ukavaaqa nonku amikaresaa voqaama naare vaaqa aqu amike viaqaankai auquroa santa varase raqantaase kave voqaama aukuke Isua qiakaqaa aqu amike

<sup>18</sup> qasasaima seha visa nai sauqu kiriqaa aquseha uva avaakiha kiha, Iuntaa vakanaasa avuniasa vaiinkio, vaihaave? kinka.

<sup>19</sup> Minki kivase visa saavuqo via qhama rukavuse viaqaa kaara vihise via avuqaa koi sauru aravi vaiha vieaiqama seha quahama amike vaua.

<sup>20</sup> Minkiaqi viha avaakiha naaihaama amike kaiqase viaqaankai visa naare vaaqa aqu amikoa ravaqaase via ukavaaqa nonku amike via sakaiqaa aruse hiisaesa via vike vua.

### *Isua sakaiqaa aruse hiikoa*



<sup>21</sup> Sontia vaiinkinavu Isua sakaiqaa aruse hiikaesa iha via vika vare vakusa aaqaini aarana vi vauvo vaiinki vovano via auku Saimoniva vihaio noa vakusaini viae kumanka visa viaa mpeqaiqamase kiha, Isua sakai agu vaea vuu amikaane kuvo Saimoniva via sakai agu vaeo vuu amikoa. Saimoniva Sairini vakaihainaava viva Arekisantasa Rupusa vikanta qovama vaua.

<sup>22</sup> Visa Isua vika vare vuu qumina ntaka Korokotave kunaini soa. Korokota maa uvaqinkai kiesa Qiaka Vuhaaintakave kunaini Isua vuu se

<sup>23</sup> uaini namai viaqi hunkavu ahasaa uantase vako namaia via amiae kuvo Isuva sa neo.

<sup>24</sup> Sa nomanka visa via sakaiqaa pirimaqo aruse via ukavaaqa vaase kausa kausae ho vaevaave kivaseha kaasi ruhantema seha oi aquseha via ukavaaqa rairase vaao.

<sup>25</sup> Qararaa suaivano vuahaaraini uumanka Isua sakaiqaa arusoa.

<sup>26</sup> Via sakaiqaa aruse Isua qiakaini uva vo via kota kiva amiko uvaa qara ntuva ke sakaiqaa arusovo vi uvava minkima kio: **Maa Vaiinkiva Iuntaa Vakanaasa Avuniaa Vaiinkive**, kio. Vi qarava minkima vaua.

<sup>27</sup> Visa Isua sakaiqaa aruse Isua vakamase vaiinki vokanta arusomanka vikanta ruquku seha muara vare vau vaiinkikanta vaumanka visa vaiinki vo Isua sauqu kanaraini aruse vaiinki vo via saakaraini arusoa.

<sup>28</sup> [Isua vakamase vikanta arusoa kio Kotia vukaqi uva vo qara ntuva kova vivauma vaua. Minkima kio: Viva manta vaiinki vakamaseo vaianaove, kua.]

<sup>29</sup> Minkima arusomanka vaiinki nahenki vikare aikare iha nai anu runkinkiiha mauru maimiqa amikeha Isua manta uva kiva amikeha kiha, Oho, ae kihaama Kotia naavu rampaise kaaramo enta saiqa vaehama qaiqaa saqa kaiqa saraave kianaa vo?

<sup>30</sup> Ho nena saihaqiane. Nena sakaiqaankaia vaavi ntaane, kinka.

<sup>31</sup> Visa minki ki vaumanka visa aanante Kotia saiqa vaa amike vausa visa noa vaiinkinavuvaka, maara osara ki vau vaiinkisavaka, visa via naahaama amikeha kiha, Viva vo sisa saihaqi vaiva sama nai ho saihaqianaove.

<sup>32</sup> Viva Kotiva akikai vaiinkiva mesaia vaiinkivano vaio ivo. Vi vaiinkiva Isarai vakanaasa avuniaa vaiinkivanoma vaio ivo. Saiqe kenavu vaiha kavaaio viva nai sakaiqaankaio viquvio vakaini kuviea kenavu viaa quqaave kiae, kinka.

## 16

### *Isuva quku vuaqinkaio qaiqaa qaqi himpua*

<sup>1</sup> Saririqa Iuntaa vakanaasa maara enta kaiqomanka Mariava Makataa vakusaihainaa nahenkivanovaka, via varanova Semisia novavaka, Saomivavaka, vi nahenkinavusa munima aquseha soqema seo untavi vau ahasaa vare Isua vaakaqaa agu amikaesa vi.

<sup>2</sup> Maaraqaa qararaa suaivano muani uu ntomanka vinavusa Isua quntama koaqi viesia vua.

<sup>3</sup> Aarana viha vinavusa nai ire nai ireha kiha, Kenavu mini ou ntaao kavave noa oi gentiana kinkakai oia uqauruma kimikaanaove? Vi oiva noa oima vaio ivo, kinka.

<sup>4</sup> Minki kivase vinavusa ou nte kavovo oi uqauruma sovo vaua.

<sup>5</sup> Oi uqauruma sovo vaumanka vinavusa oiqi oiqeke kavovo vaiinki vo qaraasa vaiinkivano eqara ukavaaqa nonkuko vaiinkiva viaqi hini vantaraini oquvi vaua. Viva viaqi vaumanka via kave vinavusa qeke vauvo

<sup>6</sup> viva kihao, Sa qekeha variake. Isua Naasaretihainaa sakaiqaa arusaa vaiinkia ne viaae aikuki vaiavo? Viva sa maaqi vaio ivo. Viva qaqima himpio ivo. Nenavu kavaake. Maini via vakaanaini sa vaio ivo.

<sup>7</sup> Ho maa uvaa vare vuu via vainkinavuvaka Pitaaravaka kiva nimiake. Minkima kiva nimiake. Viva naane ni nivuni Kariri vakaini vio ivo. Nenavuvaka mini ou vi via kavevaave. Haau vaihao viaa ninavu kiva nimua vake vivauma vaio ivo. Vi uvaa kiake, kio.

<sup>8</sup> Viva minki kumanka qekehaha ki vinavusa Isua quntama koaqinkai veva nte sante viha sa voravaka kiva amiaiki vua.

## RUKU

### 7

#### *Ehaara nahenki vaiinkiaa*

<sup>11</sup> Naankiara amparaigasa Isuva vo vakusa via auku Neni vakusaini vumanka via vaiinkinavuvaka airi vaiinki nahenkivaka via vakamase vuvo

<sup>12</sup> Isuva vi vakusaa qentiana ou nteo kavomanka vakusaqinkai vaiinki nahenki guku vu vaiinkia kainta vae via quntaeave kivase anua. Quku vu vaiinkiva ehaara nahenki maaqu vaumanka airi vaiinki nahenki vi nahenkia vakamase anuvo

<sup>13</sup> Isuva vi nahenkia kaveo munkusaqinkaio umpo ise kiva amikeo viaa kihao, Sa iqi rakaane, kio.

<sup>14</sup> Minki kivaseo ou kainta ukuvaromanka vaiinkinavu kainta ani varosa himpi vauvo Isuva kihao, Qaraasa vaiinkio, ke ariara himpuane ki uo, kuvo

<sup>15</sup> guku vu vaiinkiva himpio vaavi aravio uvavaka kuvo Isuva vi vaiinkia nai noa amio.

<sup>16</sup> Minkuvo visa aiqava voqamase aaku ikomanka Kotia auku kure reha kiha, Poropeti vaiinki noavano kinavu avuqai qovarama vio ivo, kinka. Kotiva sa kinavu nai vaiinkinavuaa kauru seo ivo, kinka...

### 12

1 ...

#### *Kotia aakuqai qekeha variake kua*

<sup>4</sup> O Ki navunao, ni vaakaqai arusesa sa visa aaku gekaake. Visa ni aruse sa ni maraqaavaka ho arusevaave.

<sup>5</sup> Ne kararae qekeha vaiivaave? Saiqe ke ni kiva nimiae. Ne Kotia aaku qekeha variake. Viva mpeqavano vaihao vaiinki aruseo viaqaankaio homa via gukuvisa vinaini aqg saaiavama vaio ivo. Eo, ke niarama ki uo ne Kotia aaku qekehama variake...

#### *Airi aiaia vakako vaiinkiaa kuama*

<sup>15</sup> ...Isva aiqava vaiinki nahenki kiva nimio, Ne rauriha variake. Ne airi aiiaive airi munimave vaea viaa noaiqaase iiha vaiqi vivoave. Ne kiha airi aiiaia vakeha homa vaiqi viaave kivoave. Sa aiiaivano ni saihaqia ne soqemase vaiqi vivaavauve, kio.

<sup>16</sup> Isuva minki kivaseo viva uva uantaseo kiva nimio, Vaiinkivano airi aiiaia vakova ntara ukukeo airi ntara qantu vaeo

<sup>17</sup> nai kivaseo iio, Ke maa ntaraa ka naavuaqie vakaraave? Aiqaava ki naavuqi ntaravano mpiqama vio ivo, kio.

<sup>18</sup> Minki kivaseo viva kihao, Saiqe ke aiqava naavu rampaise qaiqaa noa naavu vo naavu vo naavu saqase viaqi ntaravaka aiiaivaka vakaae, kio.

<sup>19</sup> Ke vi saiqaa vuu kaiqase minkima kiaa, Ke soqemama vai uo. Airi ntara airi aiiaia vaimanka ke airi ihi voka vaiqi viha maa ntaraavaka namaivaka namaqi viha soqemase vaiaave, kio.

<sup>20</sup> Vi vaiinkiva minki kuvo Kotiva via kiva amio, Sa ai avu aako vaivave. Maa entaa entaqi ae guku vinaave. Ae guku viao vovano ai aiiaia kenka ukukaeave kiana aiiaia varaanaove, kuave, kio.

<sup>21</sup> Isuva minki kiva nimi kaiqaseo viva kihao, Vaiinkivano aiiaiaqai iihao aiqava aiiaia aikareo vakaiava vaiio Kotiva vi vaiinkiaa kihao, Ai aiiaia qumina ahasave. Ke kavauaa ae vehi vaiinkiqaime variaao. Ae qumina guku vinaave, kianaove, kio...

### 15

#### *Via maaqu raumpiima vuua kua.*

<sup>11</sup> Isuva minki kivaseo viva kihao, Vaiinki vovano qorainki vainki kaaraqanta vakakovoma

<sup>12</sup> via vainki naankiaraihainaava vaihao nai qoaa kihao, Naankiara ki kimieva kinaa aiiaia vakeqai kimiane, kio. Kuvo via qova aiiaia rairaseo nai maaqukanta voavaka voavaka nimuvo

<sup>13</sup> via maaquvano naankiaraihainaava amparaigaqai vaio nai aiiaiaqo soqaa aukuseo munima vaeo niara maaqa vio ou mini vaihao manta vaiinki hampaka vaihao

<sup>14</sup> munima vare vua vuu kaiqa seo.

Vuu kaiqa sovo viaqaankaio sa ntaravaka vau entava ani ntovo

<sup>15</sup> viva vehi vaihao ou vi vakaqaankainaa vaiinki hampaka saiqa vaeo. Saiqa vare vauvo ou qvara ntara amiane kuvo

<sup>16</sup> viva quara ntara nimihao kio, Ise, kevaka quara ntara viki nimunaa naakaave kuvo ntara amiaiava sa vauvo

<sup>17</sup> narara vaihao uvo aako kenko kuvo iivuvo viva naiqai minki kivaseo iio.

Ki qoa saiqā vare vaia vainkisa airi vaiavao ntara airiqimanka neha vaiamanka ke maini vaiha narara vai uo.

<sup>18</sup> Saiqe ke himpi kenka qova inanaini anirante vuae. Ke ou nte kenka qoaa minki kieave. Ki qo, ke Kotiavaka aivaka manta saiqā vaa nimike uo.

<sup>19</sup> Ke via saara sa ai vainki soqesa ho vaiaave. Ae ki amparaiqama saiaqe ke ai saiqā vainkiqai vaiae. Ke minki kivaseo kieave, kio.

<sup>20</sup> Minki kivaseo himpio nai qova unaini anio. Nai qoa naavu aumanko anuvo via qova vukua niaraihaio via kaveo quaha seo santeo ou nai maaqu ravaaqau seo susuqehao vauvo via maaquvano kihao,

<sup>21</sup> Ki qo, ke Kotiavaka aivaka manta saiqā vaa nimike uo. Ke via saara sa ai vainki soqesa ho vaiaave, kio.

<sup>22</sup> Kuvo via qova nai saiqā vainki kiva nimio, Sante ne ou ukavaaqā soqeaqaima vara vii amiake. Saankava irara vara vii usu amikaake.

<sup>23</sup> Purimakaua naaki soqea aruseo nunkaake. Vake maasa viaa quahama amikaeama ivo.

<sup>24</sup> Ki maaquvano quku vivo kuoma qaqi aniteo ivo. Ki maaquvano raumpiima vivo kuaoma qovarama vio ivo, kio. Minki kivaseo nai maaqu quahama amikeo ntara varaseo kavaaruqama amikeo.

<sup>25</sup> Kavaaruqama amikeo vauvo via vasaava saiqāqinkaio naavu aumanko aniteo iuvo

<sup>26</sup> ihi nte vauvo viva nai qoa saiqā vainki vo irovo viva minkima kio,

<sup>27</sup> Ai qakavano vekaihaio anintaivo ai qova viaa quahehao purimakaua naaki soqea aruseo nunka amikeo ivo. Ai qaka soqema seo nai vikeo quahehaoma minkio ivo, kio.

<sup>28</sup> Minki kuvo via vasaaa arara ikovo komaseo kihao, Sa ke naavuqi vieama ivo, kivaseo vahaqaqaini vauvo via qova veva nteo aarovo viva minkima kio,

<sup>29</sup> Ke airi ihi varaqi vihama ai saiqā vainki voqaantemase ai saiqā vaehama sa ke vo entavaka ai no antua viiai vai uo. Ke kenka konti quahama nimikaea kuua ae sama mimi naaki vonku ruquku kimia iarao.

<sup>30</sup> Maava ai maaquvano hampi naio ni vai nahenkiaqaa ae iana ahasaa vaeo vuu kaiqa seo anivaama purimakaua naaki soqea qumina ruquku amia iarao, kio.

<sup>31</sup> Minki kuvo via qova aqao kio, Ki maaquvauvao, ae vo enta vo enta ki vakamasea vaiavave. Ke una ahasaa aiqava aiiaia kenkakanta unaave.

<sup>32</sup> Ai qakavano quku vivo kuoma qaqi aniteo ivo. Viva raumpiima vio ivo kuoma qaqi qovaama vio ivo. Minkiaa ki kenavu vake via quahama amikaeave, kuave, kio. Iсуva kuama.

## 16

### *Rasarusiaa kua*

<sup>19</sup> Iсуva minki kivaseo viva kiva nimio, Vaiinki vovano airi aiiaia vakova soqe ukavaaqaqai nonkuseo vo enta vo enta hiasaa u ntaraaqai nehao vauave.

<sup>20</sup> Viva vi ntaraaqai neha vaumanka vaiinki vo via aukū Rasarusia vika vae vuu airi aiiaia vako vaiinkia naavu qentiana sovo vaua. Vi vaiinkiva sa aiiaivaka vakova vehi vaiinkivano vauvo numuaravanoqai aiqava via vaakaqaa ike vauvo

<sup>21</sup> vaihao viva airi aiiaia vako vaiinkiva ntara nehao viki aquso viaqai nunku naeva vaua. Mini vauvo vairivano vikare aikare ihao via numuara mpui ne vaua.

<sup>22</sup> Sa aiiaia vako vaiinkiva quku vumanka naauaihainaasa via vika vare vuu Avarahaava nai saivaqaa vaunaini vuu soa.

<sup>23</sup> Vuu sovo airi aiiaia vako vaiinkiva vivavaka vaio quku vuvu vakaqi quntama kovo viva quku vuasa vaianaini vaihao ankua ntihao vaio. Mini vaihao viva vuuvi kavovo Rasarusiva Avarahaasanti quahehao niaraini vaua.

<sup>24</sup> Vauvo viva Avarahaaa aareo kihao, Avarahaao, ki qo, kiriara umpo ise kiva kimikaane. Ae Rasarusia akikao viva nai vuqa ou namaiqia vaavi quntama vaeo munku ki maaqiqa vakaiaio nupima kimikaie, kio. Ke noa iha ikaiqaqi vaiha ankua ntiha vai uo, kio.

<sup>25</sup> Viva minki kuvo Avarahaava aqao kio, Ki vainkivauvo, ae iriane. Ae haau qaqi vauna entaa soqe ahasa vakoao Rasarusiva manta ahasaqai vakoave. Vake viva maini vaihao quahehao vaivaa ae mini ankua ntihaa vaiarao.

<sup>26</sup> Ae qaiqaavaka ii vaiaqe ke voqa ai kiva amiae. Ke vaunaa ae vaianaa avukana onkai noama vaio ivo. Maihaio vuantoave vihaio aniantoave kio onkai noama avukana vakaiave, kio.

<sup>27</sup> Avarahaava minki kuvo vi vaiinkiva kihao, Umpo, ki qo, ke ariara umpo ise ki uo. Rasarusia akikaaio viva ki qoa naavuqi ou nteo

<sup>28</sup> ki qaka vasausa sauqu hiniunavu vaisa kiva nimiaie. Visavaka maini aiha vinanaini anivoave, kio.

<sup>29</sup> Minki kuvo Avarahaava aqao, kio. Mosevavaka poropeti vaiinkinavuvaka qara ntuva ko uvava vaiove. Visa vi uvaa homa iivaave, kio.

<sup>30</sup> Kuvo qaqi vau entaa airi aiaia vako vaiinkiva kihao, Save, ki qo, Avarahaao, quku viava aniranteo vuu kiva nimia visa via uva iihama manta aara qaqia sevaave, kio.

<sup>31</sup> Minki kuvo Avarahaava aqao kio. Visa Mosea uvavaka poropeti vaiinki uvavaka sa iivea visa quku viava aniranteo vuu kina uvaavaka sa ho iivaave, kuave, kio. Isuva minki kuama.

## 22

### *Isua ravaaqau soa*

<sup>47</sup> Isuva mini vaihao qaqi ki vaumanka vaiinki airi vaiinkinavu anintoa. Isua vainki 12 navuqinkaio Iuntaasiva airi vaiinki ntika vaeo viva naane visa avuni anio Isuva vaunaini anintoa Isua moqa saeva auki vauvo

<sup>48</sup> Isuva kihao, Iuntaasio, ae ki moqa sehaae ki vakaini vakakai vainkisa navukaasa nivuqaa ki qovarama senaave? kio.

<sup>49</sup> Isuva minki kumanka via vainkinavu via vakamase vaua kavomanka visa Isua ravaaqau saesa auki vaumanka vinavusa Isuaa kiha, Noavauvo, kenavu sopiqoe visa keqa saraave? kinka.

<sup>50</sup> Kivaseo vovano Kotia saiqa vaa amike vau vaiinkisa visa avuniasa saiqa vainki vo keqaseo via aako keqa aqu sovo hiqintuvo Isuva aqao kio hove kio.

<sup>51</sup> Kivaseo vi vaiinkia aakoqaa nai sauqu vakovo qaiqaa kavanta vua.

<sup>52</sup> Kotia saiqa vaa amike vau vaiinkisa visa noanavuvaka, Kotia naavuqaa raqisi vau porisisa opisaaravaka, noa vaiinki vonavuvaka, visa Isua ravaaqau saesa anusaa Isuva kihao, Ne kamaania vakamase iqosa raquaina vaiinkia voqaama ravaaqau saesae sopi saavu vare aniavo?

<sup>53</sup> Ke ni hampaka vo enta vo enta Kotia naavuqi vaiqi vi vauamanka ne sa ki ravaaqau saarave. Ho vake maa entaa ni entama vaio ivo. Vake sonkiaiqi vaia ahasava mpe-qaiqianaove, kio.

## 23

### *Hini sakaiqaa aruso vaiinkiva uva kua*

<sup>39</sup> Manta vaiinki vovano hini sakaiqaa arusova vivavaka Isua manta uva kiva amihao kihao, Quqaee ae mesaia vaiinkivano variarao? Ae nenavano kikantavaka saihagiane, kio.

<sup>40</sup> Minki kuvo manta vaiinki vovano aqao kio, Sae ae Kotia aaku qekehaha variarao? Visa kikanta aanantamase viavaka arusaavo.

<sup>41</sup> Visa homa kikanta arusevaave. Visa kikanta manta saiqa saara kikanta arusaavo. Vi vaiinkiva sa manta saiqa varaivave, kio.

<sup>42</sup> Minki kivaseo viva Isuaa kihao, Isuo, ai noaiqama saaina entaa kirirama irikaane, kio.

<sup>43</sup> Minki kuvo Isuva kihao, Ke ai kiva amiaiaama iriane. Vake ae ki vakamaseama soqe vakusaini vainaave, kio.

### *Isuva quku vua*

<sup>44</sup> Minkuvo suai qiaqaaqaa uu ntovo viaqaankaio sonkiaiqama vuvo sa suai ikovo sonkiaqai aruqio vuvo suai vikiniqamavio 3 kiroki quvo qaiqaa aakikoa.

<sup>45</sup> Ierusalemi vakusaini Kotia naavuqi saankusa voqaama noa kavuna hiikova avukaqaa nai nahaqu vuvo

<sup>46</sup> Isuva noaiqaaseo oi oi kihao, Ki qo, ki maraqua varaane, kio. Minki kivaseo viva quku vio.

<sup>47</sup> Isuva quku vuvo sontiaqaa raqisi vau vaiinkiva Isuva minkua kaveo Kotia auku kure ra seo kihao, Quqaama maa vaiinkiva avuqavu ni vai vaiinkivave, kio.

<sup>48</sup> Minki kumanka vi saiqa kavaesa ruvaantuma vusa visa vaiha kavamase viaqaankai visa nai maaqaini anirante vihama munkusa mantaqumanka nai mimia ruquku seha vuama.

<sup>49</sup> Visa vumanka Isua vaiinki nahenkivaka, nahenki vonavu Kariri vakaihai via vakaqi nusavaka, visa niara ntaka vaiha vi saiqa kave vaua...

## 24

### *Emeasi vakusaini ni vau vaiinkikantaa kua*

<sup>13</sup> Vi entaaqaa Isua vainki kaaraqanta vo vakusa Emeasi vakusaini viesia vua. (Urara vaivo Kainantu vaivo via voqaama Ierusaremi vauvo Emeasi vakusa vaua.)

<sup>14</sup> Vikanta aarana viha Isua aruso uvaa kivaqi vi.

<sup>15</sup> Vikanta kivaqi vuvo Isua nai aninteo vikanta vakamaseo ou vumanka

<sup>16</sup> vikanta via kaveha sa via uqauqamase kavarai vo vaiinkivanove kuvo

<sup>17</sup> Isua vikantaa kihao, Nekanta aarana aniha nana uvae nai kiva ami nai kiva ami ani vaiavo? kio.

Minki kumanka vikanta ani viaqaa himpিকে munkusavano mantaiqumanka

<sup>18</sup> vovano Siriopasiva Isua ireo, Maa entaa airi vaiinkinavu ani Ierusaremini variavaa ae vohaiqavanoqae kuvana qovaraiqi uvaa sae iriarao? kio.

<sup>19</sup> Minki kuvo Isua nana uvave kumanka vikanta kiha, Isua Naasaretihaanaa uvave. Vi vaiinkiva poropeti vaiinkivano vaihao Kotia avuqaavaka vaiinki nahenki nivuqaavaka noa saiq vaehao soqe uva kio ivo.

<sup>20</sup> Viva vaimanka Kotia saiq va amike vaia vaiinkisa visa noa vaiinkinavuvaka, kinavuuqaa raqisi vaiasavaka, visa via amiavo viva via arusaake kimanka via sakaiqaa pirimaqo arusaavo.

<sup>21</sup> Kenavu haau vi vainkiaa Kotiva via akikaivo viva vo vakanaasa aakara seo kinavu Isarai vainkiqaa raqisiaiavave kunaave. Uva vovakama vaio ivo. Via arusaavo vake kaaramo enta aikareo ivo.

<sup>22</sup> Vake kekanta nahenkinavu kia uvaa ii rankuma vi uo. Vinavusa vaasa qararaa via quntama kaaraq iu nte sa via vaaka kavaavo.

<sup>23</sup> Vinavusa anirante vuu kiva nimiha, Naauaihaanaasa kinavuaa viva qaqima vaio ivo kiavo, kinka.

<sup>24</sup> Vinavusa minki kiamanka kinavuuqinkai hini vaiinkinavu via quntama kaaraq iu vi ou kavaavo nahenkinavo ki uvaa vivauma vaimanka via vaakavaka sa kavaave, kinka.

<sup>25</sup> Vikanta minki kuvo Isua vikanta kiva nimio, Nikanta avu aakovaka sama vaio ivo. Haau poropetinavu kiva ko uvaa nekanta vi uvaa quqaave kiakaa vaimanka nekanta qasomase vi uvaa ii vaiavo.

<sup>26</sup> Nekanta sae iriavo? Kotiva akikaiaa vaiinkiva mesaia vaiinkivano aihavina ahasaa vaiqio vio viaqaankaio noaiqama vio mpeqa vaiinkivano vaianaove, kio.

<sup>27</sup> Minki kivaseo Isua mesaia vaiinkiaa Kotia vukaqi qara ntuva ko uvaa vikanta kiva nimieva hoqareo Mosea vukaqinkaio kiva nimiqio vio poropetinavu vukaqinkaio kiva nimiqio vua.

<sup>28</sup> Minki ki vauvo vikanta viesia u vakusava aumanko vauvo Isua aarana qaqi vieva voqaama auki vauvo

<sup>29</sup> vikanta aqao ki, Amparaiaqaa entievave. Qaqia sea kikanta vakamasea vaikaane kuvo vikanta vakamaseo vaieva naavuqi vio.

<sup>30</sup> Viva viaqi vaihao ntara kaintaqaa vikanta vakamaseo oquvio Kotiaa soqema iarao kivaseo mpareti ntara nkuiseo rairaseo nimumanka

<sup>31</sup> vikanta avu aako kenko kuvo iivumanka vikanta via uqauqamase kave. Vikanta via uqauqamase kavovo Isua vikanta nivuqaankaio uantavio sa vaio.

<sup>32</sup> Isua uantavio sa vaumanka vikanta nai kiva ami nai kiva amihakanta, Viva aarana aniha Kotia vukaqinkainaa uva kikanta kiva kimi vaivo quqaama kikanta munkusaqinkaio soqema vio ivo, kinka.

<sup>33</sup> Minki kivaseo vikanta vaasa himpikanta anirante Ierusaremini ou Isua vainki 11 navu rantase kavomanka vinavusa vo vaiinkinavu vakamase ruvaantumavi kiha,

<sup>34</sup> Noavano quqaama qaiqaa himpio ivo. Saimoniva vivama kaveo ivo, kumanka

<sup>35</sup> vikantavaka aaraini niha kavooa visa kiva nimi. Vikanta kiha, Viva mpareti ntara nkui saimanka viaqaankai kenka noa vaiinki sankunkase kave uo, kinka.

*Isua nai vainki nivuqaa qovaraiqama vua*

<sup>36</sup> Vikanta uva visa kiva nimi vauvo vakeni noavano vivama qovaraiqama vio visa kakaqaa himpikao vaihao kihao, Ni munkusaqinkai qihaasi vaia variake, kio.

<sup>37</sup> Minki kumanka visa voqamase qekeha vaanavano qovarama vivo kuvo

<sup>38</sup> Isua visaa kihao, Ne nankihae qeke vaiavo? Ne nankihae kiriara kaara aako vake ii vaiavo?

<sup>39</sup> Ki sauqu aiq kavaake. Ke visama ivo. Ki aukeha kavaake. Ke vaiinkima vai uo. Sa vaanavano ki aananteo makivaka vuhaaivaka vaiavaave, kio.

<sup>40</sup> Minki kivaseo viva nai sauquvaka aiquvaka numiqomanka

<sup>41</sup> visa voqamase quaheha sauqu runkinkii iha kiha, Sa ho viaa quqaave, kiae kuvo Isua kihao, Ntara naainaa vaio ivo, kumanka

<sup>42</sup> hampusa nunkakooa ampara amuvo

<sup>43</sup> viva visa nivuqaa vaihao varaseo noa.

<sup>44</sup> Iсуva hampusa namaseo visa kiva nimio, Haau ni hampaka vaiha ke maa uvaa ni kiva nimunaave. Kiriara haau Moseva vukaqi gara ntuva ko uvaave, poropeti vaiinkinavu gara ntuva ko uvaave, Saami vukaqi gara ntuva ko uvaave, ke ni kiva nimiha vi uvaa vivauma vaianaove kunaave, kio.

<sup>45</sup> Minki kivaseo visa Kotia vukaqi gara ntuva ko uvaa sankunka iriake kio viva vi uvaa vi uvaa kiva nimio kihao,

<sup>46</sup> Maa uvaa gara ntuva koave. Mesaia vaiinkiaa viva aihavina ahasaa vaeo vuu quku vio kaaramo enta vaio qaiqaa qaqi himpuanaove.

<sup>47</sup> Viaqaankai ne ki saiqaa ki hukuaa iihama vaiinki nahenki kiva nimiqi viha manta aara qaqia saivo Kotiva ne manta saiqa vare uvaa nunka nimikaaie kiake. Vi uvaa kiva nimiqi viha Ierusalemi naane vi uvaa kiva nimiqi vi viaqaankai vo vakaqaa vo vakaqaa kiva nimiqi vuake.

<sup>48</sup> Nenavu nenka avuqo vi ahasaa vi saiqaa kavaama ivo.

<sup>49</sup> Ki gova sauqu aiqiqaa aqusehao kenka ni nimieave kiainaa kema via akikaeave. Ne maa vakusaaqi vaiqi vivo naauaihaio viva kuvio niqaa vaihaoma ni mpeqaiqama nimikaaie, kio...

## IOHANE

### 3

#### *Nikontimaava Isua ou kavoa*

<sup>1</sup> Paresi vaiinki vovano vauvo via auku Nikontimaava. Viva Iuntaa vakanaasa avuniasa vaiinki vovano vaua.

<sup>2</sup> Viva vaihaoma entaqi Isua ou kaveo kihao, Maara ki variaa vaiinkio, kenavu kavauao Kotiva ai akikaivaa kiama ae maara uva ki variaava ani iarao. Sa Kotiva ai saihaiqae kivaa ae sama noa saiqā varaaraikiio, kio.

<sup>3</sup> Viva minki kuvo Isuva kiva amio, Ke quqaa uva kiaiama iriane. Vaiinki nouqama viava vaiao via sa qaiqaavaka vakakaiea viva sama Kotiva raqisina vakusaa ho kavaanaove, kio.

<sup>4</sup> Kuvo Nikontimaava kihao, Nankimaseoe nouqama vina vaiinkia qaiqaa vakakaanaove? Viva qaiqaa nai noa araraqī viqekaiāoe via vakakaanaove? kio.

<sup>5</sup> Kuvo Isuva kihao, Ke quqaa ki uo. Namaiqi vakakaiava vaiao sa Kotia maraquavano via qaiqaa vakakaiaio viva sa Kotiva raqisina vakusainia vuanaove.

<sup>6</sup> Vaaka ahasavano vaaka ahasaqaima vakakaiave. Maraquā ahasavano maraquā ahasaqai vakakaiave, kio.

<sup>7</sup> Ke ni qaiqaa vakakaiaama kiva amuaa ae viaama rankuma via iarao. Sama minkiane. Ke uva uantase ai kiva amieave. Uvaivano ukihao mini mini vuakaavo vi vaio ivo.

<sup>8</sup> Uvaivano uki vaivaa ae sa via kavaraia ae via uvaqai iianaave. Ae viva aniaina osaraave viva vuaina osaraave sa iia iarao. Ho Kotia maraquavano vakai osaraa via voqaama vaio ivo, kio.

<sup>9</sup> Isuva minki kuvo Nikontimaava, Nankimaseoe minkianaove? kuvo

<sup>10</sup> Isuva kihao, Ae Isaraia vainkinti maara uva kiva nimi variarava vaihaae vi uvaa sa iianaave?

<sup>11</sup> Ke quqaa ki uo. Kenavu sankunkase iuna ahasaa ni kiva nimi vai uo. Kenavu kenkanavu kivuqo kavauna ahasaa qoqaa ni kiva nimi vai uo. Minki vauamanka ne sa kinavu uva iriavo.

<sup>12</sup> Ke vakaihainaa ahasaa ni kiva nimuamanka ne viaa sa quqaa uvave kiavo. Ne minkiaeva ke naauaihainaa ahasaa kiama nankise ne vi uvaa ho iivaave?

<sup>13</sup> Sa vaiinki vovano nauuaini Kotiva vainaini viave. Keqaima vihaima kuvi uo. Ki vakaini vakakaisa ke nauuaini variavauasave.

<sup>14</sup> Haau ni saivaqava Moseva qumina vakaini vaihao memau maraquā oiqo aukuseo via sakai arakoqaa kure ra soave. (Vaiinki nahenki via kave sa quku vuake kio Moseva minkuave.) Ho ke vakaini vakakaisa ke vaiiaa haau Moseva memau maraquā aukuseo vakontema sema kivaka sakaiqaa kure ra saia

<sup>15</sup> Vaiinki nahenki kiriarā quqaa vivave kisa sa quku vi kaiqā viaiki aiqava enta enta qaqi vaiqi vivaave, kio. Isuva minki kuama.

<sup>16</sup> Vaiqā Kotiva vakaini vaiasaa voqamaseo munkusa vakehao kio viva nai maaqu vohaiqā vakakaia kinavu kimio. Minkiaa ki vaiinki nahenki via maaquaa quqaave kisa sa quku vi kaiqā viai visa aiqava enta enta qaqi vaiqi vivaa.

<sup>17</sup> Kotiva nai maaqu akikovo viva sa vaiinki nahenkiqaa uva vakaeva kuvio. Vaiinki nahenki soqemavi variake kio viva kuvio.

<sup>18</sup> Vovano via maaquaa quqaa vivave ki vaiava vivama sa uva varaanao. Vovano viaa sa vivave ki vaiava vivama noa uva varaanao. Vake maa entaa Kotiva kota kivaseo vi vaiinkia via qoiima seo. Viva Kotia maaqu vohaiqā vakakaiaa sa quqaa vivave kia saara Kotiva via qoiima seo.

<sup>19</sup> Maa ahasaa saara uva vaianao. Ovavano vakaini kuvimanka vaiinki nahenki sa via quahama amikarai visa sonkia ariraqai quahe vai. Vaiinki nahenki saiqavano manta saiqā vaimankaa ki visa sa vi ovaa quahama amike.

<sup>20</sup> Manta saiqā vare vai vaiinkiva vovano vovano navukaiqihaoma sa vi ovaa quahama amikarai sa ovavano vainaini vio. Ovavano ki vaaqu saiqā akaama kimikaanto kihao sa ovavano vainaini vio.

<sup>21</sup> Viva minkima vaivo quqaa saiqā vare vai vaiinkiva sa qekaraio ovavano vainaini vio. Viva vivo ovavano via saiqā akaama amikaimanka vaiinki nahenki kavaavo vi vaiinkiva Kotia uva iihao Kotia saiqā vare vaia.

## 9

*Isuva avu qimpa vu vaiinkia soqema soa*

<sup>1</sup> Isuva ou vihao kavovo vaiinki vovano nai noa auhaqinkaio avu qimpa vuva vaumanka  
<sup>2</sup> Isua vainkinavu Isua irema, Maara ki vaiia vaiinkio, kavave manta saiqa vaa saivoe via saara vi vaiinkia avu nai noa auhaqinkaio qimpa vio ivo? Naie, via nosa qosae manta saiqa vara saavaoe via saara via avu qimpa vio ivo? kinka.

<sup>3</sup> Minki kuvo Isuva aqao kio, Sama nai manta saiqa varaia saara via avu qimpa vio ivo. Sama via nosa qosa manta saiqa vararaa saara via avu qimpa vio ivo. Ne vi vaiinkiaqinkai Kotia saiqa kavaake kio via avu qimpa vio ivo.

<sup>4</sup> Kotiva ki kikikai saiqa kenavu aakikainaaqaa varaqi vieave. Entama viao sa vovano ho saiqa varaanaove.

<sup>5</sup> Ke vakaini vaiha ke ovavano ikaintema se ikaqi vuaia vakaini vaisa ho kavevaave, kio.  
<sup>6</sup> Minki kivaseo Isuva vakaqaa kaara vihiseo kaaraqo horaiqama seo viki avu qimpa vua avuqaa kaaqau amikeo kihao,

<sup>7</sup> Oku Siromi varuvaqi, Akikaia namaiqi munku nena vii mintuqaane, kio. Minki kuvo vi vaiinkiva kunte io munku nai vii mintuqa sovo via avu rampai vuvo viva vihaio okuranteo ho kavamaqio uio.

<sup>8</sup> Viva ho kavamaqio ui vaumanka via aqa vausa kavovo aarana vaihao aiaia kimiake ki vau vaiinkiva qaqi uumanka visa via kavema kiha, Ka vaiinkivae uio ivo?

<sup>9</sup> Aarana oquvio vaihao aiaia kimiake ki vai vaiinkivave? kinka. Kumanka hini usa kiha, Ho vivama ivo, kinka. Kumanka hini usa aqao kinta, Vovanoma uio ivo. Via vii voqaama vaiva uio ivo, kuvo vi vaiinkiva uu nteo nai kihao, Ke maa visama ivo, kio.

<sup>10</sup> Minki kumanka visa via irehama, Nankuma saivoe ai avu rampai vio ivo? kinka.

<sup>11</sup> Kuvo viva visa kiva nimio kihao, Vaiinki vovano via auku Isuva viva kaara vihiseo horaiqama seo ki kuvuqaa kaaqau kimikeo kiriara kihao, Siromi varuvaqi munku nena vii mintuqaane, kimanka ke munku mintuqa sauo ki kivu rampai vimanka ke ho kavamaqio uuo, kio.

<sup>12</sup> Minki kumanka visa via irema, Viva kaini vivaae uarao? kinka. Kuvo, Nai kainie vio ivo? Sa ke kave uo, kio.

<sup>13</sup> Kumanka visa haau avu qimpa vua vika vae vuu Paresi vaiinkinavu vaunaini sankaa.

<sup>14</sup> Isuva maara entaqaa hora kaaqau seo vi vaiinkia avu rampai soa.

<sup>15</sup> Visa Paresi vaiinkinavu vaunaini via vuu somanka Paresi vaiinkinavu vi vaiinkia irehama, Nankuma saivoe ai avu rampai vio ivo? kuvo viva kihao, Viva hora vaaseo ki kuvuqaa kaaqau kaimanka munku kenka vii mintuqa sauo ki kivu rampai vimanka ke ho kave uo, kio.

<sup>16</sup> Viva minki kumanka Paresi vaiinki hini susa kihama, Vi saiqa varaiva maara entaqaa minkio ivo. Viva maara entaqaa sa minkiakaa vaivo viva uva raqa sehao minkio ivo. Minkivaa kio viva sa Kotiva inaihaio kuvivave, kinka. Kumanka hini susa kihama, Aqao, nankumaseoe manta vaiinkivano vi saiqa noa saiqa ho varaanaove? kinka. Minki kivase hini usa vo uva kumanka hini usa vo uva kinka.

<sup>17</sup> Qaiqaa Paresi vaiinkinavu via irehama, Ae viva ki kivu rampai seo ivo kianaave. Vi vaiinkiaa ae nana uvae kiarao? Viva nankuma vai vaiinkivae ai avu rampai se ivo? kuvo vaiinki viva kihao, Viva poropeti vaiinkivanove. Kotiva via saihaiqi vaivo viva saiqa vae vaio ivo, kio.

<sup>18</sup> Minki kumanka Iuntaa vaiinkinavu sa via uvaa quqaave kirai vi vaiinkiaa kiha, Ae una kihaama ki kivu rampai vivo kiarao. Haau sa ai avu qimpa vuave, kinka. Minki kivase vi vaiinkia nosa qosa naaromanka vikanta

<sup>19</sup> anumanka vikanta irehama, Vaiinki maa nikanta maaquve? Quqaave via nai noa auhaqinkaio avu qimpa vuave? Nankuma saivoe via avu rampai vivoe ho kaveo ivo? kinka.

<sup>20</sup> Kumanka via nosa qosa kihama, Maa vaiinkia kikanta maaquve. Via avu haau auhaqinkaio qimpa vuave.

<sup>21</sup> Nai nankuma saivoe via avu rampai vio ivo? Nai kavave via avu rampai seo ivo? Viva nouqamavivave. Ne nenka via ireha kavaake. Viva homa ninka kiva nimianaove, kinka.

<sup>22</sup> Vikanta Iuntaa vaiinki kave vakausa naaku qekehama minki kuama. Iuntaa vaiinki noanavu vaasa uva kivase kihama, Vaiinki vovano Isuaa mesaia vaiinkivano kinavu saihaiqeva anivave kiantoave. Vovano minki kiea via saara via akihama maara naavuqinkai akikamasaaio veva nteo esaara vuaie, kinka.

<sup>23</sup> Minki kivaseha uva kivakooa ki via nosa qosa Iuntaa vaiinki noanavu naaku qekehama kiha, Viva nouqamavivave. Nenka via ireha kavaake, kinka.



<sup>24</sup> Kumanka visa qaiqaama haau avu qimpa vua aarema kihama, Ae Kotia quahama amikaakaave. Isuva manta vaiinkive, kinka. Kuvo vi vaiinkiva kihao,

<sup>25</sup> Isuva nai manta vaiinkie soqe vaiinkie ke sama via osara ii uo. Ki kivu qimpa vua rampai saiaa viaaqaima ii uo, kio. Kumanka visa via irehama,

<sup>26</sup> Viva ai nankie ivo? Viva nankumaseoe ai avu rampai seo ivo? kinka. Kuvo viva kihao,  
<sup>27</sup> Ke viaa ni kiva nimuamanka ne sa iriavo? Nankihae vi uvaa qaiqaa iiesave? Nevaka vo? Nevaka via vainki vaiesae qaiqaa vi uvaa iravao? kio.

<sup>28</sup> Kumanka visa via noaiqamase akiha kiha, Arema via vainki vaihaa via uva iiaravave. Kenavu kenka saivaqaa Mosea uva iiqi vuausave.

<sup>29</sup> Kotiva Mosea uva kivakoa kenavu iiqi vunaama ivo. Isuaa vi vaiinkiva qumina vaiinkive. Kenavu sama viva vihaio ani osaraa ii uo, kinka.

<sup>30</sup> Visa minki kuvo viva sauqu runkinkii ihaio Ise, kio, Ki kivu rampai kimikaiaa viva vihaio ani osaraa ne sae iriavo?

<sup>31</sup> Kenavu iuo Kotiva sama manta vaiinki uva ii vaivama ivo. Kotiva nai uva iuha ni vaia vaiinkisa visa uvaqai ii vaivama ivo. Via auku kure re vaiasa visa uvaqai Kotiva ii vaivama ivo.

<sup>32</sup> Haau maa vakaa hoqaramako entaaqaankaio sa vaiinki vovano nai noa auhaqinkaio avu qimpa vua rampai amikoama ivo.

<sup>33</sup> Isuva sa Kotiva inaihaio kuvuae kio sa ki kivu ho rampai kimikaikiio, kio.

<sup>34</sup> Vi vainkiva minki kumanka visa kihama, Ai vaaqu vainki vakakaivave. Ae vo? Ae kinavuvakae maara uva humiqenaave? kinka. Minki kivase visa vaiinki via rarau vae veva maara naavuginkai vahaagaini aquse.

<sup>35</sup> Via vahaagaini aqo sovo Isuva visa via rarau aqusoaa iio vi vaiinkia ranta seo kihao, Ae vakaini vakakai vainkiaae quqaa vivave kinaave? kio.

<sup>36</sup> Kuvo vaiinki viva irehaoma, Noa vaiinkio, viva kavave? Ae kiva kimiaqe ke viaa quqaa vivave kiae, kio.

<sup>37</sup> Kuvo Isuva kiva amio, Ae kave vaiaausa ke maa visama ariara ki vai uo, kio.

<sup>38</sup> Minki kuvo viva kihao, Noa vaiinkio, quqaama ae vivave, kio. Kivaseo viva Isua avuqaa koi sau aravio via quahama amikeo vauvo  
<sup>39</sup> Isuva kihao, Ke vaiinki nahenki raira saea vakaini kuvuausave. Avu qimpa visa kavaakea kuvuausave qaqi kavasa avu qimpa vuakea kuvuausave, kio.

<sup>40</sup> Minki kumanka Paresi vainkinavu vi uvaa ii Isua irehama, Kinavu kivue qimpa vi ivo? kinka.

<sup>41</sup> Kuvo Isuva kiva nimio, Ni nivu qimpa viavauve sa niqaa uvavano vaianaove. Ne kiha kenavu ho kave uo ki vaiavo. Minki ki vaiaraa kio via saara niqaa uva vaianaove, kio. Isuva minki kuama.